

PL  
2780  
.W4





780  
4  
YORK UNIVERSITY

JUL 03 2001

EAST ASIAN STUDIES

# 李小巖先生遺像





Digitized by the Internet Archive  
in 2009 with funding from  
Ontario Council of University Libraries



漢魂徵求李小岩先生遺著啓

士君子具海涵地負之才有都鍊京研之作不克登庸天府流播人寰著述等身窮愁沒世半生精力隨歲月以銷磨一集珍藏逐風塵而散失雄文覆轡游語燒薪魏著沈江賀詩投溷此有心人所同慨而後死者與有責焉小岩先生同邑耆儒吾宗碩德漁歸極浦八景爭傳人愛平泉數椽小築讀破鵝湖卷籍偕棠棣以齊名吹來鹿野笙簧賦葦蒿而報捷名山勝水蠟展環游鄴架曹倉藏書極富賢豪結納何嫌屠狗賣漿德化漸摩能令盜牛守劍梅與廣平而斌媚柳同思曼之風流元龍氣豪太邱道廣主人好客時開座上之樽將伯助予亟拔閨中之珥寒士歡顏於廈庇良朋仰望其金分顧乃生產不治蓋藏屢空須綈解贈而貂頽蘇季之裘原粟分貽而魚入范雲之釜迹其天懷自曠物我胥忘夫亦足以倒豪傑於一時起懦頑於百世也已既輕財而仗義更著道以能文原其饕飮者詩書枕席者經史探驪七字同驚夢得之豪倚馬萬言共佩青蓮之捷偶爲聯語尤擅勝場摘豔而熏香稟經而酌雅或語晦菴之誠正或爲曼倩之詼諧一紙饋遺人皆珍護數行揮灑客競傳鈔吐學士之詞華動時賢之傾慕年方逾乎周甲星遽隕乎少微過庭無孔鯉之趨捧硯只范喬之泣手中揮霍金散還來身後蕭條磬懸空慨先生明達

自無悶焉惟是騰蛟起鳳之高文繡虎雕龍之傑著經營乎心力疲敝乎精神而顧趙括先刎父書誰讀  
小同方稚祖籍疇珍琴隨子敬以俱亡絃與鍾期而並絕道盡恍淪乎劫燼魂歸應痛乎重泉漢魂戎馬  
頻年時還磨盾案螢早歲曾學拈毫孔融夙通元禮之家王粲常入伯喈之座瞻韓有自慕蘭難忘今春  
故里言旋意園重過睠懷耆舊尙有前型爲問文章竟無完帙豈嶢嶢之易缺將負負以徒呼輯柳編蒲  
亟作搜羅之計鐫梨刻棗願籌刊布之資諸公或交訂荅岑或情聯粉社或游楊同學或盧李通姻文字  
唱酬入蔡邕之秘枕詩詞投贈愛王播而籠紗或讀好辭涎流不厭或聆佳句耳熟能詳敢乞錄以相遺  
公諸同好殘篇斷簡罕而逾珍累牘連章多而益善勿吝積藏之玉俾成腋集之裘庶幾一卷同開如挹  
清芬於先哲九原可作應銘高誼於仁人

序

記言王道始於鄉今之地方自治亦始於鄉有陳仲弓王彥方其人者崛起里閭以其植品劬行矜式群倫鄉之人相與漸仁摩義起懦興頑實足以輔國家政刑之不及人雖已往而婦人孺子猶瞻瞻於先哲之典型歷百數十年而不墜則道德之感人深也感人之道德恒附麗於名世之文章鄉先達單詞片牘之流傳諷誦吟哦轉較賢傳聖經爲珍重作者因文而見道述者薰德而善良鄉邦文獻不其要歟

小巖先生以名孝廉候詮部曹入幕軍府足迹雖半天下而居鄉之日恒多性介而通家貧而俠具容衆尊賢之量有解衣推食之風遊其宇者胥泯詐虞爭相感頌漢魂童年以同里同宗累世通家之誼時親道範其文詞亦多傳誦焉戎馬蹉跎 先生之歸道山忽忽已二十餘年矣今春假旋詢知平生著作經

被風災家無存帙任其散失不特無以慰嘔心之長吉又何以永時賢之謳慕而垂後學之楷模用是黽勉徵求期付劂劂日來搜集惟李子虎光祿所刊柳堂師友詩錄內海山詩屋吟草一卷係 先生詩集內古近體詩七十五首五言摘句三十二聯七言摘句四十八聯此外輯得古近體詩一百一十九首散體文十四首駢體文十一首韻文二十一首楹聯五十七對別複刪重辛劬校勘闕疑闕殆務存其真庶

幾鄉先達之流風餘韻得以長留吾鄉之學子莘莘胥緬鄉型同珍國粹是則

之厚望也夫民國二

十三年季秋下浣

李子虎光祿原撰李小巖先生小傳

君姓李名文泰字叔寬號小巖廣東吳川人同治庚午舉人候選主事君爲柏巖先生第三子九歲登朝臺賦詩爲張瀚珊太守崇恪所賞稱爲奇童甫冠仲兄小蓮明經歿家無儋石舌耕供母撫諸弟姪者十餘年如一日嘗客某將軍幕有獻俘者纍纍五十餘人將立決矣君知其冤固爭不得拂衣去將軍悟釋其俘余聞柏巖先生以名孝廉官廣文不畏強禦諸生非罪株累者必白其冤君能繼之可謂賢矣庚午七月過訪柳堂聯吟秋社與文樹臣周雲圃樊昆吾倪雲癭諸詩人觴詠甚歡顏夏廷觀察稱爲吟秋大敵九日高會夢香園登五層樓酒酣放歌樹臣觀察激賞闡文決其必售揭榜果捷君天性豪爽爲秀才時家貧嘗絕糧對客論項王漢高祖事爭辯竟日口滔滔如懸河不知其故未餐也或賣文得金有親朋告貸者輒罄其囊生平耽吟善飲花晨月夕一往情深所作詩真氣盤旋多豪宕蒼涼之慨有海山詩屋吟草







序

自來文學之盛衰與世運之隆替相應故文稱兩漢詩美盛唐後有作者莫乎不可及矣西漢之文莫盛於元狩之朝而兩司馬爲魁首李唐之詩莫盛於開元之世而李與杜爲大家然史遷宮刑相如消渴兩司馬皆不保其終若青蓮少陵天才超軼與世寡儔又值安史之亂漂泊於江南劍南之間遁於酒而抑鬱以死豈奇才磊落爲造物所忌耶何其名獨顯而運竟獨阨耶吳川雖僻處海濱而山水清淑代有聞人林莘山粵東七子之稱聲名藉甚其他如吳孝廉迴溪陳侍郎荔秋吾先祠殿撰芾南公類多高才碩學蓄道能文文物典章留傳家乘厥後繼起則李公小岩冠絕一時夫公家學淵源橋梓並登鄉榜諸昆季出風入雅馳譽文壇而公尤秀出群才常交遊當代之名公鉅卿學士文人相與角逐於文酒之會與吳觀察永王觀察良弼易觀察順鼎更唱迭和訂忘年交洵足媲美前人留名後世矣乃自鼎革以來公歸道山斯文天喪等身著作星散雲飄大雅沉淪不無世運遷流之感李師長伯豪惓懷者舊心焉傷之故於軍暇假旋首以考獻徵文爲要務而小岩先生之遺著安可任其散逸而遺亡因爲加意徵求精心采輯壽諸梨棗以永流傳將見片鱗寸羽具瞻祥麟威鳳之光金鐘大鏞如聆廣樂鈞天之奏煌煌鉅製真

不啻李杜文章光燄萬丈也今世運變遷新文化競爭亟烈矣得李師長之保全國粹以樹鄉型而鄉先哲之道德文章賴以留貽而不墜以爲後學之楷模其爲功於地方文化豈淺鮮哉余生年雖稍後而與公里居接近常得親承道範而佩誦其詩文今公往矣對此遺編猶想見其流風餘韻也因綴數言於簡端以誌不忘焉

民國二十四年季春上浣吳川八十拙叟林晉達謹序

李小巖先生遺著目錄

文集

李壽鏡先生六秩晉一雙壽序

李拱北邑侯五秩晉一壽序

李和卿都戎五秩晉一壽序

鄒思賢先生壽序

李少樸明府令堂練太宜人壽序

送李秀齋邑侯序

重修三柏李氏大宗序

茂名許颺階君家傳

莫友琴觀察七十雙壽序

李作廷先生七秩晉一壽序

李際廷先生六秩晉一壽序

呈請勸災委員轉呈大憲賑恤稟

致陳孝廉逸珊函

致鄭明府宗山函 以上散體文

江華甫郎中令堂何太夫人七秩晉一壽序

江華甫郎中令堂何太夫人八秩晉一壽序

張鳳翔封翁七十雙壽序

送蘇邑侯雨滋序

陳荔秋侍郎在籍身故請縣轉詳文

集會求助序

辭吳陽總局稟

重修乾塘陳氏大宗李族舉祭文

重修霞街林氏大宗李族舉祭文

重修李氏鄉賢二世極浦祖祠林族舉祭文

祭李吉甫先生文

以上駢體文

祭林芾南殿撰文

祭陳眉卿先生文

祭曾雪堂軍門文

祭林心彝先生文

祭鄭蘭陔先生文

祭文巡政文

祭曾次豐先生文

祭梁可竹先生文

祭梁可竹先生淑配朱恭人文

祭林香士先生文

祭吳季輿先生淑配李孺人文

祭吳文泉先生文

祭鄧端卿先生文

祭江孔德先生令堂何太夫人文

祭江季石先生令堂馮太夫人文

祭陳道安先生文

祭李雪廬先生文

祭李吉甫先生文

祭李則山先生文

祭何文宰先生文

陳善堂部郎七秩晉一冥壽文以上韻文



詩集

洗夫人廟

怨婦行

石城縣

清明前二日自石城還家

石城道中聞鷓鴣

九月二十二日生一女

消夏卽事

食苦瓜

烈婦行

聞信宜近報

梅菜酒樓

五藍題壁

壬戌九日

新興迴龍寺

聞道

題畫

香港

出門

羅定題壁

自羅定返珠江有感

郡城中秋與內子對酌月下口占一律

丙寅重陽登觀心閣

贈家雪屏守戎

三月十六日將之羊城示弟季才

幕中卽事東張晉齋茂才

五月十四夜

秋夜與晉齋話家庭瑣事感賦一章

贈鍾硯雲

酒帘和胡鳳亭

僕黃五相隨半載頗誠樸可喜余羊城賦閒胡鳳亭以書索之臨遣賦此即柬鳳亭

硯秋刺史招寓公廨秦偶獻菊二盆蒙由香山賜詩褒賞捧讀之下感愧交并謹步原韻兩章

病中謝張晉齋

有感

馬鞍嶺茶亭口占

寄鄭雪莼廣文

深院

題鍾某菊蝶圖

珠江夜泊

晉齋夫人以親製徽州餅見餽成一律謝之

紅花店題壁

那珠尾口占

自述

庚午七月既望過訪柳堂呈家子虎光祿

八月十四夜閣中口占

古意

子虎先生以重陽前風雨憶舊放歌寄示并約招文樹臣觀察周雲圃太守樊昆吾封召九日五層

樓登高步韻兼呈樹臣觀察

九月八日柳堂試題糕

庚午十月將歸吳陽留別羊城諸知己

庚午冬歸自羊城舟人劉姓六月載余下場者也水淺舟膠口占二絕

十一月廿四日送壽鏡兄之官澄邁

辛未北上舟經肇慶吟四絕句

居庸關

五月十日天津題壁

勇烈將軍行

蒼梧曲代家亦樵茂才作

壬申三月余買婢梅萊林氏何樸卿茂才以詩扇辱貶爾時匆匆未報明年夏酷暑納涼觀潮亭白蓮送香青山窺坐姬揮扇侍吟聲嚶嚶卽君詩也根觸舊事依和四章

次韻贈黃今山茂才

張幼堂參軍有約過我阻雨不來旅館無聊撫今追昔奉寄二章

前詩意有未盡再成二十八字

瓊州四城門外僧寺蓮花齊開並蒂五日丁松亭太守師招同張竹隣封君陸植生郡傅石孫明經  
楊梅邨茂才家春卿同年暨諸公子集白衣菴卽席見示七律二首謹步原韻

阿金曲

答友人問近況

寄張晉齋一百韻

放榜後一日小飲宴賓齋贈曾次豐孝廉

李春卿明經將之太原應督學謝屢伯夫子之召賦此送之

同陸晴霞主曹夜話

出都經瀘雜詩三首

郡中書懷



五日江上

鎮署懷古

林峻雲先生惠寄長篇依韻奉答

重至金蓮菴有懷先茆南師兼柬林純士廣文

自郡城至大路坡書所見

將至長塘道經田家感賦

和日本鈴木魯寄子虎廣文原韻

石門

五言摘句

七言摘句

登高懷古

梅溪吟

送王觀察景賢

重過金蓮巷寄廬有懷先哲南師

意園詠

自江門航海至礪洲有懷宋君臣遺跡

答吳文泉明經見贈原韻

贈毛墨酌大令

庚戌四月十日梅江旅次喜晤美生太守握手言歡談詩對酒賦二律

步和楊美生太守無題詩二首

送吳漁川觀察調官瓊崖四律

石孫先生潤別經年今夏至羊城匆匆返里未及拜訪深以爲憾別後成五律二章寄以代柬

周翰樵羅梅臣兩廣文招遊化州驪珠臺三首

秋日登石門砲臺望平石鄉有感適鄭震東君以帳眉屬題率成二律

答池大令幕友項君植藩見贈原韻卽此送別

舟中無事奉寄實甫觀察

九日旣望走送實甫觀察得見琴夫人喜賦一律

步易實甫觀察原韻二律

奉和實甫觀察五十自壽詩原韻

步易觀察原韻並送池大令滋鏗調任南海

步和易觀察實甫原韻

漫興

觀心閣

陷信宜

重陽日官軍收復信宜喜爲賦此

鄭紹堂大令以讞獄來吳川惠顧意園話舊殷殷兼及時事感賦四律

前詩意有未盡再疊前韻呈紹堂大令

月夜過訪紹堂大令茶話甚懽歸途成詩三疊前韻

感事再疊紹堂原韻兼喜兩如君自欽來寓

鄭紹堂大令以九言古見贈依韻步和

送別左桐軒邑侯詩

和程野吾通守詩四首

感事三首

步唐象五大令夜飲觀潮亭賞月詩原韻五律四首

筆授軒

沈香浦

還珠亭

擲硯洲

作州箴

奉錢三

周人犧

畧舉凡

歌青蠅

羹頡侯

臚句傳

豐草夔

金石交

反離騷

瓠子歌

東陵瓜

赤白囊

棄繻生

緯六經

秧鉞

秧馬

步林韻宣西江學堂留別元韻八首

謝別易觀察實甫步原韻

和文觀察樹臣游觀山寺原韻二首

癸未南歸舟經福州頭寄姪椿園

辛亥易觀察實甫惠寄大著數種謹賦七律四章誌謝

陳橋驛

病起



夢

舟中有見

閨謔

戊寅春日懷雪廬家比部六十韻

贈黃雲臺大令七古

步黃雲臺大令原韻五古

仿王漁洋秋柳原韻

步蕭雲汀廣文原韻

贈馬介堂軍門五律四章

和邑侯賈子釗壽詩二首步原韻

和江旭初先生重游泮水二律

五月二十二日易實甫觀察招同楊芙生太守周相宸監督家玉山觀察家鏡臺彭仲芬兩教員聯

集仙易亭疊韻賦詩志謝

實甫觀察枉答仙易亭酬集詩再疊原韻

感事三首

題姜子誠蘆蟹畫扇

題鵝蚌相持圖

西施臂

硃州

懷吳文泉先生

送黃儷球之肇慶齋館

贈女校書從良失所七絕

訪妓桃花從良七絕

朱覺斯過訪有贈

疊韻和容小堦上舍麟將之新會

疊前韻贈張晉齋茂材錫康七絕五首

步張晉齋喜得家書原韻

幕中有感疊韻兼呈家紫珊張晉齋

送鍾硯雲之西南爲居停索逋糧

送黃簡臣之西南糧局

疊張晉齋家紫珊韻再送簡臣

夏夜張君拱宸以詩見贈步韻答之

步家紫珊原韻五章

岡州紀勝疊韻

醉題姜石卿別駕扶江釣魚圖

端午日感賦

七日望後家鑑川孝廉何赤珊上舍陳魯池少尹招同張晉齋茂才沈滋生少府夜集小西湖歌航  
舫醉賦

張晉齋梅花帳眉屬題二絕

七月念一日鍾卓甫文學招同陳續參唐荔卿鍾硯雲關梅皋譚百峯何掖垣家舟之諸君夜宴小  
西湖上率成六章奉謝兼索和章

步何掖垣先生見贈原韻

陳魯池以詩餞別步韻奉答

重陽後一日言返吳陽留別同人疊夜宴小西湖韻六首

張硯秋刺史招飲席間謹步送華樵雲觀察原韻四律致謝卽送刺史之香山

長春仙館

八月將望銀燭初燒晉齋以牡丹帳眉囑題沈粹生筆也率成四絕

詠史二章

蘇屬國節旄

趙忠毅公鐵如意

步辛酉題珠江花舫

附錄辛酉作

曾燮堂軍門招飲作此贈之

李紫珊能詩善書法著有半園尺牘忽晉齋來書云其已歿作此哭之

李奎垣參戎精青鳥術隨季父壽庭軍門官粵東乞爲先人擇窆窆賦此志謝

夏日偕家紫珊明經訪倚馬山房邀同鍾卓甫茂才游小西湖晤主人陳續參司馬談次雨甚命肩

輿歸作此奉寄

題夢禪圖

楹聯集

高州協中書院其二其三

高州旅瓊會館

極浦亭祠其二其三其四

乾塘陳氏大宗

霞街林氏鄉賢祠

陳荔秋醮壇

上郭特峯公祠

黃都府峯上公祠

上郭都會頭名齋廠

金輪齋廠

三月拜齋齋廠

三月拜齋燈廠

送別王觀察良弼

贈趙統帶

深柳堂

賀江璘如鄉薦

賀李壽巖作翁

賀陳石卿新婚

賀陳禹廷作翁

賀林少侶娶孫婦

賀鄒日新娶孫婦

賀李雪廬出嗣子新婚

賀林禹勤新婚

賀吳文泉令子新婚

賀何升菴作翁



賀壽鏡世兄新婚

賀新婚

祝陳健臣令堂壽

祝李夢軒令堂八十壽其二

輓林芾南師

輓陳荔秋師

輓彭子衡其二

輓江誠和

輓江孔德

輓陳仁端

輓林少侶

輓李增榮

輓鍾楚士

輓吳永觀察之夫人

輓周相臣令堂

輓梅萊黃分府啓鏜

輓羅邑侯仙源

輓陳石卿

輓文耀奎之尊甫令堂

輓江柱中母馮太夫人

輓江母林太宜人

輓黃雲鵠令堂

輓陳雲田令堂

輓外姑

輓內弟

李小巖先生文集



吳川李漢魂伯豪輯

李壽鏡先生六秩晉一雙壽序代李少樸崇忠作

自來敦龐純固之氣在天爲旗翼在地爲岡陵在物爲松柏麟鳳在人爲壽考人之壽族之光也蘇洵云國有君邑有大夫爭訟者訴其門鄉有庠里有學學道者赴其家彼豈無修而得此哉是必盛德化族人高年爲族望如我壽鏡先生者斯足當之矣庚午二月十日爲先生過甲之辰族之父老子弟不憚跋涉屬余爲文壽先生余曰忠與先生交有年矣先生孝若曾參友若張仲且有管子之仁季札之信晏嬰之儉國僑之讓顧事業嘖在人口猶可陳其大畧也諸公盍一一臚之乎有應於座者曰辛酉之亂戎馬蹂躪五邑先生籌兵籌餉力保彈丸盜不入境舉邑獲安是宜壽有曰海氛之惡鯨鱷磨牙東南千里商賈視爲畏途先生募勇擒魁海波不揚估帆無恙是宜壽有曰吳川城垣頽圯先生倡修築夙夜鳩工衆志成城俾安磐石是宜壽有曰道光中吳川建考棚文士阻科名者廿餘年而先生卜吉改建吾邑始歌鹿鳴是宜壽有曰賓興之設也寒士類多向隅先生首捐經費分千樹之一葉成涓滴之江河由是廣廈

歡顏彈冠相慶蛟騰鳳起基此矣是宜壽雖然忠以爲此數者天子褒之合邑頌之志乘傳之無俟義人  
賢者也余之壽先生首在聯宗枋吾族之聚高涼也連亘數十萬家地遠則疏人衆則渙兄弟而遠人之  
非先生律協中書院六邑能一家乎於以知葛藟庇之則松柏酬之也三柏有族鄰賢公發其祥學正公  
承其烈百世不祧者也乃秋霜春露祀典闕如先生厯念烝嘗不遺勞怨靡者修之黜者削之而後犧牲  
無所攘柔盛有所潔衣冠濟而俎豆馨焉千秋之血食自此綿九齡之吉夢不自此錫乎則先生之壽尤  
在修祀典也然更有進者余嘗遊吳見族黨中黃髮歌前蒼髯相後犬豕共乳烏鵲同巢問有畦畝之嫌  
飲食之訟者乎渺乎無有間有小言是蹈其父兄必相與恐曰我先生無乃聞之非其感化之深能若是  
乎忠於是景其德羨其福益信先生之壽未有艾也或謂先生雋才力學使早待詔金門大夫文學執出  
其右者乃棘闈十餘戰屢荐未售年將老矣謹以明經待坐青氈日與族之後生小子抱琴擁書論文把  
酒於芳園桃李之中似其才未竟用也不知天老奇才實以釀成厚福昔公孫宏年六十舉賢良先生始  
增其一然猶枕經薛史肆爲文章一旦而大器晚成安知不高步臺閣迴翔藩岳爲族光寵哉又見膝前  
桂樹群鸞鳳毛堂下松枝並稱犀角先生與德配陳宜人眉齊鴻案含飴而樂之彼洪範五福未及多男

華封三祝不本好德先生兼而有之以視古之義門喬松呼吸吐納者曾不足當其一哂也不可以動斯人修德之念而受當世善禱之詞乎先生聞之歆然不敢當在先生謙謙之衷則然矣余族人曷能自己余不獲躋先生堂幸諸父老以余前所稱敦龐純固之氣在人爲壽考者爲先生頌以後所稱大器晚成者爲吾族期之也他日者由耆而耄而期頤必將兄轅固而弟伏生九八公而五四皓族人之跼而觴者又當何如跂予望之矣

李拱北邑侯五秩晉一壽序

嘗讀班固漢書循吏傳若文翁若王成若王霸若朱邑若龔遂若召信臣二百三十九年中得六人焉循良之吏成如威鳳祥麟間世而一出然史言膠東蒙賞是後俗更多爲虛名霸入財爲官又習文法論古者或軫之惟九江以明經甲科爲郎出補令長號稱召父桐鄉存問耆老孤寡遇之有恩渤海解散盜賊開倉廩假貧民文翁仁愛好教化漢世稱盛僅此數人治行章章同傳異趣益以知循吏之難而能兼其政績者則難之尤難也 拱北邑侯南城鼎族生有異質襁褓識之無束髮授書一目輒十行下咸豐間隨 封翁公避亂鄉居轉徙流離刁斗相聞絃誦不輟故少以文章顯踰冠注學籍登賢書又十年成進

士改官部曹 侯幼失恃念 封翁春秋高乞假終養歲辛卯始由比部呈請外用注選吳川吳川僻處

嶺西去京師九千餘里東南濱海樓櫓出沒港汊多歧巡警不至繇突爲患而且田賦斥鹵潮蒸颶風樹

植維艱下窮上瘠吏相戒爲畏區 侯資然來思不鄙吏其民而保惠教誨將究心力以治之 侯自今

之良吏哉 侯始下車問疾苦去冬大雪薯蕷歉收民多菜色惟埋屠狗之奸或相率剽掠今夏凡旱米

價日騰人心惶惶 侯禱雨立應發公款轉米平糶禁居奇饑黎裹腹七十以上孤貧無依者月加存問

捐廉餼之懸重賞購獲劇盜徒荷歛跡尤精聽斷遇事犀剖鏡澈機牙四應點者不能欺蓋 侯在秋曹

嫻律令又無他嗜好公餘無事日取六房檔案反覆而推勘之盡得其源委枉直故能洞中肯綮民驚爲

神明 侯尤留心學校廡山之從祀也 侯以舊例僅由校官致祭不足示恭敬廼籲薦紳鐘鼓豆蓬率

諸生衣冠行禮觀者數百人書院文藝字點而句竄之指授皆有法度間 侯家居時講學里門以束脩

供菽水費又嘗主講宿遷書院春風時雨門下士飛黃騰達稱盛一時吳川邇來科名踴躍今秋解試有

有獲雋者皆 侯之莩也歲十月爲 侯五秩晉一壽辰僉謀製錦稱觴且言德配 鄧恭人黽勉同心

贊襄內治 侯清風介節不名一錢 恭人嘗典釵珥助夫子好行其德將以壽吾 侯者兼壽 恭



人屬秦一言以侑爵夫惟仁者有得壽之理君子賦偕老之章邑之人秉彜好德飲水思源非以阿所好於侯也詩人木桃瓊瑤之義也其兼頌恭人也則采蘩采藻美諸侯大夫妻之義也故援班氏所稱文翁朱邑龔遂召信臣之治行証之吾侯有能兼之者而侯之善政有班氏之所未及詳者慨張諸屏而稔於侯者所稱侯孝於親友於兄里居解紛排難樂善好施南城士大夫壽侯者一一能言之而無俟贅述耳他日者政成宦達則郎官出宰百里亦刺史入爲三公如召信臣之增秩賜金徵補少府列於九卿又享大年子孫逢吉身名俱泰則吾邑亦與有榮施也豈不懿歟

李和卿都戎五秩晉一壽序代李少樸作

電白古神電衛馮刺史夫人冼氏故里吾高舊稱人物以刺史家爲第一論福澤亦刺史家爲第一流風餘烈垂千餘年勿衰余嘗游莊山濕泉間見夫龐眉兒齒采靈芝餐秋菊扶鳩旁午與談戰陣兵法則眉飛色舞躍躍欲動所謂老當益壯者所在皆是未嘗不嘆刺史澤孔長也若吾宗和卿先生尤著焉歲丙寅余倡建六邑協中書院咨電之可共事者僉曰惟先生爾時未識先生聊以衆論之歸信之也旣而先生過訪鬚眉古樸恂恂如儒余因其貌想見其爲人今秋自都門歸先生年五十一矣郡之人將以某月

日爲先生稱觴上壽是日也製天孫錦開雲母屏逾懸弧辰者已數月顧值稱翁伊始賀者雲集有稱兕觥而前者曰今而知壽之言辭也先生五歲而孤讀蓼莪詩卽掩卷太息敬母愛兄居然成人旣而節孝黃太淑人愛之育爲嗣溫清定省一如所生詩曰螟蛉有子又曰式穀似之莫不謂先生之天性不可及也當是時崽子嫋嫋斃無倚強悍者又從而魚肉在他人處此幾於憂能傷人怒然如不可終日先生積誠感之黃堂片言遂消積訟書有之惟德動天至誠感神先生有焉今世士夫擁厚貲粟紅貫朽猶復躬持籌握算計較錙銖挈絲黍者日不暇給仲淹義田堯夫麥舟厥風杳矣先生家中不中貲於鄉黨鄰里冠昏諸大典急者周之且有文王掩骼之仁原思與粟之義有能文寒士不給膏火者助之蓋與德配鄭淑人好善樂施於今三十年以故南國之樛木燕山之五桂輝映一時古華封祝云多福多壽多男子洪範五福曰富曰壽而皆本於攸好德由此而耄而耋而期頤皆所以躋先生也屬余爲文以壽之雖然余尤有望焉先生少學帖括應童試不售旣有戡定萬里之志投筆韜鈴習長槍大劍思見用於世陳金剛之亂先生籌兵籌餉集衆固守卒能保障一鄉不獲專閫奏膚威加邊徼年將老矣僅以軍報效就職都戎惜其志未竟用也余不日捧檄蜀中擬偕先生同登劍閣綿竹遺墟問諸葛戰功猶有存者過報曉

壘之塋而揚昭武之威赫矣設授先生以建牙重任必將本其素所講習者出爲當世盪平小醜與刺史績共垂竹帛余將珥筆紀之吾郡人之欣羨者何如吾族人之光寵者又何如也

鄒思賢先生壽序

周易有言富有之謂大業尙書洪範五福一曰壽二曰富康王之命畢公也曰資富能訓惟以永年誠千古大業莫如富而富與壽常相因而致焉富之時義大矣哉余嘗讀史記前漢史書攷其稱富者有若陶朱公有若猗頓有若卜式陶朱功成之後用計然之策乃治產積居與時逐末累至于金再分散與貧交游昆弟後年老而聽子孫子孫修業而息之遂至巨萬猗頓適西河大興畜牧十年之間其息不可計贊擬王公馳名天下卜式願輸家財半助邊是時富豪皆欲匿其財惟式慨然助費上於是召式爲中郎賜爵庶長布告天下並以風百姓後又賜關內侯竹帛章章至今掛人齒頰世常言古今人不相及吾觀農部郎中思賢鄒公與陶朱猗頓卜式諸賢豈有異耶公遂溪人也與吳鄰士大夫商賈行旅之往來吾鄉者鱗萃麇集問貴戚之富咸交口推公旣與公爲親串得聞生平行誼甚悉己亥夏余以事至麻章始登公堂挹其言論丰裁貌豐而養粹年將耄羣髮猶漆黑望之若五十許人於時心焉誌之今春二月爲

公八十壽辰同人僉擬製錦稱觴屬余文以侑爵竊惟公世有隱德幼而穎異嗜讀書失怙後家無担石偶讀貨殖傳發憤有所得棄儒而賈貿遷所億屢中如太史公所謂人棄我取人取我與者公一一宗之年未四十富甲一鄉可不謂豪傑之士哉公髫齡事親服勞無懈及其老也析金以建祠撙田以贍祀追遠報本人以是稱其孝公在鄉黨間恂恂謹愿不以賢智先人諸父諸昆乾餼無愆豆觴咸讓人以是稱其悌與人交不輕諾諾必踐人以是稱其信邇來風氣奢靡公之服食器用維其樸不惟其華惟其約不惟其縛意在於轉移風俗人以是稱其儉平日嫉惡如仇然里閭或有爭端則據理以剖之原情以解之期於和洽而後已人以是稱其直並稱其和公之生平大畧有如此者論者謂孝悌根於天性天性厚則生理足是宜壽奢則濫暴殄天物者自斲其生惟儉而後有餘不敢盡惜福則以延年是宜壽且人與人接而情生焉情真者必摯信也直也和也皆生意也即莫非壽徵也公之壽也宜哉且公尤有大過人者世之富人者多田足穀坐擁高貲其於宗族鄉鄰親戚故舊之顛連無告者漠然無所動於中公獨仁心爲質不忍以己之有餘愀然於人之不足飢者粥之寒者衣之疾者藥之歿者賻之愆期者嫁娶之道路之不便於往來者橋之舟之人才之有可造就者詩書而庠餼之凡力之所得爲者莫不毅然爲之公之

積而能散若此猶不屑愛惜金幣以遺其子孫而詰嗣六人四代同堂五福咸備天之報施善人不亦厚哉比歲國家多事賑捐軍餉鐵路洋債諸務動需數萬金公好義急公屢助鉅費賞戶部郎中上年滄海橫流租界事起公募魯連之義效倉葛之呼捍衛桑梓毀家紓難犬牙交錯虎尾憂危卒之履險如夷彼疆爾界桃源無恙鷄犬安然公之力居多昔漢帝詔卜式曰齊相推行躬耕不爲利惑日者北邊有讐上書助官往年西河歲惡卒齊人火粟今又首倡義憤事雖未成可謂義形於內矣前賢隆遇公實媲之方今朝廷講求新政開設經濟特科裕國通商爲當務之急公挾陶朱倚頓之長一旦疆臣荐舉對策彤廷八十登科如宋梁灝故事老成謀國天下富強不僅與卜式後先輝映也謹書以頌之公庶幾捧腹軒渠滿引一觴也

李少樸明府令堂練太宜人壽序

吾族在高一本也地遠人渙至不相往來歲丙寅少樸先生倡建協中書院六邑子姓始知親親之誼熟聞練太宜人孝儉慈惠爲當代女宗其猶奇者陳金釭之亂先生以孤軍盪決收復城邑太宜人典簪鬋鉏耨助兵餉雞犬旣安河山無恙而太宜人春秋九十餘矣辛未先生捷南宮奉命宰蜀將歸舞彩效老



葉故事某某相公爲文壽太宜人甚詳吾族人製錦慶之非維族之光寵抑且熙朝人瑞也吾高豐功厚福盛稱誠敬夫人如太宜人者奚多讓焉

送李秀齋邑侯序

光緒八年夏邑侯楚北李公秀齋以太夫人艱解任聞訃之日城鄉輟市邑父老相與嘆曰百年來無此好官矣今且去可奈何有號於途者曰天平吾儕小人福薄有賢父母而不獲久於其任乎婦人稚子群走而相告亦不自知涕淚之何從也夫公履任五閱月耳心深日淺未盡所欲爲彼愚賤何知而愛戴若此文泰益觀公之用心與其爲政而知誠之感人者深也吳川民俗好高而任氣睚眦小故往往搆訟或數年或數十年甚或數百年暮結朝翻卷牘常數尺許雖有能吏莫可如何公甫下車榜於庭某日理某案某日訊某人及期無敢不至公終日坐堂皇判事雖邇封篆不自安閒怡色和聲諄諄懇懇若家人父子之相告語老奸積猾俯首輸情判筆未終帖然已服三月內銷積案一百有奇其最難者鄭氏祖墓侵於林訟自有明迄今三百餘載公令約爲兄弟怨立釋某軍門家居以田土事請託辭弗見援律以斷人服其公隣封之民訟有留滯籲太守請就質於公雖格不得行亦足見公之誠感人深且遠也國朝名儒

爲循吏者陸清獻後推藍先生麗洲考麗洲公案先生官潮普罷任時惠來老民王某八十餘矣杖扶行二百里携米與雞子餽先生且言公爲政似包龍圖李侯曾宰惠來者也旣而豐順而西寧均有活包老之稱今觀其宰吳川益信然世傳包龍圖公案荒謬無稽皆出於小說附會大雅弗道不若麗洲公案確而可據公案中是非鑿鑿硃濬爛然萬手抄傳不脛而走不又與麗洲集先後並傳歟公將行矣不開奠不領帖清風兩袖行李蕭然有小民出爲所以籌資斧者公語文泰曰某不欲使吳川百姓破一錢一楮也輿情遏抑巷議而譁曉以勉成公志始稍稍散去以視麗洲之受老民餽物則有未盡同者文泰不敏以公事至室承所以期望者甚遠咨利詢弊探及芻蕘方欲舉邑中書院保甲義倉常平倉諸法從容商確次第行之而不圖公歸之如此其速也去後之思庸有旣耶臨別黯然出使面命綴語於後謹就公之誠以感人與小民之誠以應公者約畧書之前督糧觀察彭小泉文泰同年也其知公又最深郵書索此亟以寄之質之李侯並以告觀察云

道光己酉秋文泰隨侍羊城先大夫嘗命肅客始識信宜家五垣先生維時先生方膺選拔慘綠在座翩翩年少文泰廼僅十歲耳嗣聞先生應解試累荐弗售僅以明經爲校官選翁源調儋耳歲丙寅以



秩滿歸郡城一見懽然話舊情深忘年交摯而先生鬚髮半蒼矣別後補官南雄癸酉八月以試事寓省垣偕文泰徧登王山鐘海樓高處望昔年城南舊館烟霧蒼茫魚鱗萬疊不可復識相與悵然者久之既返挑燈論史擘箋裁詩過從無虛日文泰少失學自無一能然性獨與詩近先生與爲可與言也盡出其篋中斐餘翁山海南諸集命定去取受而讀之清風洒然筆等合續涵養深至一如其爲人蓋先生歷試冷官皆以維風化興學校爲己任視彼齷齪終日絜鐻銖計諸生修脯豐薄者相去甚遠故雖以餘事爲詩而其和平忠厚之音自然流露於行間也文泰不自揣間有所參訂先生咸以爲然無何先生歸道山文泰僻處海濱不得久嗣君消息今春志局偶暇長君某某茂才寄來手書並先生詩二冊書辭諄懇將索文泰一言竊念斯冊皆當年風雨一編與先生親手釐定者披覽一過如游舊地如逢故人又喜某某昆弟才雋品端能守其先人之美先生可謂有子獨愧文泰年將五十寂寂無聞回首兒時殆如隔世而重讀集中呈師北上諸篇猶憶先生翩翩少年慘綠在座時也廼欣然而爲之序

光緒十三年歲在丁亥孟夏宗愚姪文泰謹識

吾族三柏大宗重修六十年風雨剝蝕鳥鼠穿穴棲神之所日就傾圮今春族之父老子弟享祀於斯有  
皤皤黃髮者慨然歎曰是吾族人之責也古之人春秋修其祖廟何則神所憑依將在廟矣廟之不修烝  
嘗之缺神卽不恫於汝安乎且三柏非他族比也小弱之族俎豆易爲荆榛祠堂鞠爲茂草非無一二有  
志之士期修而復之而卒莫之舉問其故則無貲也曰貧也無貲並無助也曰寡也我文莊公發祥三十  
餘代綿繇子姓自石龍廉江之近以迄雷陽西粵之遠衣冠鼎盛將數十萬人是役人醵百錢已逾巨萬  
富者又酌捐之鳩工庀材豐享潔祀綽綽然有餘裕矣一本不能支大厦涓滴可以成江河我子姓其有  
意乎於是族人皆曰敬諾命文泰書之簡端

茂名許颺階君家傳

許君諱汝賡字仲臯颺階其號也世爲茂名人祖諱璜嘉慶庚午科舉人內閣中書授湖北黃州清軍府  
同知考諱祖祺道咸間處士君周睟失怙性穎異五歲自請入塾讀書生母朱孺人延名師教之終日手  
不釋卷夜歸燈下輒背日所誦書或講解四子書博母歡笑十餘年不易師而學益進弱冠縣學附生又  
明年食餼從兄汝韶孝廉鄉居教授君從之讀書古藤山館孝廉專學古文一以桐城爲宗君爲文不立

宗派兼工詞賦肄業高文書院副憲楊公頤時爲山長器重之光緒壬午以優行選貢朝考二等以校官用歸里教授邑寒士多所裁成制府張文襄公重君學行選充廣雅齋長兩省英髦群焉敬服副憲楊公之督學江蘇也以君及門高足操守可信奏帶隨棚閱卷君悉心選校所荐多名下士君歷嘗從化訓導肇慶府教授選開封訓導皆盡心訓迪不問新進印金同寅致書有遵伯玉獨爲君子之謔累任廣文不名一錢士心悅服君天性孝友居生母喪哀毀骨立任開建時念母林孺人年高歲一歸省四十後自奉其薄每食鮮飽人問之答曰術士相吾糧短年非知命吾母卽當享大年吾恐棄母先逝姑節食以期延年使術士之言不驗節食何傷若驗則庶盡子心焉耳昔白沙陳公常禱天願後母死蓋卽此意少兄茂才文惠五歲親愛特異常童髻齡共被相與臥起旣冠猶以爲常析產時美宅沃田互相推讓鄉黨稱之乙未春自肇假還及夏遭兄喪哀慟得疾後旬日卒享年四十有六君性利易與人處藹然若春風雖僕隸小人亦必假以詞色疎財好施與又不欲示恩於人知人有急常託他故與之或置金私處待其自覺日久人始知之少所受業陳茂才國成歿無子君聞訃涕泣奔視含殮爲擇嗣置產出資娶媳弟視其子而以師自任歲時臨視其家徘徊不忍去途中見乞丐病臥奄奄一息就問之親爲醫藥丐愈泣謝更復

贊之其好行其德多類此君書法初學二王參以率更故所書碑版非時手所及嘗捐修肇慶學齋撰記書丹並出君手太守張公曾跋稱爲二妙詩敏捷不自愛惜皆隨手散佚所存僅六卷生平癖嗜古籍見異書必購之凡歷象算術醫科諸書靡所不通而不爲所惑耽琴奕工畫善談好佳山水得佳境輒攜朋游覽銜杯賦詩興盡而返春秋佳日室中自晨至夕坐客常滿移琴月明花影間絃聲上澈雲漢聞者疑爲仙樂又樂與僧游或譏之謝曰吾非惑其教但愛其境長對之覺清氣時往來吾靈臺也嘗語人曰窮通之理常聽自然故喜交游不治家人產囊有餘貲盡人得用又嘗醉語人曰人生長得此境便佳人謂其瀟洒似樂天云君配林孺人一子士鑫先君一年卒君擇從孫景劭爲士鑫後

論曰君癸未入都才名籍甚諸先達多以玉堂金馬期之累躋棘闈僅以明經廣文終遇何喬也歿十六年景劭奉君行狀乞作家傳景劭年少才美翩翩玉立酷似而初當年觀察易公順鼎有人倫鑒賞識之題其琴研堂詩卷有云精金與美玉得此嘆已少又云懷當關憂樂志不在溫飽亦勿學騷人憔悴與枯槁或將作名臣富貴兼壽考期望之意深矣善人有後天之報施豈或爽哉

莫友琴觀察七十雙壽序

吾邑古越裳地山川之秀甲於他縣峯巒尤美白水潭鑿冠雲爐大小羅通天平諸山高入雲際蜿蜒周遭動數十里扶輿磅礴之氣鬱爲人才若晉之潘茂名隋唐之馮盎父子神仙豪傑間世而出郡中志人物者今稱道弗衰我朝咸同間逸雲廉訪莫公以良二千石陳臬黔中錦屏瀟嶺之區勒銘紀績群稱名宦垂裕後昆武達文通鸞停鵲峙科名仕宦萃會一門若寵嗣友琴先生其尤著者也先生幼嗜學有志經世自命不凡童試累拔前茅再試不售決然舍去游京師觀政農曹綜稽天下之戶口財賦民生利病度支贏縮刻意講求每有指陳動中肯綮大司農以下器重之皆以爲能維時廉訪公遠宦數千里家政殷煩先生奉嚴命假歸親攬庶務井井具有條理陳金缸之踞信宜也郡城戒嚴四郊多壘兵部侍郎楊公蓉浦時爲孝廉自鄉入城協官紳勵士卒撙城固守勞勛三年往往餉絀兵譁城孤危若累卵賴先生同心守禦傾囊助餉前後斥金錢數萬緡士飽馬騰卒殲渠首觀山無恙鑑水依然先生之力居多當是時國家運際中興海內功名之士矯首跂足奮力戎行不數年擢封圻建麾節佩金印斗大者比比而是先生惓懷桑梓不忍輕去其鄉故雖大老詔書良朋勸駕奉諱後里居三十載不復出邑有大事非先生無所適從先生之望重而其年則旣老矣今秋九月欣逢先生暨德配江淑人七秩晉二雙壽之辰里人僉



擬製錦觴屬余爲文以侑爵竊維先生生有至性甫逾齠髻晨昏溫清跬步不離及其長也事廉訪公得其歡心門戶撐持咸推家督人以是稱其孝先生同懷七人文石大令小雲觀察雅卿都督以暨甸南槐卿兩司馬穉雲都督金昆玉季相愛怡怡式好無尤孔懷旣寡人以是稱其友俗情恒多爭競先生恭敬退遜有善不自伐有利不自專人以是稱其讓與人交不輕諾諾必踐人以是稱其信平生嫉惡如仇然里閭有爭端則據理以剖之原情以解之期於和洽而後已人以是稱其直並稱其和先生之生大畧有如此者說者謂孝友根於天性天性厚則生理足是宜壽滿招損謙受益惟讓留其有餘是宜壽且人與人接而情生焉情真者而性摯信也直也和也皆生意也即罔非壽徵也先生之壽也宜哉且先生尤有不可及者世之富人多田足穀坐擁高貲其於族故戚舊之顛連無告者漠然無所動於中先生仁心爲質不忍以己之有餘怱然於人之不足飢者粥之寒者衣之疾者藥之歿者賻之愆期者嫁娶之道路之不便於往來者橋之舟之材之有可造就者詩書而廩餼之凡事之可爲力者莫不毅然爲之又况淑人我絨子佩老益相莊凡先生欲有所爲淑人多贊成之其得力於內助者又若此俗人皆先生不自愛惜金幣以遺子孫而嗣君譜笙廣文高才博學經師人師文孫伯崙茂才聲雋一變諸孫頭角崢嶸並儲

偉器門閭高大操券可期先生與淑人顧而樂之康強逢吉五福咸備天之報施善人不亦厚哉方今時事多艱朝廷舉行新政議籌鉅款權皆係於農部非有深悉天下之戶口財賦民生利病度支贏縮者不能用給而不擾於民先生諳練老成雖年逾古稀精神矍鑠一旦大臣保荐東山復起霖雨蒼生與猶子壽臣比部鏘珊老前輩輔翼中興若廣之有受安之有立上繼廉訪公之盛績而吾鄉山水爲生色邦家之光抑亦閭里之榮也書此以祝期頤先生庶幾捧腹軒渠滿引一觴也乎謹序

李作廷先生七秩晉一壽序代陳荔秋作

昔人論官其尤關天下政教之源者宰相而外曰州縣曰校官州縣親民實兼六部之職其權與宰相等學校爲宰相百執事所從出之途校官職司勸課有扶世育材之責而正人心睦民族更匡州縣之所不逮然則師儒之重雖謂過於宰相也亦宜吾鄉李作廷先生少嗜學以茂才援例爲校官司鐸會同勸於課士先品學後文藝多士翕然宗之倡修學宮建尊經閣遷明倫堂邑令張與諸紳歧意見事多牽制生先和解之鳩工庀材成之不日文教大興其任陵水也黎民盜牛邑紳乞官兵剿之黎抗拒幾成大衅先生親至黎峒諭黎民還所盜事遂息邑有書院缺膏火紳士議抽船規充之邑令鄧弗從官紳



不睦 先生排解如在會同時而且捐俸薪創賓興士林德之任開平數閱月得代卽行諸生扳轅同僚  
祖道未嘗不惜先生之去而共嘆其賢也 先生其真能勤勸課扶世育材以正人心睦民族而匡州縣  
之所不逮者哉余與 先生居同里稔悉 先生少孤奉 吳太恭人教與諸弟際廷署正友愛怡怡比  
長居官一事一言動遵母誡躬遇 覃恩請封贈喜動顏色家居坦然樂易與人交不設城府無機械心  
家本素封約於自奉服食無異寒素有祠嘗甚薄 先生樽節壘積卒建祠堂跂翼奐輪牲醴豐腆宗族  
稱焉淑配 白孺人踰勉同心相夫子明詩習禮譽播九妯 先生早歲艱於得嗣逾五旬舉丈夫子女  
頭角崢嶸咸推英物充閭跨灶操券可求諸壻多材門楣稱盛天之報施善人詎有貳歟今十月望爲

先生七秩晉一壽辰官紳製錦稱觴徵余言以侑爵余聞百年旦暮也二至晝夜之晷皆不過七十故生  
七十者古以爲稀然鐵勒之書有最高暑焉晝幾百分夜幾百分陰陽之純也 先生秉清剛之質貌溫  
以肅神凝以和陰陽之純氣備矣其得壽豈在尋常意量中哉余忝長 先生四歲而視茫髮蒼筋力疲  
薺 先生眉髮漆黑一如壯年神明不衰步履逾健太史公傳儒林曰伏生年九十餘爲尙書師弟子爲  
博士者十餘人申公八十餘爲魯詩師弟子自遠方至者千餘人轅固生年九十餘爲齊詩師齊人以詩

顯者皆其弟子也漢人重師法而史紀經師者必兼及其年齒豈師必以年重哉蓋惟精神龐固斯經術  
湛深以是爲齒德兼尊自然之符應也今 先生矍鑠依然孳孳好學他日者 朝廷修祀割饋肅憲老  
乞言之禮蒲輪下徵行且奪中轅之席而豈余所敢望哉余未獲登 先生之堂謹以師儒之重匡州縣  
之所不逮者相引重而以中公伏生轅固生之耄耄期頤爲 先生芬也 先生見之計必逌然滿引一  
觴也乎

李際廷先生六秩晉一雙序

代陳荔秋作

高涼擅山水之秀吾邑尤稱福地焉百有餘年兵革不加井里無恙文翁之秀氣極浦之支流代有福人  
徜徉其間若陶朱之家五湖李愿之隱盤谷富貴壽考一身兼之果何修而得此哉 光祿署正李君際  
廷邑之嶺博鄉人也 尊甫秩圃贈公兄疾焚香禱天願以身代竟償其志卒年三十有一伯叔父育圃  
穆圃兩先生均以孝悌聞於鄉修撰林公與之游述其友弟恭兄之誼爲薄俗勸又製爲文書之屏以壽  
之以爲兩 先生太和之氣發爲嘉祥宜爾子孫昌而熾壽而富迄今讀者猶津津齒頰油然生其孝悌  
之心矧 君之親承其教目覩怡怡兄弟之家法者哉今年秋余備員京師吾鄉之試京兆者紛紛來謁

謂今九月爲 君與其配 鍾恭六旬雙壽邑人相與製錦稱觴而乞余一言邇來簡書勞鞅筆硯荒廢桑梓濶別於吾鄉士大夫爲人行事慨弗得其詳余文鳥足以重 君乃感鄉人之意不欲泯君之善而遂不獲已於言也夫人生擁千金之貲幼失二南之訓雖有賢母畫荻丸熊而督責之嚴萬不能行之外苟其忘親自便則凡飲食游戲之徵逐狗馬聲色之嗜好皆足以斲其身而蕩其家 君之少也奉母太恭人如嚴師一出而必告一返而必面遵孟母斷機之教志曾子嚙指之痛恭敬撙節屋潤而體胖日就豐厚太恭人好施樂善取攜得以裕如侍親足疾躬調湯藥十餘寒暑弗少間旣而龍章鳳詔光賁九原於是乎知 君之爲孝子也又嘗考之史書所載孝子何在蔑有而悌弟之見者寥寥誠以兄弟者氣本相同而分不甚相遠又或少而嬉戲狎而忘其尊長而昏娶疏而間其親骨肉之間善處爲難角弓偏反詩人所以三致意也 君與 令兄光簿髫年友愛式好無尤姜被田荆迄白首如一日非無讒言偶間而萋菲之口不足傷其鄂讎之情親愛有加手足彌摯於是乎知 君之爲悌弟也余距 君鄉不甘餘里家居時習聞 君輕財好義重道崇儒與尋常田舍翁吝嗇刻薄者相去有若南北萬里之背而疾馳歲荒者減其租鄰饑者貸之粟園丁佃戶待舉火者恒數十家雖施不必徧求不盡給未免反資人怨訕

之端而不知博濟之名仁聖尤歎端木氏問鄉人皆好之皆惡之何如孔子皆以爲未可誠以善者好不善者惡古今之公論也悠悠之口無足是非 君之爲人不又從可知哉 恭人產自名門善相夫子蘋藻能齋筭加式度姑嫜稱其淑臧獲感其仁一門常覺其春和六族咸分其冬愛誠閨門之懿範抑巾幗之美談也用能生子惟賢誠女以順兩男三婿均負時名明詩習禮雖未青錢中選而珠光劍氣必將上騰或天驥之呈材或驊駟之開道異日者掇巍科登顯仕翱翔臺省黼黻隆平 君夫婦乃親見之黃髮皤皤期頤偕老拜 九重之恩命慶八座之起居中心祝之不止左券操之也乎余老矣無所建白有負聖朝特達之知而又欲圖報 天恩不獲歸里優游與福地福人共享林泉之樂行自愧矣海天萬里引領爲勞遙想此時金母木公瑤池高會群仙畢至進安期之棗享曼倩之桃 令兄光簿先生效東坡以梅檀杖祝子由生日綿綿鶴算彬彬雁行梓里之人交口競羨亦以修撰林公所稱太和之氣發爲嘉祥宜爾子孫昌而熾壽而富者爲 君頌之也余不敏不敢自比林公而 君實能繼先人之盛事南雲可望謹臨風而獻一觴云

呈請勘災委員轉呈大憲賑恤稟

爲災重慮深歎艱費鉅呈請轉稟代籲憲恩以紓民困而靖地方事竊本年六月廿五日吳川非常風災爲數百年所未見蒙上憲迅發公帑委仁廉馳勘賑恤數萬災黎懽聲雷動紳等私心竊喜國家得賢大吏民瘼關心如飢溺之由已不以海濱小邑鄙夷其民電速星馳哀鴻安集感激難名其被災情形仁廉昕夕目擊當在洞鑒之中無庸贅述而紳等所深慮者固在民困之未蘇尤在地方之未靖此次被災貧民爲數較衆車薪杯水徧給爲難疾苦流離目不忍觀至颶風災後文武衙署寸棟無存監獄羈所夷爲平地官吏寄居於破廟胥役露宿於通衢縱有良材何從措手况去年匪黨遺患猶伏於蕭牆今歲飢氓救死自輕其腰領成群結隊白晝橫行萬一乘機倡亂肆刦閭閻禦之鄉則已盡撤藩籬送之官則苦無地監禁能保不由小而大釀成厲階耶現在亟議籌費重圖興建而連年辦匪公款提用無餘邑中向無鉅商大賈所稱殷戶不過租田質肆兩宗飢饉一來租田不免賠糧質肆動多折本昨經大水隄壩全傾兼以狂飈垣墉半毀禾稼逐波濤而去布帛憂霉濕之蒸昔富今貧方深焦急人窮財盡莫可如何紳等並以病軀久辭局務謝迹城市養拙林泉然魯女不夫素性但知愛國杞人無識愚忱尙切憂天痛思桑梓之艱難企望芻蕘之採擇伏念方今兵餉支絀朝廷宵旰憂勞叢爾吳川誠不敢動靡國帑惟粵東好



義成風近時尤盛上年順直山東江蘇湖南各省賑災粵省官民助欸纍纍鉅萬吳川著名貧瘠亦皆踴躍捐輸今痛切膚迫求援手爲此歷情具呈伏乞轉稟大憲代籲恩施俯准飭行各屬好義官紳妥議章程勸捐助賑衆擎易舉挹彼注茲立解倒懸藉蘇涸澈俾免一夫之不獲庶幾百廢之具興民困咸紓地方永靖合邑戴德靡涯矣

致陳孝廉逸珊函

濶別逾年積思如晦夏初旌過境未及趨迎歉仄無已仙帥當代名卿氣節文章夙爲文正公所推重今來開府政教一新粵東一路福星爲閣下卅年之舊雨珠聯璧合幕府談酣誠有如香翁所云民生利病知無不言言無不盡者吾粵瘡痍庶有瘳乎弟少不自量好談經濟有許身稷契之愚閱歷漸深始知胸中抱負紙上空談實無一可見諸施行者因思逖迹林泉以自藏其拙癸未南還十四寒暑不出高州一步關意園池臺花木視吾兄 耜廬具體而微添置書籍八千餘卷昕夕寢饋其中著述自娛借消暇日詎天不予畀風伯所過一掃而空舊稿叢殘慨歸流水昔有百城之擁今無一枝之棲安命聽天猶堪排遣所難堪者敝邑春間米珠薪桂民不聊生鬻女棄男道殣相望方幸早熟頗稔稍定人心不圖六月

廿五日非常風災爲百數十年所未有萬家蕩析露處啼飢大憲迅派委員勘災賑恤備言仙帥聞災爲之下淚食不能飽足見大臣關心民瘼如疾痛之在身災黎感激涕零望風類首惟此次被災貧民爲數較衆車薪杯水尙費綢繆而衙署監羈修建刻不容緩蓋無衙署則官吏無所憑藉無監羈則盜賊無所忌憚現在坡頭龍頭嶺各鄉已有劫案履霜之漸更所深憂無如費鉅款艱人窮財盡官紳束手莫可如何香翁與弟辭局家居而杞憂未已籌商再四惟有籲乞大憲飭屬勸捐挹彼注茲庶堪濟急或者謂上年順直山東江蘇各省賑捐動多災連數郡疆吏奏准各省踴躍捐輸故能響應吳川一隅誠何敢望不知敝邑所籌無待此也粵東好義之風近今爲盛無論諸善堂終年施濟累萬盈千廣肇潮韶諸屬素稱富庶樂善者多揮金易易卽敝邑著名貧瘠重以饑歲今春湖南災賑猶勉捐數百金此無他惻隱之心人皆有之救災恤鄰不欲讓人獨爲君子耳誠得大力者登高一呼則衆擎易舉千樹僅分一葉涓滴卽成江河無煩靡帑於國家不必乞貲於鄰省私心竊計事或可行曾與香翁聯名具呈委員乞其轉稟成大令認真查勘徧歷窮鄉目擊情形同深焦灼業允回省代達矣因念閣下當年隨侍生長吳陽憶童時之釣游視此邦如桑梓且與弟兩人多年至好關愛逾深特抄原稟呈覽敢求婉達仙帥採及芻蕘數萬



哀鴻嗷嗷待命倘蒙俯准一切賑恤章程分別極貧次貧災輕災重杜冒領之弊嚴中飽之防大憲卓見權衡委員實心經理則貧氓自沾定惠餓殍重慶更生其造福於敝邑者當無涯涘也濡毫翹切無任主臣

致鄭明府宗山函

殷拳握手重聚平原十日之歡企盼綦切敬啓者十九年前 令兄幼惺觀察來游意園相見甚歡粉壁題詩花木生色弟著意園隨筆十卷充爲鑒定以匆匆言別未及繕呈 令姪及第大喜稽康性懶未賞修函奉賀抱歉之至聞 令兄榮官蘇省不審已得缺否念念弟繕集海山詩話二十卷恭錄 年伯大人暨 令兄觀察佳篇已成稿本丙申六月颶風洪濤意園盪爲平地圖書花木並此稿盡付東流今日思之遺忘強半學堂改制英雋專講西學誠恐十年以後子弟不知詩學不辨四聲風雅淪亡二千年來無此恨事擬重集舊稿付梓以諗同志 年伯大著原本遭風已失幼翁詩集想已刊行 閣下著撰宏富佳什必多久以未見爲憾務乞彙檢寄示俾得擷取精華借光梨棗至清鄉事宜弟不干預有携名片私函投遞者便是僞託尙祈 察鑒爲荷

江華甫郎中令堂何太夫人七秩晉一壽序

石城吾鄉接壤士夫燕集親串過從往往僂指女宗侈談母範藍田生玉知振跋之賢絳幔傳經述宣文之教其足嗣音青史媲美彤徽者僉稱江母何太夫人今冬十有一月欣逢設悅令辰侍郎錢塘汪公自都門郵文壽之吾郡人相約登堂稱觴鞠膺三千珠履合桑梓之名流一曲紫雲振琅璈之逸響上揚護頌下索蕪言夫姁娥靈藥之奇王母蟠桃之瑞大都搜羅神異附會仙真飾遐象以揆張呈虛詞而修禊衍曼無紀欺瞞不讎請臚耳熟之芳型用侑手仇之康爵可乎太夫人玉勝徵祥金拔呈巧性成婉婉幻羌習夫禮儀度協莊姝長更兼夫蓉德當文通悼室之日正德曜及笄之年炙酒炮羊曾享安東獵騎天吳紫鳳早傳洛下鍼神我莘野駕部先生以鴛牒之重聯爲麟膠之再續鏡臺聘下良匹訂以晉秦油壁迎將彼都謂之尹姑固以獲婦而歌得寶入門而相慶齊眉矣無何而琴瑟初調驪駒忽奏藁玷山上勗夫婚之功名藥碗床前問君姑之寢疾衣不解帶妝懶窺奩或謂繡襦方新宜兼修飾或憐玉肌素弱勸節勞劬太夫人則跬步弗離扶持加謹秤薪量水心默禱於靈醫滌膈浣裙役代供夫石建洎乎倚閭望斷陟屺歸遲去纒雲髻雪色共麻衣並映夷衾牆翬珠光與米貝齊含娣姒咸服其周詳親戚來觀而感

嘆非孝本肫誠才兼明敏者而能若是歟旣而莘野先生舉孝廉高科應郎官列宿胸中兵甲恰分武庫之曹輩下公卿爭致平津之館徒以公車報罷遽賦歸來同輩因下第而羞舉朝爲蒼生而惜不知家園偕隱勝於黻佩之榮也鄉里行仁無非雨霖之慶也先生解紛排難希魯仲連之風重義輕財慕裴使君之節是以全帛數千斛粟散輒無餘鄭太五百頃田食恒不足而且開廣廈以庇寒士修橋梁以便行人不惜揮斥萬金利賴百世太夫人同心黽勉協力勸凡立趙士之遺孤濟曼卿之大事炊黔敖之粥贈公瑾之困莫不贊自閨闈之簪珥遂使六嫔飫德並戴嵩高九族騰歡都沾河潤可謂坤德無吝嗇之占女流有丈夫之氣者矣且夫伯奇之操怨寄於履霜義荒之符深戒於未雨自古蘆花之畔每生芥蒂之心太夫人撫孝讓過於所生愛方進一如己出爲兒治挖禿流血無嫌嫁女備裝奩送資甚盛所尤難者父伯早塲敬姜幾毀蝨癭結腹呼菩薩而喊嘶鷄骨支床夢鑿婉而涕溢專心之養姑母似之安寢之私伯魚媿之兼之相本宜男慈能召福同懷七子不忒乎鳩鳩繞膝群兒已知爲騏驎鴻按重相莊之色熊丸參互課之功雖白玉樓成少微遽隕而懷清臺築巴姑逾貞傾箱以購異書斷織而警廢學由是丹丞碧檢人推仲逞之家金友玉昆時擅公衡之譽龍文才薈鳳誥恩濃以子華甫三品銜郎中晉封一品太

夫人孔德孝廉旋舉戊子解試科名累葉簪笏一門閭里之榮罕與倫比猗歟盛矣我聖朝崇尚儒林昌明經學海內鴻博之士文苑之英類皆待詔石渠校書天祿駕部先生珠貫百氏輦分九流洵稱著作之才未竟研經之業賁志以歿聞者憾之孝廉綽有父風况承母教董子好學不窺廣川之園康成解經遽奪季長之席童牙早驚乎老宿萬里遙跨乎中原猶復兄弟切磋晨宵攷核義通勾股窮天地之奇觀法溯周髀究中西之統學他日者與綦脩備顧問通經致用錫類推恩太夫人不且與金日磾之母象繪於畫圖張齊賢之親詔褒其福壽也哉茲者鄴晉古稀序經長至蘭膳潔南陔之養萊衣開北海之樽蠟鳳含飴盡是瑤環瑜珥乘龍坦腹無非鵲雀麒麟余誼託葭莖心儀松柏據經山之舊典祝壽母之遐齡詞不取諛事惟徵實九五福康寧好德洪範陳算子之疇萬千歲者艾熾昌燕喜誦奚斯之作是爲序

江華郎中令堂何太夫人八秩晉一壽序

光緒己丑冬十有一月石城江母何太夫人懸悅令辰郡中名流製錦書屏麟集麕至偕祝嘏於同園副憲陳公荔秋攜詞侑爵錢塘侍郎汪公自都門郵文以壽之維時六琯葭吹十洲桃獻芝泥五色參太史之鴻篇香露滿身浣夫人之象服雲璈四應珠履羣趨鞠騰登堂躬陪盛會忽忽十年於茲矣歲閱著雍

節更長至太夫人慶開八豔壽星再見重庶燕喜之章愛日方長遠索鰥生之序不辭謏陋敬獻微言太夫人裔出廬江祥徵鑑水奉女箴爲璜佩嫻姆教於瑩絲我莘野先生慕德曜之賢聲成東萊之博議么絃復奏扶牀之兒女無猜百兩初迎入門而婢媼皆喜迺能代供子職曲譜姑恩持藥裹以親量望藁砧而未返始則浣裙滌胸喋躑勤劬繼則囊殼含珠經營妥貼固來觀所共歎在新婦爲尤難是真大事足當而孝思維則者矣且夫美意者延年之券也厚德載福之基也文泰以親串過從兼紀羣交誼稔悉莘野先生利濟爲心義形於色蔡端明之橋兩翼惠繼國僑魯子敬之粟千囷急關公瑾他如脫驂以贖罪糞溺以賑飢還宅以恤嫠燔契以免累靡不田稱續命春借噓枯太夫人跼勉同心無違夫子梅蘇韭菹必徧及乎鄉鄰遠色疾言從不施之臧獲僕婦某私竊置暗陬太夫人佯爲不知掩蓋如故有盜敗露羣發其奸一笑置之竟不復問夫竊張公之銀器熟視不欲指名盜柳氏之金杯乾笑以爲羽化名賢雅量巾幗婢之非存心忠厚者能若是乎自昔秦姬男教七子佩其韋絃君謨母儀九重寵以冠帔先生旣官武部旋歸山道太夫人指授楹書綜理家政牙籤錦軸功兀兀以窮年赤仄黃標業隆隆於曩日以次君華甫郎中覃恩晉秩誥封一品夫人漢卜式之助邊特邀曠典金日磾之繪像待沛殊榮雖矯矯八龍已



少儉緼靖肅而英英四傑無非瑜珥瑤環孔德孝廉以經師而作人師非此母不生此子祥麟一角威鳳九苞玉季金昆其尤著焉者也莘野先生自重科名湛深經術孝廉傳青箱之業殺核百家聆絳幔之談笙簧六籍故能起何休之廢疾詡鄭氏之功臣而孝廉詰嗣璘如茂才任延聖童蘇瓌有子必致千里名動一州行登學海之堂終奪經神之席祖孫父子輝映後先我朝三世以經學鳴者海內厥惟四家若安溪李氏長洲惠氏高郵王氏嘉定錢氏今得石城江氏且五之矣桑梓之榮萱蘇之慶也已同園摩詰輞川瑯環福地鄰壘猗突烽燧無驚邊海鯨呿波瀾不起倚喬松之茂悅報慈竹之平安芙堂石莊幼章群季翩翩皆經濟才也與孝廉樂重天倫怡怡偕隱舞衣戲綵養志承顏太夫人白髮含飴康強逢吉其遐福豈有艾歟今者華筵輓設仙樂匏宣酌北斗之鴛漿潔南陔之蘭膳群賢畢至三雅頻催謹綴蕪辭用酬來旨兩度天孫雲錦親裁一品之衣卅年王母霞觴預祝百齡之算

張鳳翔封翁七十雙壽序

代陳荔秋作

今上御極之九年江右張公縵卿自雷州守量移吾郡壽星再見卿月在霄野無刁斗之聲家有絃歌之樂喜換鄰封之尹賞快瞻膝下之老萊當公堂酌兕之時正燕寢齊舉之日以明年正月爲鳳翔封翁暨

陳太夫人七十壽辰合白叟黃童祝木公金女將以助太守稱觴禮也窮維封翁好生厯念嬾曹武惠之  
慈祥惜福存心享郭汾陽之富貴若徒誇鸞鶴松鳬之譽極岡陵嵩華之辭粉飾雲屏鋪張絲算曼延無  
紀頽顛不售若封翁者其始德門之必昌仁者之可壽乎封翁豫章將才清河望族童牙孤露嘗潤跡於  
屠沽壯志干霄早究心於鈐錄操奇贏而宗兵法歷山川而識陣圖故能變化六韜縱橫七萃道光二十  
一年夷氛四起海水群飛靖逆將軍奉督師之命道由江浙行抵粵東募士貴爲前鋒屈須陀於裨將封  
翁心雄敵愾義切同仇助楊侯而霹靂齊鳴攻武律則艤舳盡靡發虎門之礮巨鐵甲波沈轟鷁首之輪  
摧紅毛氣沮蓋是時年方逾冠也旣而功成受賞凱撒言旋以外委充撫轅巡捕隰罔號夷吾之舌石洪  
受烏公之羅幕府久棲干城待寄威豐五年髮匪竄擾江西中丞張文毅公帥許遠於睢陽禦朝宗於城  
下封翁囊鞬左右甲冑旣昏取大旗而考叔先登着六矢而萬春不動迴知勁草特借長材岳家五百之  
軍撼山猶易益德萬人之敵拒賊何憂卒之城幾陷而復完陣無堅而不破地雷騰餒唐滕土之閣依然  
天雨洗兵徐孺子之亭無恙寇之退也封翁之功也天子未識真卿之狀首褒光弼之勞以千把越保選  
授山東梁州都司留署武寧都司水大鱗舒風高翮健山中草木知萬福之威名壇下貔貅聽韓侯之號



令於焉修築雉堞斬刈駝荆誅亂而虎負常攫賑飢而鵠形悉改戚南唐之練卒操演鴛鴦鄭監門之流  
民招集鴻雁固已擠將軍爲大樹恃道濟若長城矣無何石逆煽燄武寧戒嚴以十萬之黃巾困孤軍於  
黑子封翁從容應敵慷慨登陴嚴鐵牡之關肅銀刀之隊業八戰而八克廼九拒而九攻奈銅馬之勢張  
腹背受敵望紙鳶而信斷內外無援猶復振臂而呼裂眚相向奇計射尹錡之目稍快人心力戰洞公縣  
之胸共驚神勇師雖潰矣績逾偉焉督師曾文正公喜馬援之生還諒孟明之無罪觀其後效畀以中權  
委帶潮勇及贛軍駐營城外迺值甘凌門忿渾溶爭功駭白刃之交馳患赤眉之暗伺方搆二撼趙魏操  
戈必致兩傷藹廉避面封翁獨維大局預定先機解鷁蚌之持漁人何利釋蠻觸之鬥蝸國無猜繇此竟  
軍彈章頗受李陵之累未幾忽來荐剗終酬鮑叔之知封翁七縱七擒再接再勵驅健兒而竊追黔虜挫  
么麼而屢復名城維時風鶴四郊群慶謝安起用乃者蒞鯢千里遽聞張翰歸來猗歟高矣且夫挽五石  
之弓不必能知字義也封萬里之侯自來尠衍書香也文通武達兼之實難封翁呂蒙治經卻縠說禮輕  
裘緩帶希羊祜之風流雅歌投壺通祭遵之儒術而又聿開堂構善裕箕裘寶氏桂香王家槐茂長君則  
樞垣儔值次君則府佐翺翔而我縵卿太守拔萃早登循良卓著委寇公於河內稱召父於南陽伯起揮

金屏絕苞苴之獻昌黎荐士毫無關節之通於是寒士歡顏豪強歛跡民情願依夫愛日天庥以兆夫豐年非封翁明德之貽義方之訓能如是乎德配陳太夫人綱直表躬莊姝合度柔嫺慈孝出自性成言德容工不從人授其相封翁也自行伍以至副將甘苦與共操作不辭義漿仁粟以助藥砧典珥質釵而犒士卒仲卿佳士豈歎困於牛衣世忠夫人寔勸勞於桴鼓而又熊丸佐讀畫荻陳書雖同鄒女不煩徙宅之勤甫授雷池竊慕封鮮之意宜其輝增翟茆寵疊龍章比桓孟而逾榮較郝鍾而倍勝矣彬譯署趨公諫垣逐隊家督雖通乎縞紵使君遠荷其帡幪試問戰功稔柳營之名諫逃聽輿論適梓里之書來天錫昌辰入開壽域金臺雪滿揮毫當長至之初鑑水春移介酒值元宵之後是日也歲星與福星並耀文露與武露齊濃釀九穗之穀以爲醪裁七襄之雲以爲錦堂集珥彤之士衢偕擊壤之農百福登屏三雅晉爵封翁其將移旆黃堂與太夫人共進一觴乎他日者荷九重之特恩臻百齡之雙壽彬又且爲封翁遙祝之矣

### 送蘇邑侯雨滋序

雨滋邑侯權篆吳陽善政得民寔心任事獄平兩造消積案之如山臺凜四知撫空囊而似水關狂榛之

風氣通蛟鱷之性情聯絡邦交振興商業召伯舍留南國愛種樹者萬家蘇公堤繞西湖課墾田者千畝  
園扉草滿赭衣皆執藝之工旂館燈孤薰面少對床之客從此村無吠犬俗盡敦龐凡皆侯之德政在吳  
川彰彰者也今者及瓜受代折柳瀕行兒童臥轍而難留父老攀轅而無計去思碑勒同深心版之銘記  
念牌懸願附頭銜之列是爲引

陳荔秋侍郎在籍身故請縣轉詳文

爲二品大員在籍身故謹牘事實聯乞具詳請奏事竊紳等同邑二品頂戴前任左副都御史陳克敦孝  
友夙抱公忠學有本源任勝艱鉅溯自優行入貢奮迹蓬瀛試元老之師千獻書生之奇策赤囊告捷翠  
羽增榮洎改秩曹尤精自檢倣裝歸省適遭風木之憂讀禮授徒忽報萑苻之警立功桑梓保危城者九  
十旬銜命梯航通遠道者四萬里旣星槎之再駕旋風憲之游升訖聲教於墨洲峻丰裁於烏府中外交  
涉合德俄美法而悉酌機宜文武兼資慕曾左沈彭而願同志趣鷄未鳴而星見早促趨朝馬旣瘖而日  
晡不遑退食因而積勞成疾乞假養疴猶思調攝復元再圖報稱每談時事終日歎歎夜不成眠食弗下  
咽去歲日人肇衅憂憤彌加病勢日增於十二月十四日身故維時土匪竊發風鶴頻驚未及呈請仁廉

具詳轉報今將逾載全境肅清紳等追念先型感懷偉績或躬隨使節深知愛國之肫誠或久侍公車熟聞立朝之梗概見聞較確非但得之流傳功德難忘未忍聽其湮沒理合臚陳事實開具清冊聯乞詳請大憲據情具奏鴻施逾格出自天恩感德無既

集會求助序

蓋聞程堅磨鏡不受人施倪寬賣刀亦能自樂又何必對牛衣而歎懷魚鉢之彈哉然而避債無臺世異周家之八百點金乏術人非仙界之三千則當無聊之思輒作奈何之喚或者幸逢知己見憫呼庚笑絕我之方兄賦助予之將伯欲堅素守敢望青垂泰地無立錫田惟耕硯每借東家之潤以博北堂之歡固已萱草忘憂筆花尋蔓矣茲乃莫懸絳帳共與青燈到門無門字之車下帷籌讀書之策才非司馬敢期賦賣千金腹異朱詹漫學帑吞一卷秦少遊三年京國感送米於錢公穎考叔半世封人喜分甕於鄭伯伏望諸公梓桑垂念瓜葛關情或道北聞歌而生憐小阮或堂西得句而夢到阿連分糴米于大倉濟枯魚于涸轍是則千張狐腋便是輕裘一滴楊枝都成甘露從此釀錢作會無殊續命還丹庶幾菽水常供詩自懷乎華黍芸田無病學可免乎荒蕪他日幸叨寸進定擬銜環縱素守清貧亦當反璧到處作口碑

之載終身切心服之銘擬雁塔之新題愛此芳名高署等龍門之勝會看誰奪錦掄標是爲序

### 辭吳陽總局稟

爲稟乞辭同事竊紳一介儒生廿年鄉舉出山無遠志早淡功名挿架有奇書夙耽著述上年法越構衅

海疆戒嚴義切同仇倡辦團練廼始附名總局嗣後纂修縣府志重修文廟改建三忠節孝祠創印金局

築新村江堤始終從公幸無隕越前以查辦保甲微勞道憲李請督撫憲給匾旌閭祇領之餘倍深感激

倭夷煽亂奉憲札飭辦防團募族勇三百名自爲一營號三柏西礮台海防團勇訓練成軍以圖報効會

土匪龐培正龐殺人得等嘯聚連尋村圖迫縣城佔踞梅菜紳隨李前主商議攻守奔走年餘餉竭兵單

焦勞萬狀幸殲群醜轉危爲安惟紳以孱弱之軀荷難鉅之任用心太過遇事輒忘恐竭蹶誤公有妨大

局况生平持論過激良朋或結怨於睚眦嫉惡太嚴宵小或造謠於風影問心無愧引退爲宜現土匪肅

清倭夷議撫仁廉製錦良才彈丸小試麗空瞰日難容熠燿之光徧野甘霖詎借桔槔之力爲此縷陳下

情乞准辭退局務俾安調攝借遠嫌疑仰屋著書杜門謝客久荒筆硯續成揮塵之間談試聽絃歌重錄

### 割雞之治譜



重修乾塘陳氏大宗李族舉祭文

維公太邱賢裔宋代明經紹元宰之清芬負師儒之重望春風時雨有朋占兌澤之孚長水高山得地擅乾塘之勝瓜綿椒衍鳳起蛟騰破海外之天荒冠吳陽之族大星槎使歐米墨洲抒向化之忱雲纁鋪登藻紫閣荷易名之典文通武達俎豆馨香泰等景仰典型情聯洽比當松桷重新之日正蘋蘩恪荐之時喜聞鐘鼓覩廣廈而歡心敬肅衣冠望芳筵而頰首敬陳不腆用展微忱

重修霞街林氏大宗李族舉祭文

惟公轍人衍緒宗學明經德既厚而流必光根既深而葉益茂名登魁榜紀膝下之郊祁質蔭孫枝接心源於洙泗今日試經僮耳聲教尙訖冰天歷朝徧敷狀頭姓氏並雄嶺海際此重修寢廟咸恪荐以馨香某等景仰典型情深鞠膳當春風之披拂筵几常新快暖日之融和衣冠致肅天半朱霞萬文藉增桑梓之輝樽前綠酒數行敬獻葡萄之露虔告尙饗

重修李氏鄉賢二世極浦祖祠林族舉祭文

代作

惟公士林領袖道統傳人德雖隱而彌彰學既優而弗仕亭開極浦林泉老著述之身饗配尼山俎豆隆

馨香之報典型尙在奕濯彌昌某等誼同桑梓戚托葭莩瞻堂構之重新聯衣冠而肅拜看門外高山長水先生尙有遺風卜樽前藻潔芹香此日虔昭肸鬯聿修祀典用展微忱

祭李吉甫先生文代合族作

豐城之劍縱沉埋而必光龍門之桐經摧折而猶惜當夫玉棺遽下箕尾新騎鵬鳥日斜杜鵑月冷天地黯而無色道途盡爲傷心而况葛底同根椒蕃一族乎我吉甫公生初卓犖長更瓌奇以倚馬之才華兼元龍之意氣固宜強臺直上羽冠高翔乃僅舉茂才之科供廣文之職秋風刷羽春夢愴懷劉蕡罷歸巫陽隨遣嗚呼痛哉君子族人仲淹義田之仁老泉祠堂之禮魯連解紛之智馬援垂誠之義老成之所商榷後生之所矜式一旦梁木壞而哲人萎則吾將安放耶嗚呼痛哉雖然竊有慰焉君以辛酉歲官仁化丁卯調任崖州十年之間浮沉宦海歷蠻邦之水土嘗瘴海之風波竟能履險如夷帆歸無恙考終正寢得托首邱子孫振振親視寒飯亦足見天之報施善人也今日者飄飄丹旆淒涼蒿里之燈閃閃銘旌悲咽薤露之曲君旣生順死安無餘憾矣我族人嘆風流之旣謝望顏色以無從極浦天寒吳江楓落東中山之免穎難寫哀忱決東海之洪波未方別淚謹以柔毛剛鬣絮酒瓣香奠一滴于九泉抒寸衷于尺



幅嗚呼幽明路隔值風霾雨晦之天慟淚同聲是鶴唳猿啼之地君靈如在鑒此微誠

祭林芾南殿撰文代李楹材作

嗚呼公之科名廷對第一公之壽考八十有七公其康強子孫逢吉公考終命本攸好德既全五福天報不忒胡不百歲天意難測問言衣鉢替人未得函丈淒涼薦蘿於邑痛澈於心淚滋於筆眉日已百維哭將卒始獲成文縷陳悲臆嗚呼我公魯國靈光丁年孝友嘖嘖於鄉耄頭風度鸞掖文章詞臣之冠史臣之良及其重出使玉尺才量自彼關中至於伊涼得人稱最奇士爭翔亦越歸田絳帳風長遠而端溪近則吳陽誘人稱善至今不忘嗚呼今世士夫好爲奔競或據要津或謀捷徑有隙皆鑽無媒亦進公曰不然得之有命春夢防醒夏畦戒病公之故人秉鈞輔政公狎鷗閒懶通雁訊公之門生司農拜命公傲嵩雲白雲持贈景行逋仙追縱陶令人情所難公識素定今世士夫不講廉隅終年在籍交遍當途官燭宵爓衙鼓晨趨飽填谿壑潛進苞苴公力挽之未老懸車或賢有司禮於其廬期期吃吃相對胡盧不言公事遑及私圖無適無莫誰毀誰譽爭墩無謂公哂其迂尋隙無已公戒其愚子弟化之城府胥無或者謂公奸近乎禪花留佛供詩共僧聯或書貝葉或記金蓮倘其前世面壁有緣如王陽明如蘇子瞻管見窺

之竊謂不然蓋公學問有托而傳光明見道其智無邊慈悲愛物其人無偏豈務清淨獨示莊嚴從來仙佛不外聖賢嗚呼公在熙朝爲名狀元熙朝狀元耄耋幾人乾隆丁巳王公惺園癸丑繼者潘公芝軒公寔比之將屆九旬惟莊文敬與公同年青宮納誨黃閣宣勤語多秘密外弗得聞盛德大猷莫得而言恭承丹詔褒爲純臣公寔同之弼弼恂恂要其風節鄙薄寬敦一隱一見一亨一屯皆爲入瑞並答天恩在郊之鳳在藪之麟公在粵東誰敢躋扳五羊古蹟大庾雄關末年偶應甲首常慙屈指太魁出迥不凡前有滋圃後有斗南公起其中鼎足而三人之望公如斗如山北斗歷歷泰山岩岩每逢盛典公冠其銜每稱前輩公壓其班大比之秋士少餘閒猶爭過從問公容顏述公起居絮絮而談粵若吳川居濱大海通泗橋平翔龍縣在白嶼沙飛赤城霞起鳶降我公光生桑梓福地桃源當年栗里道咸以來烽烟伊邇張角黃巢擄人爲醢寶水羅江殺人如豕吳川彈丸不加一矢維公福人優游杖履寇盜豺狼望風而徙雞犬兒童託公之庇廼者颺風非常傾駭山其頽乎木其壞矣吾儕憂公蓋自此始嗚呼哲人其萎文章風度渺不可追時爭奔競誰恥其非士畧廉隅誰正其規聖朝親政公老不遺吾粵新煥公靈不知或疑公在仍復相諮聞之不忍對之何辭公舊游處金蓮菴西花木無恙過則生悲回思親炙以公爲師一朝永

訣見公無期凡百姻婭泣涕漣漣香蕪一瓣酒酹一卮倘鑒哀忱公其歸來哀哉尙饗

### 祭陳眉卿先生文

嗚呼

先生經師人師昊天不弔哲人其萎黃江日薄丹旄風淒井里無色疏戚同悲聞耗號咷心喪涕

洟群命鰥生作爲誄詞雖媿不文其焉敢辭繁惟

先生今之古人惟孝友于式彼君陳愛弟怡怡誠姪

諄諄虛懷若谷和神當春訥言不出矩步是循平居粥粥方訝無能一展千里超群絕倫緬昔吳川科名

鼎盛雁塔鰲頭一時輝映道咸以來鄉榜闕然南風不競幾三十年

先生秋捷報者喧闐驕驕開道幾

輩蟬聯起衰之功

先生有然憶侍

先生聽濤舊院清課吮毫疾書呵硯

先生謂我此邦之彥丹鼎

九成青錢萬選指日騰達無憂貧賤自愧將老畧無表見有負深知猥承厚眷徒感於心尤綴於面乙丑

之春落魄羊城

先生南還憫其鴈零贈之兼金勗以雲程歲越庚午叨賦鹿鳴同舟北上萬里偕行海

天琴思峽月詩情往還半載足感生平

國家盛典舉行大挑王公大臣荐士於朝咸重

先生選名二

等袞袞諸公廣文獨冷

先生安之絕無干請苴蒔供餐蚌蝶對影廿載寒甌味淡而永晚近儒官大都

素食較量錙銖惡聲厲色學校廢弛非其所戚有若秦人視越肥瘠

先生憂之孜孜日昃點竄文藝充

擴器識木蛋向化板搖歸德始自牂牁至於挂陽孝肅故郡昌黎舊疆春風時雨教澤孔長經尊馬鄭道  
出羲皇問字有酒東脩有羊辭之弗得躋彼公堂濟濟多士去思不忘旣調新寧在官最久邦人稱之如  
出一口方期桃李永托門牆豈知天道夢夢茫茫奄然牀簀條爾膏肓謁醫無靈超死無方三百諸生聚  
哭千場蕭條囊橐見者哀傷爭先助貽纍纍盈箱嗚呼 先生宜享期頤胡逾耳順未屆古稀所幸嗣君  
六萬瓊枝齊驅達适方駕郊祁君子有穀孫子是詒鳳毛麟角競爽一時明德之後忠厚之遺文泰在門  
多年睽別魂夢飛馳山川濶絕懸望歸田重來立雪凶問忽傳驚成永訣撫棺一慟失聲淚結銜恩述哀  
筆難罄說敬奠几筵瓣香是熱伏冀來賞卮酒猶熱嗚呼哀哉尙 享

祭曾雪堂軍門文代陳荔秋作

嗚呼大樹秋零寒星夜墜太息將才屢悲聖裔前度劫侯去年沉帥湘水無情峴山有淚惟公獨存播名  
中外桃李成蹊桑梓是衛夫何一朝告終里第行道吞聲登堂雪涕公生岐嶷長更魁梧貧供子職志與  
人殊好談兵法戲摹陣圖自比霍衛暗合孫吳子房圯下老人之書陳平門外長者之車時無英雄我亦  
丈夫燕雀笑之愚乎不愚人亦有言山西出將最爾吳川專閫相望硯州屹然翔龍氣王楊潘劉招騰威

虎帳桓桓武襄豐碑賜塋勇烈洵勇壯果尤壯亦越老彭一方保障公起其間後先比仇咸豐之初髮賊蔓延大江南北全境騷然公亟荷戈每戰必先黃馳戰馬畫鷁師船長江失險高壘無堅奏膚第一獻馘盈千天子曰俞不次爾遷承恩北闕凱歌南還維時嶺西土客構禍釜魚泳湯燈蛾投火遣將綏之俞曰公司公立束裝飛馳巨舸進軍布矛平厥偏頗兵弗露刃腹猶藏筭檻獸網禽纍纍道左旣殲巨魁悉宥么麼廼議安插經營貼妥客民謂公寔再生我高羅大牙路多荆棘金缸雖平餘孽四出曰李阿孃曰王狂七爺突狼奔弱肉強食有兔營窟如虎傳翼公臨賊穴川原變色鉅燿日紅礮轟雲黑一炬焚如狼烽以熄粵東鎖鑰最重北江天子命公作鎮此邦樊噲非伍李廣無雙巾山兀兀湘水淙淙夕嚴刀斗朝擁旌幢豈無毒龍制之卽降亦有妖鳥化之則祥悍卒頑夫歸于敦龐萬里黔邊庭門戶亦醜跳梁敢撐螳斧大吏上言宸居赫怒秉節褫牙發璋徵號公迺徂征歲在庚午唱籌量沙指形聚黍縫革衝礪邛籠非炬破易撥體動若推腐紅旗之捷獻天子所天顏有喜勇號是加維巴圖魯勝曳落河煌煌頭銜有耀自他翠羽翩翩雄冠峨峨右抽左旋後殿前呵弓矢劍佩鳴聲相磨將軍者誰樂毅廉頗古無橫海今有伏波昔郭汾陽單騎見虜觥觥我公方駕於古回逆鴟張鉅矛毒弩勞而無功勝之不武直抵其巢諄諄



誠語羅拜謹呼群來就撫士卒同甘生靈勿苦仁人之言其利誠溥滇西威甯有古山川千丈嶙峋百級  
盤旋關索蹟在諸葛銘傳公兼教養萬口碑鐫絃歌絡繹倉箱溢填愛留福井思深惠泉牙旂獵獵銅鼓  
淵淵公之威德永鎮蠻烟公移古州總齊紀律寬猛相濟繼在能割金革奪情連年墨綬親恩未酬臣力  
是竭控置蔡流拊循甌脫沐雨櫛風臥沙餐雪雞犬夢安猿獼氣奪公歸文武隨所施設朝廷賜公一品  
鸞章鶴頂分紅鵝衣染黃廳然歸去畫錦之堂有時笠屐隴畔徜徉結侶樵漁閒話農桑都忘尊貴慣折  
輩行是翁矍鑠居士清涼急流而退善刀而藏公有至行足風末俗陶侃愛兄老而彌篤誠姪有書貽孫  
有穀一門之內雍雍肅肅伯子俊才玉堂望屬仲號龍媒季推驥足詎讓湘鄉遙遙氏族吾邑之光我公  
之福方今中樞禦侮需人望公復起矯矯虎臣豈徒鄙里排難解紛海水不波邊境無塵遠騎箕尾歿且  
爲神鴛鴦陣散鵲鳩聲聞白馬素車風集雲屯臨文慟哭不知所云余自乞歸寒暑十閱一面無緣竟成  
永訣地近非遙天長此別痛念典型淪喪圭臬丹旄飄揚黃江鳴咽驃騎新營松楸鬱鬱公魂可招公名  
不滅靈其來歆杯酒猶熱哀哉尙享

祭林心畹先生文代陳荔秋作

嗚呼逋仙已矣寂寂孤山鶴去不返梅花自寒乾坤蝸寄人世沙搏絳雲影遠白雪歌殘老成凋謝朋舊  
悲酸一絨在手萬里摧肝頻揮淚雨獨坐洮瀾乃托毫素用寫哀歎嗚呼先生幼生華族天性孝友人言  
嫺陰梨讓孔融橘懷陸績視是傳父書是讀親見狀頭院歸撒燭子舍春融御爐香郁偶出詞句輒驚  
耆宿始貢優行初翔驥足京師首善薈萃文人先生年少累超其群才推館閣學究邱墳詩成五言筆陣  
千軍蘆溝曉月金臺夕曛貯囊珠玉落紙烟雲韓碑柳頌杜骨顏筋一時名噪日下驚聞豈知先生材高  
無兩弱水先回强台阻上屢躡棘園遲登蕊榜明珠見遺珊瑚未網幸脫名輶迺辭塵鞅彭澤官閒太邱  
道廣蛺蝶交飛苕苕自長有校士責無俗吏想區區從化邑遜英精彈丸蕞爾未啓文明先生來止時雨  
歡迎冷署問字高閣尊經若馬季常如鄭康成頓除謗陋漸起科名接踵雁塔擢甲羊城誰寔階之咸稱  
先生亦越瓊南再官儋耳七百年來蘇髯舊址木蝨性馴板搖歌俚芹藻斯馨檳榔逾美自任去留是知  
足止旣遂烏私先生歸矣惟文恭公官情最淡菴拓金蓮門滋碧蘚性命簡編泥塗軒冕克肖所生先生  
無忝跡謝城市交絕貴顯夏午涼消頭科足跣利學展禽狂偕曾點先生於此興復不淺嗚呼彬交先生  
五十餘載胸泯城府量涵滄海玩世詠諧參禪歡喜屢典騷壇久摩詩壘南國嗣興東坡健在子由扶杖



老萊戲綵鼎鼎家門怡怡兄弟一家詞賦風流文采先生冢嗣泮水含英次君飭庠應天府星人間棺下  
天上樓成三君秉鐸嚙指心驚大豪岩遠歸及奠楹季也白眉聲雋一疊下逮孫曾振振繩繩桐枝競茂  
荆樹方榮彬前奉命使美利堅倚裝話別言駕輪船先生最健望如神仙握手大笑謂我獨賢相思兩地  
相望各天何期朝露遽隔重泉衆誅先生乞予一言中心養養此恨繇綿嗚呼巨卿白馬執紼能來喬元  
隻雞奠酒能陪彬依闕下遙指天涯晨星黯淡落月徘徊玉棺不見丹旄空哀楮塗黝墨絮發清醅心香  
熱瓣淚燭凝堆先生有知來鑒一杯尙饗

### 祭鄭夢陔先生文

嗚呼天道好德福祐善良爲善最樂積善必昌惟日不足必有餘慶允矣君子俾壽而康世人無知莫由  
自儆逐利爭名與世奔競曷若寡營優游養性邵德高年樂天知命如夢陔公鄭姻太翁純厚敦篤性本  
由衷識見高遠度量廓充濟人利物有國士風隨父讀書束身名教式於古訓是則是效家學淵源收稽  
古倣定省承歡鄉里稱孝晨夕講誦勵志辛勤每至夜分輒試藝文尤耽詞賦鏤月裁雲溫文大雅卓爾  
不群雖有天資恪遵教導少不好弄夙修雅操務學有獲不隨時好衆人望公期以遠到斗南一老選擇

東床公獨埤腹迴異恒郎修謹自足疎曠何妨青眼賞拔玉潤增光負笈從游瞻仰泰岳善誘循顏苦  
孔卓密荷裁成絲染梓斲遜志時敏德修罔覺公鮮知遇文戰不售偶思小試就職分州依依孺慕爲母  
淹留以德而養亦又何求好購圖書多蒔花竹院落清幽賞心悅目閒散自適不喜征逐治家端嚴交鄰  
和睦端居靜默盡絕浮囂與人接物氣無矜驕謙卑自牧聲聞愈昭胸懷耿耿志趣超超人有爭訟來就  
決判公出片言排紛解難各釋怨尤冰消雲散兩造悅服咸加贊歎人有婚嫁迨吉及期空空妙手莫可  
施爲助聘合卺贈奩結褵人能完娶賴公維持人有營謀欲濟其困將伯難呼代揭書券累數千緡甘而  
不怨公之義行足爲世勸與人普接罔別等倫富貴貧賤一視同仁天乎太忍奪我善人胡不百齡僅可  
七旬公身不顯若有位置天實生之豈曰無意其或施報遲速乃異不昌於身而昌後嗣公之家嗣泰之  
親家手稱三絕腹富五車友天下士滯榜頭花仕爲己貧孝聞人誇廣文領官捧檄而喜海遂之崖春風  
槐市板輿迎養以供甘旨朝發官衙夕至鄉里地旣毗連教由近施廣開峰帳群侍繙帷長善救失辨難  
析疑實堪模範無愧師資公有文孫寒門作婿一見瓊枝許其必貴永期生光爲門楣計豈意髫年先公  
遽逝可憐小女嗚咽啼鵲涕淚交下性命欲捐妯娌相勸勉力周旋柏舟矢志守義青年井水無移迄今

數載每一念之增感百倍似續尙虛螟蛉有待兩代翁姑侍奉不忘今年春暮公來小園喜迎杖履快賞  
窓軒欲留白髮共對青尊竟我遐棄一醉無緣六十九齡長辭永訣鶴迎邵雍箕騎傳說相杵停春行路  
含玦誼屬葭莩勝悽咽五虞條屆敬奠一觴零涕泗盈盈淚眶素車往送丹旄飄颻馳馭旋歸來格  
來嘗嗚呼哀哉尙饗

祭文巡政文代文族作

嗚呼天胡太忍奪我善人胡不百齡迺僅七旬椿霜辭夕薤露歌晨矧摧比翼同日酸辛鄙閭掩袂行道  
沾巾猥承族誼重以至親葛藟庇本松柏成塵條逾卒哭哀悃同伸僉謂典型知君最真屬製誄章敢辭  
不文爰強濡翰悽愴而陳君產吳陽吾宗所式曲水村邊芷寮江側生有自來髻年歧嶷孔融讓梨黃香  
溫席幼學詩禮長劬稼穡倚頓治生冀缺食力詎慕軒冕不聞黜陟惻惻無華深沈有識戒滿持盈守謙  
受益一命之榮自適其適君之起家曰儉與勤見星待醴先雨推耘一粥一飯半絲半緡愛惜物力拱璧  
逾珍羅綺弗御精鑿弗陳獨其教子厚意殷殷羊豐修束蜎繼膏焚令子成材蚤歲掇芹咸推遠到翔步  
空群九苞之鳳獨角之麟吾族祖嘗向無存幾數十年來君綜而理力竭心勞銖積寸累繼長增高業隆

隆起載作寢廟載陳簞簞飛跋翼燕毛序齒亦有私嘗自祖及彌安侑高曾權衡母子平地爲山思源  
飲水微君之力安能及此懿陳孺人賦性賢淑善事姑嫜克和娣姒寔爲內助家政咸肅梁案齊眉鮑車  
挽鹿男錢女布義漿仁業緩急有無撝擲盈縮若論報施宜膺多福人言無間鬼伯何酷中秋月輪同時  
風燭並命有禽連枝有木一門之內傷心慘目嗚呼痛哉君之淪喪九族所悲君之德福並世所稀箕裘  
既紹堂構相貽既垂燕翼迭起松枝不得於身子孫是宜君心無憾衆論無私凡我同人瞻望君帷素車  
爭赴白馬紛馳生芻一束清酒一卮聊述哀忱無事浮詞靈其有知偕來格思尙饗

祭曾次豐先生文

嗚呼金臺月冷瓊島春陰人日屬纊天風輟琴三旬噩耗萬哀里音驚聞子固耶署星沈薦蘿無色桑梓  
傷心言念生平悲愴難禁翳維我公宗聖之裔明經蟬聯一十三世中葉式微書香稍替至於贈公重仁  
襲義是有隱德篤生念嗣摩天之鶴追風之驥公幼嗜書一目十行甫逾齠齔遽能文章衆譽神童交口  
是揚旣悲失怙哀毀瘠庭家無長物甕無餘糧忍飢慰母書聲琅琅廼有良師念公攻苦招之來學商量  
訓詁資以蜨膏卻其手脯兩載學成年十有五一鳴驚人鉅公見許桃李一門推爲翹楚公始弱冠爲名

諸生季子發篋終軍請纓蠶彼金剛窺我郡城公襄戎幕籌餉籌兵脂膏不潤烽燧無驚勤勞三載高涼  
肅清太守蔣公湛深經術多士決科擢公第一自誇藻鑑百無一失果捷秋風鷹隼迅出學有根柢榮增  
蓬華一鄉之士奉爲表率公未通籍再躋公車長安人海閉門隱居不輕投刺寧屑曳裾公卿推重名下  
無虛爲公孫宏爲董仲舒一朝入穀相慶懽呼公應廷試名在前茅宜入詞垣迺除刑曹公獨夷然案牘  
形勞嘉石肺石析水秋毫得情陽膚淑向皋陶從無漏網亦無冤牢昔太常公歐洲奉使引公參贊聞之  
色喜遠涉風濤四萬餘里忠信篤敬蠻貊行矣宣布皇仁尊崇國體烏弋黃支頌獻天子癸未假旋養遂  
烏私法人構衅竄擾邊陲公練鄉兵防海懲夷鴛鴦之陣熊虎之旗短衣悍卒聽公指麾白髮元戎讓公  
爲師公戀茲幃遂安家食畫錦舞衣怡然自得濟濟英才遠來親炙坐擁皋比講論昕夕常百數人齋壁  
爲窄吳差營室孫林市宅無何讀禮重廢蓼莪三年泣血廬墓山河當代文宗以禮爲羅致之幕下萬卷  
研摩珊瑚鐵網碧樹交柯得人之盛公力居多兩度入都補官供職山東福建所司周歷犯雪披星病因  
勞積方期京察嘉乃丕績一旦騎箕淒涼聞笛哲人其萎天意難測公有血性志愛肫肫時艱孔亟憂心  
如焚友于兄弟書誦君陳不怒不怨古之仁人河潤九里澤沛六嫺助婚繼絕殯死周貧公重報本於親



尤篤倡置祀田薦馨昭穆五色芝泥天恩優渥榮封二代地及伯叔外祖曰陳追贈章服更修家乘拳拳收族邑中新進籌贊維艱冷官俸薄寒士囊慳爭較錙銖僕僕往還公集衆贊和輯居間代餽東修士皆歡顏高枕而臥永無所患公嫉惡嚴去之若浼紈袴齷齪薦紳貪猥輒嫚罵之冀其知改事過卽忘豁然意解雨散無雲天空無滓招尤不知受謗不悔公昔在籍屢救枉囚囹圄幸脫莫知其繇或者知之懷金暮投公揮之去感激涕流四知臺下清風颺颺耳鳴陰德今世罕儔以公懿行宜登上壽胡未六旬倏近雲柩謂天無知疑天不佑所幸嗣君翩翩競秀伯壘仲篴同時叶奏並紹箕裘克昌厥後某忝至交有子不才託公東牀弱質先摧公書慰我恐我心哀去歲鯁生入泮歸來公書賀我維誦千回手蹟如新遽成塵埃嗚呼海天迢遞屈指歸程淒淒畫瑟點點銘旌親朋雪涕哭公於庭生芻一束絮酒一觥屬成誄章告公之靈雖不成文公其來聽哀哉尙享

祭梁可竹先生文代李順南作

嗚呼愁雲晝掩丈人之峯嚴霜夏凋大夫之松天降鞠凶山頽木壞行路摧肝登堂掩袂矧屬半子能不悲傷屈公五虞奠公一觴自愧不文況生也晚風聞梗慨敬書之簡重濡淚墨髣髴生平同聲一哭告公



之靈繫幹材公實公先德積學端行士林矜式循循善誘司鐸程鄉以暨南合甯陽遂陽宦蹟所留春風  
化雨至今膠庠融融煦煦明德之後必有達人明經文學別駕成均兄弟孝廉近時頗罕公導厥先英英  
競爽公稟異姿弱不好弄躬行孝友心專經誦年未逾冠聲雋一轡掃千人軍筆陣縱橫再踏槐黃秋風  
薦鶡程墨爭抄驚爲名作梅坡書院寔萃人文公坐臯比慇懃諄諄籠有菰苓門多桃李樂賢父兄培佳  
子弟公宏教育更勵科名勞勞公車十度春明發篋陳書挑燈習字人海喧囂蕭然寡詣故其制藝出色  
當行謹嚴楷法烏光四方前輩激賞期公館閣秦書十上卜足三朋倦懷帝京悵望金臺每逢計偕驅車  
復來公貞吏材允堪作宰儻試牛刀迎刃而解歲維辛未恭遇大挑目迷五色選徒囂囂榜列明通職供  
膳錄廿載浮沈未伸驥足昨膺行取喜觀天顏帝曰命哉汝爲儒官未盡長才原非素志捧檄欣然無不  
平氣嶺南名邑首屈番禺衣冠文物向風喁喁昔有經師吾鄉名宿虎峯局虎照人耳目四十年後公將  
繼之青青子衿怨公來遲故里親朋依依戀別珠海鑑江千里明月夫何二豎倏爾相侵淒聞笛響遽輟  
琴音茂名南疆市曰鰲頭犬牙相錯族偏人稠良莠品殊箕畢好異愆起乾餱嫌成睚眦小而刀筆大而  
戈矛昔我親戚化爲仇讎賴公片言分割曲直同歸於好居然冰釋自今而後誰爲解紛公如可贖人百

其身文士操觚持籌則拙惟大富貴乃真豪傑從來儒橐多半寒酸公洗其陋金穴朱門猗頓何人陶朱  
何術以道得之倉箱以寔燭照數計人不敢欺惟屋之潤乃家之肥曾閱幾時腰纏十萬六嫺所羨九原  
無憾而始履門得親道貌公喜告人孺子可教同門四子一體相關渠渠甥館頻數往還引掖詞章討論  
禮節飲食教訓孳孳不輟公有寵嗣獨秀江東兼葭愧倚玉樹葱葱群季不凡芳年尙稚頭角崢嶸知爲  
偉器惜我外姑先赴重泉未見成立言之惘然猶憶去秋公歸自北偕來省視盤桓累日都門近事聽之  
無厭宮闕壯麗禁苑深嚴玉螭之橋紫光之閣相畫蕭曹將圖褒鄂拓開眼界更談瀛洲滄海觀日萬里  
仙舟引我游夢心目牢記警欬未終已如隔世公壽者相龍馬精神是宜耄耋八千爲春內助需賢鸞膠  
再續配林恭人齊眉可卜天胡太忍箕馭耜豈歸兜率抑主芙蓉始公寢疾使我心悸既有起色我心  
則慰庸知永訣卽在斯時綿綿長恨當無窮期嗚呼已矣公歸無所鶴唳風酸雞愁月苦山川無色兒女  
傷心銘旌閃閃青城之陰白馬爭馳素車奔赴黯黯蒿燈淒淒薤露分忝東床香熱南豐血精所結精爽  
時通昨哭藏棺今來奠殯有酒盈罍有酒盈樽有淚如瀉博膺掩注不知所云公靈有知鑒我斯文哀哉

祭梁可竹先生淑配朱恭人文代李順南作

維光緒十八年歲次壬辰五月戊午朔越祭日己巳愚子婿李培明以剛鬣柔毛粢盛清酌香燭楮帛之儀致祭於皇清誥封宜人晉封恭人諡慈肅外姑朱恭人之靈前曰嗚呼缺月墮雲炎風捲波平生恨事佳節愁過豈無角黍弗弔汨羅亦有蒲觴弗誅曹娥慟我恭人傷如之何於維恭人名門之後稟德純全秉心嫻厚溯彼笄年歸我外舅舉案齊眉作羹洗手摒擋米鹽躬親井臼孟光女宗伯鸞佳耦於惟恭人善相夫子惠於臧獲和其妯娌仁粟義漿河潤九里每豐於人而嗇於己淡食粗衣銖積寸累中年家計隆隆而起外舅先生爲名孝廉四方有志京洛久淹高堂菽水子職婦兼事親以孝課子以嚴挾灰波磔熊胆鍼砭惟壁如兄樂而勿厭神龍靈虬世無其潛干將莫邪世無其銛一出驚人脫穎露尖柳汁未染芹香已沾群季觥觥崢嶸頭角束髮受書童牙上學燕桂聯翩白眉卓犖恭人教之怡然自樂此日孩提他年臺閣千里之駒九皋之鶴於維恭人訓女有方弋嘉鳧雁繡整鴛鴦國風蘋藻內則絲薑一一位置必周必詳送門是命敬戒勿忘結縭者四原送奩裝龍鳳爲鏡翡翠之箱於維恭人宜有是福寵荷鸞章榮膺象服綸綍宣言笄珈炫目茂比春松曜同秋菊洗羨雙魚壺稱百鹿孫茁松枝含飴願足三多之慶

華封所祝五世之昌敬仲所卜於維恭人宜享遐齡人言陰德有如耳鳴恭人爲善惟日兢兢求心所安  
不以爲名非惟保泰亦善持盈造物何忌與人無爭羣推綿算不騫不崩何期王母遽返雲輶卅年壺範  
一桁銘旌工女寢機相杵舂聲在行道而掩泣况感動乎中情述遺徽而濡墨愴怨恨之填膺南也驚鈍  
忝附門楣去年四月初拜慈幃殷勤治饌歡喜勸卮外舅教我有所勝於師外姑愛我有勝於兒家百里內  
訂十日期願常常見教源源來追聞病耗一再奔馳恭人謂我疾已可醫汝盍歸去勿復憂疑床前再拜  
暫爾告辭誰知此別卽永訣時來遲半日色笑已違終身抱恨哀哉無涯嗚呼嗟彼大化幹流旋兮天不  
憖遺碩人捐兮哀蟬朝咽荔子怨兮歌聞薤露心煩煎兮素車白馬交喧闐兮婦孺嘖嘖群稱賢兮重來  
甥館淚涌泉兮生芻一束絮酒虔兮瓣香泣奠對靈筵兮有魂在天來格旃兮哀哉尙饗

祭林香士先生文

嗚呼壺天日短薤露風淒昊天不惠哲人其萎觥觥我公歸然魯殿物望所歸人言無間公長文泰十有  
九年趨庭齟齬聞稱公賢昔者吾師群仙領袖公承家學多文爲富綺年童試出冠全軍策推軾轍賦擅  
機雲伯璫仲篋金昆玉季君陳惟孝友于兄弟鯁生旣冠始挹光儀翩翩濁世容與委蛇忽忽前塵卅年

若夢行誼彰彰猶堪記誦辛酉之歲髮匪跳梁竄擾信宜曰陳金剛播越故家流離瑣尾公爲東道周其行李指囷增粟詳橐揮金群情感德川水同深更助軍饟馬騰士飽獻馘殲渠散其牙爪寇平入告天子曰俞錫公頭銜輝映天厨斗大山城甃顏石枋儻有不虞將誰與守經營修之實惟姜侯公總其役材庀工鳩先之勞之暮歸晨起腋集千狐指麾百雉登登築版屹屹崇墉惟侯之蹟惟公之功吳屬瘠貧每多寒士幸博青衿一懼一喜師門投贄自行束修張羅力竭喘急汗流維彭鎮軍虛心商榷創小賓興沾漑後學方其倡始讒口囂囂築室道謀幾至阻撓賴公一言羣疑始定登高一呼萬山俱應卽今新進安枕帖然公食其報孫曾綿綿前年法人來闢租界紛紛義民羣備器械不度德力但切同仇移山填海借箸而籌我獨憂之終夜永歎恐啓兵端生靈塗炭公之先見與泰則同徙薪曲突談笑從容匪亂以來民無休息日苦官兵夜虞盜賊橫行劫掠莫敢誰何酷施刀鋸有傷天和公曰撫之以盜治盜龔遂下車虞詡增灶朝歌渤海前事可師安其反側受我羈縻果用公言閭閻安謐太平景象復見今日公之待人謙尊而光獨其天性至柔而剛若王彥方若柳下惠君子所親小人所畏惓懷故舊體恤單寒尺書心見大厦顏歡旣舉明經淡於名利絕跡棘闈讀書蕭寺寄廬之左地近金蓮陪僧入定與佛有緣月夕花晨知己



三兩活潑天機超脫塵軼長吏下車禮於其廬撫衣答拜不假輜輿去年逢恩例得鄉舉友朋勸駕公不之許我媿不才邑局濫竽謫公而行覆餗無虞世事浮雲中原鼎沸往往泣下相對感喟羨公八十神明弗衰手足耳目咸如壯時屈指故人晨星幾箇極浦過從橫塘倡和舊臘見公風采依然不聞臥病遽計遊仙淚墜聲吞奔馳里衢公心無憾人心則慟昔遊東海同眺朝曦三千六日重訂後期尙欠六年竟傷永訣天風海濤助人唯咽擬邀九老會續香山叨陪末座酩酊朱顏今少一人難成斯會園鳥林花爲之澌淚旣更新歲條越五虞素車白馬絡繹道途屬作誄章濡毫淚溢重熱瓣香望公來格尙享

祭吳季輿先生淑配李孺人文

嗚呼常儀掩曜寶婺沉光雲愁赤嶺水咽橫塘張源傷往潘岳悼亡薤歌晞露菊淚含霜念彼女宗鴻案相莊一朝溘逝德音不忘道途雪涕親串沾裳素車絡繹於邑登堂生芻一束清酒數行誄以陳哀語不辭詳繫維孺人生而淑美裔出隴西名門有子動合經曲言成則軌十七笄年歸於梅里祥女入門僕媼皆喜孝供溫清誠助祭祀讀後烏宿盟先雞起威姑弗豫侍疾床几念佛求醫秤藥量水衣不解帶履無停趾繫維孺人德可宜家終溫且惠維則柔嘉敬事兄公禮意有加和其妯娌門內無譁葛藟同根荆樹



有花猶子比兒視無等差錦綳文襖熨貼鮮華婢司執爨僮解烹茶待之寬恕不汝疵瑕上下安之無怨  
無嗟繫辭有占坤爲吝嗇孺人治生雅善撙節及其爲善義形於色荒年旱潦道殣山積轉粟賑飢千鍾  
勿惜沾漑窮乏無間疏戚臘盡隆冬朔風砭骨白髮號寒雪中戰慄衣爲裝棉黎眉喜溢夫子之惠孺人  
之德從來大婦易妬蛾眉子况成立肯置姜姬孺人曰嘻小見可嗤旁生甘蔗側出荔支烏有倉庚蟲有  
螽斯物且有然人亦宜之旣迎桃葉更買楊枝三心無忤半臂無私子孫衆多叶于風詩季與先生延  
陵名閥屈指人師嶺南第一家學淵源皇恩綸綍有女同車輝煌翟茀釋菜上丁志和琴瑟綺潔蘋蘩筐  
承榛栗負羈餽餐孟嘗好客謀之閨中藏酒不竭維繫永朝觴詠排日賓朋嘖嘖孺人之力長君鳳閣聲  
雋一疊庭幃受教嶺海知名韋經世澤漢學師承待擁皋比領袖諸生同時木鐸相應和聲翩翩群秀頭  
角崢嶸六龍競爽難弟難兄三見孫枝珠樹光呈神駒千里大鳥一鳴宜爾子孫振振繩繩比來吳川亂  
生割地臥榻之旁他人鼾睡外侮內訌國狂天醉勗哉夫子勤勞王事觸暑奔波憂時下淚寢難安席食  
不甘昧驅彼鄉團仇敵愾孺人助之典釵質珥糗糧供給桑梓保衛籌策無濟心力已瘁教團之禍震動  
神京乘輿西狩魄動心驚孺人聞之憂憤難平載辭穗石言返紫荆倦念所生扶疾歸寧祭田雖薄女所

經營愚忠愚孝本乎血誠膏肓不起和緩無靈從容易簪考終內庭傷哉千古遽隔幽明嗚呼人孺倫全五福心無所憾九京瞑目奉倩神傷隆鏗情篤失茲內助珩璜誰屬雪翅飄鸞仙音替燭秦景徽音聞耗悲促既閱五虞迺盡一哭黯黯薰幃蕭蕭松谷翹望雲軒陟降何速來格微誠蠶香尙馥哀哉尙享

祭吳文泉先生文

嗚呼赫赫吳公條然已陳兩月不見遽爲古人憶公別時自言腹疾常餌大黃不宜褻朮我不知醫執手徬徨頗憂剝削元氣過傷悵望橫塘迢迢烟水聞遇奇醫沉疴立起我心稍慰遠寄公詩不見和章我心則疑夜夢公來朝聞公訃時無國手竟爲藥誤望風一慟雪涕沾膺傷哉永訣愴念生平公之家尊先子畏友著書等身不脛而走公有名父更有賢兄淵源家學早歲知名重以泰山師承所自北斗仙人東牀佳婿出其餘緒聲雋一鬢拔乎其萃貢於明庭愛戀吞暉遲遲北上鵬翮暫息烏私終養君陳惟孝亦曰友于朋友有信金石不渝咸豐庚申高涼試院讀公作賦始識公面我年逾冠公三十餘交相期望天祿石渠累戰秋闈同落孫山公無慍色我也歡顏庚午之秋我聞捷報公喜來賀握手一笑祖筵餞我梅市酒樓月鏡似燭花枝籌當我上春宦公車屢蹟我無芥蒂公爲惋惜重三修禊重九登高流觴曲水分韻

題糕我探驪珠公執牛耳年年歲歲歡樂未已赤嶺之東卽古桃源公賦招隱若將終焉客我羊城彭公幕府爲問故鄉民情疾苦我謂吳川文士多寒一衿新進執贄艱難議小賓興修羊代饋集腋而成不費之惠將軍慷慨首爲之倡茶酣漏盡遂密商量誰總其成非公不可我實招公公肯匡我始終廿載費盡苦心繼長增高沾溉士林衆望所歸遂綜局事能者多勞日無暇晷邑有詢謀聚訟紛紛疇能折衷惟公所云蠻觸之爭禍幾流血賴公一言如湯沃雪梅菜巨鎮鰲頭各鄉爲魯仲連爲王彥方公通算法和弦勾股土木數計不差釐黍學宮庀材書院鳩工暨修家廟惟公之功我愧菲材因人碌碌公助一臂撐持全局戊戌以來時事堪悲我常痛哭公亦涕洟臥榻之旁他人鼾睡豈不傷心投鼠忌器衆不量力欲奮戈矛謂我不從與我爲仇公獨老成處之鎮靜曲突徙薪桑梓以靖兩宮扈從出狩長安惟我與公西望汎瀾旣慶回鑾以悲以喜白頭相對揮涕不止公素方剛我偏慤直偶有不合憤爭面赤公嘗謂我海濶天空事過輒忘無介於胸若夫某公與言宜慎一語之失終身之恨感公知我益發狂言各露肝胆常通夢魂公弟中書金石之交近者老病豪氣頓消季也廣文儒林第一我舊居停醉酒飽德公家阿咸總角相知約爲古文互相友師水榭校書李吳楊許披圖展觸一別千古兩人屈指三代交情公得子遲晚茁

群英仲篴伯壘同宣木鐸幼子童孫崢嶸頭角公之廉正遐邇所欽一介不苟一諾千金粟園麥舟義形於色姜被田荆無分畛域公有陰德食報是宜公尙康強胡不期頤四百四十甲子初紀嗚呼公乎而竟已矣自公云亡舉目牢騷茫茫宇寅渺然寡儔誰析我疑誰規我過我哭誰聞我歌誰和邑有興作誰任其勞鄰有爭訟誰化其囂溝瘠未蘇誰拯其飢萑苻未靖誰捍其災行道摧肝親朋一哭異喙同聲百身莫贖登堂酌酒奠公五虞一瓣心香一束生芻敬陳誄章志哀布臆盡此一觴望公來格

祭鄧端卿先生文

嗚呼崦嵫落日箕尾騎星山川無色道路吞聲哲人其萎死哀生榮京華萬里聞訃心驚天不憖遺喪我老成寒凋柏翠夢斷楓青夜起濡墨叙公生平遠郵誄章告公之靈公之家世肇於高密龍山蕃衍迢迢一脈始遷梅江仙尉所宅嶺西巨鎮於焉首屈鄱陽名宦維先德治獄有聲高其門閥累葉銅章滿床牙笏玉季金昆公尤傑出公稟異姿弱不好弄志樂琴書心專絃誦秋隼盤空一擊不中謝絕棘闥隱居市閭高學陶潛清如平仲馬中騏驎鳥中鸞鳳古來大材世難爲用公豈介懷超然無恫戚同之間國幣久虛兵餉支絀宵旰憂虞公慨助邊上供軍儲置臣入告天子曰都錫汝耶官以勸樂輸頭銜煜煜誇耀鄉

閩古有卜侯載在史書豈徒贊耶慕漢相如光緒甲申齊魯水災蕩析離居百萬鴻哀公爲賑之千金纍  
纍臣入告帝曰都哉錫之綽楔以垂將來崇坊高聳金字皚皚表里有典尙書所該行人嘉歎過之徘徊  
在昔金門鄰邑跳梁狼烽絡繹逼及高涼予守危城籌兵籌糧公賦同袍爲之解囊士飽馬騰兵氣益  
揚南山旣克殲其封狼賊帥倒戈獻馘道旁貔貅就撫若驅群羊維公之功民不能忘公之陰德有如耳  
鳴嘗豐廟碩道坦橋平豈無饑歲米價殊騰老羸菜色溝壑縱橫開倉平糶價短粟盈徧賑嫠族兼及鄰  
氓一時飢殍羣慶更生豈無疫歲人畜不寧窮黎醫藥一錢不名公爲惻之不惜多緡藥儲於籠丹貯於  
瓶無乞不與任取其羸昏暮剝啄戶不得局公爲內行惟孝友于田荆姜被一室歡娛伸悲折翼誠姪有  
書叔宦粵西早解銅符益加親愛昕夕樽壺季也一官帥債多逋一紙之寄萬貫之需公亟應之吝色毫  
無非其盛德能如是乎公待故人久而敬之深情厚貌融融怡怡爲謀必忠重諾無欺魯困可贈范舟可  
貽其佳子弟愛之比兒飲食教誨殷斯勤斯貴賤如一貧富罔歧人心之險交道之衰聞公之風能勿世  
愧今世士夫日趨奔競交結要津魚肉百姓下至簿尉唯唯奉令舉國若狂不知爲佞公獨恥之動必以  
正侃侃與言群兒悚聽維彼愚人轉相詬病謂公志驕訾公氣盛斥鴆何知蒼松自勁憶予丁亥乞假南



旋公來視我握手懽然銀燈對酌舊雨重聯訪公梅萊人道公賢爲王彥方爲魯仲連解排紛難鄉黨賴焉冢嗣燹臣濁世翩翩廣文青氎比之鄭虔次君秀才玉立比肩秋曹觀政勾簡無偏依依情話別將十年公未出山林泉適意一代福人徜徉福地華屋雲連萬間厦庇紅羊免劫黃巾敬避薪木依然花鳥呈瑞一品之衣五花之字國恩特隆天爵自貴膝下孫曾歡陳綵戲勞勞塵鞅羨極生媿嗚呼公之厚德宜享遐齡胡焉七袞遽從九京遙遙電耗使我涕零傑直樞垣悵望海溟遙想親朋車馬盈庭同聲一哭雨黯雲停生芻一束絮酒一瓶于以奠之公其來聽哀哉尙享

祭江孔德先生令堂何太夫人文

自古名儒多繇賢母世傳顏歐亦稱韋柳我朝經學弇山陽湖畢洪而外有汪江都其後有張其前有盧餘姚武進唱于喁喁凡此數公授經母舍吾鄉江氏遙遙方駕岐山之下石城之西耶孀地近閩閩雲齊繫太夫人生來福慧習禮明詩我載子佩歸駕部公嘉耦曰配相莊鴻案共挽鹿車籃田種玉老蚌生珠夫子人師湛深經術讀萬卷書夢五色筆羊城秋試催踏槐黃游子千里惓懷高堂繫太夫人願代子職勛哉鵬程健翮丹息漸諳食性手作羹湯斷葱有度截內必方凌雜米鹽經營菽水新婦承歡白頭色喜



侍姑病榻抑搔扶持餐寢並廢形影不離問卜揲著求醫嘗藥禱天減算焚香呼籲泊悲風木大事獨任  
米貝珠含牆翬夷衾愼終必誠治喪以禮賢孝之稱洽於鄰里從來後母絕少慈雲伯奇履霜於古有云  
繫太夫人遺雖是恤一子二女愛若已出嬰也而病撫摩喚咻寒夜數起問兒所苦長也而殤哭之過慟  
往往涕泣見之魂夢常申女誠德言容工擇壻則苟送奩則豐居心之厚簿俗可風昔駕部公旣膺鄉薦  
筮仕京華郎官宿現家書手寄萬里千言努力顯揚上報天恩退食委蛇無憂內顧家政之操得此賢助  
長卿游倦乞假南還行將招隱叢桂小山南溪之南行人病涉滅頂三篙驚心一葉維駕部公造橋爲梁  
惠比國僑功侔蔡襄揮斥萬金勉成善舉傾囊不足歸謀諸婦首倡義學伙助賓興黔敖賑粥子敬指  
囷同心黽縷指難陳繫太夫人孝慈天性鴈鳩一儀蛩螢共命白羊之歲遽喪所天銜悲絕粒欲殉重  
泉一死非難撫孤不易權其重輕節哀制淚男多襁褓女尙扶牀稍長成童翼然雁行晝荻丸熊裁芸辟  
蠹玉軸牙籤網羅四庫諸孤力學日上隆隆才過五鳳名噪七龍仲也家駒飛黃騰達卜式助邊毛生奉  
檄榮封一品誥命五花以慰親心惜年不遐叔季比肩玉樓早召寶劍沉埋終難掩曜一門之盛更有白  
眉當今鴻博一代經師高足及門盡天下士爲鄭康成爲楊伯起與第三人學究中西法本周商衡訂黃

岐大息去年又弱一个荆樹枝疏萱花淚墮繫太夫人白髮含飴子真名士孫亦奇兒三代科名遐陬罕  
見况又傳經縣延一綫微太夫人孤詣苦心畢洪諸母專美於今輒使采風經生避席屈指同園嶺西第  
一文泰丁年適館珂鄉聞之女嬭述娣姒行謂太夫人女中君子義粟仁漿性禾善米里有獨子貧不能  
婚資之娶婦繼絕抱孫歲歎兒飢月致供給造門叩首爲之感泣僕婦盜物私置暗甌既燭其奸欲蓋其  
羞扁掩依然仍存故處終使將去莫言其故凡茲軼事丈夫所難言猶在耳心誌弗諼憶駕部公平生知  
已宿草卅年山河渺矣諸孤成立我喜欲狂稱觥壽母兩度登堂曾祝期頤上符人瑞慶溢萱閣恩濃楓  
陛何期鸞馭遽返瑤池纖月忽墜陰霾不開塗人摧肝親串雪涕白馬騰馳素車倚至眴經百日廼成誄  
章酸含荔子哀奠椒漿靈兮歸來鑒此一觴嗚呼哀哉尙享

祭江季石先生令堂馮太夫人文

嗚呼封鮒罕聞九熊誰和上下古今賢母幾個吾鄉母範繫維夫人錦車之裔繡幃之鄰疊賁芝雲遽傷  
薤露石補霸娒星沈寶婺道途隕嬪涕孺傷心驚聞噩耗哀惋難禁忽忽十旬瞬經卒哭謹獻誄言以當  
芻束夫人始誕毓自龍山秀外慧中貞靜幽閒器識迥殊更饒才略耶孃愛之掌珠是若命宮極貴恰喜

偏紆巾幘英雄絡秀稱賢昔我女嬃實爲妯娒譽不絕口言猶在耳古隅贈公廣行陰鷺滿地布金長橋  
累石易舟而徒化險爲夷行人頌之食報是宜燕姑初來蘭徵夢吉草佩宜男荔支側出篤生詰嗣高大  
門閭車容駟馬堂集鱣魚懿彼夫人以順爲正蘋蘩誠敬米禾善性河潤九里澤及六嫺歷十餘年由亨  
而屯詰嗣少孤贈公見背風雨颺搖室家顛沛夫人處之若無事焉持家教子兢兢乾乾豈無橫逆過即  
冰釋亦有艱難歸于撙節含辛茹苦食糲衣粗隆隆家業遂復其初夫人苦節綽楔旌門松柏有心貞操  
常存中落再興益樂爲善荒年賑飢活人無算喪施之槨婚助之錢病劑贈藥寒衣捨棉祠塾倡捐津梁  
利涉揮斥千金全無吝色親戚雖貧禮意有加臧獲雖愚督責無苛畫荻能勤切葱有度教以義方繩趨  
矩步季棧正郎服膺慈訓馳譽膠庠結交豪俊近來新學異說紛紜百端簧鼓無父無君夫人曰嘻毋沾  
習氣何以立身忠孝兩字中原多故幹濟需才破產助邊白鏹皚皚萬里風雲驅車北上游子儼裝出門  
惘惘京畿亂後驛路榛荆選人規避裹足春明夫人曰嘻予季行役勉荷時艱爲郎執戟慎刑折獄供職  
秋官不疑母教多所平反當軸鉅公倚爲臂指謂非此母不生此子天子褒之寵錫龍章披一品衣翟弟  
煌煌方冀今冬板輿奉養隨班祝釐同膺寶賞何期親舍二豎生灾痛心嚙指倉卒歸來兒拜床前猶親

色笑侍疾兩旬複苓無效傷哉人子抱恨終天白雲渺渺黃泉濺濺嗚呼夫人宜登上壽胡爲五旬瑤池返舊子方騰達孫亦知名胡不少延八座之榮天道難知條悲風木月落烏啼天陰猿哭岐山之下石城之南素車白馬擊轂駢駟泰等同感徽音登堂於邑燭淚交垂紙痕尙濕氤氲香篆清醺新醅夫人有知鑒我一杯嗚呼哀哉尙享

祭陳道宏先生文

嗚呼太邱之裔濂江之英天不憖遺喪我典型蒿燈夕黯薤露朝零行道雪涕親串吞聲薦蘿至戚金石堅盟哀哀執紼閃閃銘旌瞬經百日奠於兩楹瀟灑淚墨叙公生平公稟異姿楹書世守髫齡入塾冠其曹偶矢志青雲卷不釋手自從少孤里居奉母綜理家政豆觴箕帶握算持籌歸田積畝絕意功名起家豐厚端木億中子荆富有事大恭人宗族所稱先意承志無聲無形乳羊在圈慈烏下庭衍甘炙脆修潔膳馨况兼家業隆隆而興母心逾慰富壽康寧親體達和湯藥營營衣帶弗解履馳無停凡公孝行允堪錫類下待子姪怡怡友愛一本周卹六嫺沾濟義粟仁漿口碑道載救人急難完人婚配貧家舉火惟公是賴靡間疏戚無分外內歷數十年行之匪懈公謂良相功本良醫景行和緩精究黃岐風雨昏暮招之

卽來望聞問切膏肓立治哀此瘳獨貽之刀圭噓枯吹生洽髓淪肌活人無算陰德長貽今之國手舍公其誰龍山之祠松角百尺公寔建之以報祖德星曜文昌作廟奕奕公所鳩工如跛斯翼造橋濟人雙虹疊石揮斥千金毫無德色砥矢旣平波濤永息易危而安維公之力公好讀書尊師重道見儒衣冠每每傾倒以文會友惟善爲寶德祖最少中公已老樽酒必空徑花常掃或報琼瑤或通紵縞久敬不衰永期相好室有芝蘭階多瑤草海國多故浩費軍需公先備餉入貲樂輸卜式助邊天子曰俞以副都轉佐運天儲佳兒佳壻出衆才殊祥麟威鳳後唱前于文孫英秀千里神駒一門之盛誇耀鄉閭嗚呼公之厚德宜享上壽耄耄期頤自天所祐胡僅花甲淒風引柩鵲啼宵鵬鳥號晝白馬素車颺馳輻輳一束生芻紛陳靈右誅文未終淚痕先逗我心傷悲公歸不復嗚呼我公永隔重泉昏昏白日悠悠蒼天音容何在山河渺然呼公不應問公無言親戚故舊泣涕漣漣紅垂燭淚青篆爐烟陳牲在俎陳酒在筵公靈有知其來格旃哀哉尙享

祭李雪廬先生文

嗚呼我公竟長逝耶親朋雪涕行道咨嗟自念平生第一知己愴述平生淚痕滿紙我家極浦公住南宮



門前佳氣相望鬱蔥憶昔童年歡論世誼十年以長敬以兄事公會譽我金馬玉堂我遙餞公執戟爲郎  
萬里春明秋曹列宿不疑平反老吏斷獄公餘習字愛仿鍾王得風氣先曰烏光方同人謂公倘叨聯捷  
問鼎何難允堪前列文章憎命屢躓棘闈浮沉郎署銜恤南歸戊辰之秋羊城橐筆公來訪我五層樓側  
歡然握手情語依依都門近事傾聽忘疲晨夕過從雙門書肆燕姬出見祁祁珠翠公檢行李大卷盈箱  
勸我學書待試明光我感公意留心染翰獨媿非才有辜期望我登鄉荐公喜可知春官累蹶公心則悲  
我緝方磬公贈之粟佃戶舟人轉輸百斛我囊屢空公通以財青錢串串白鏹噫噫施非望報受不言謝  
今日思之我淚如瀉自公歸里三十六年不謁官府雅愛林泉築室南山斯干秩秩小試經綸規模一拓  
荒年餓殍狼藉於途公賑以穀溝瘠歡呼邑有水田苦於秋潦公捍以隄躬親下掃驕陽苦雨路立河干  
倏然笠屐不問暑寒鞏固旣成豐穰斯慶萬室炊烟無憂懸磬新進印金寒士爲難修羊代饋廣廈歡顏  
公董其成吳林陳李繼長增高有加無已修其祖廟庀材鳩工隻磚片瓦成竹在胸以妥先靈禮隆報本  
黍稷維馨犧牲是選公有血性悲憤憂時毋滋他族偪處邊陲租界之初海氛甚惡奮臂一呼義同倉葛  
我排衆議公曰不然相知按劍光閃龍泉我苦規公公應諒我投鼠忌器時猶未可公性正直語雜諷諧



一諾千金季布之儕公與人交拳拳真摯緩急有無郵金遠寄更篤內行黨里化之家庭肅穆無敢荒嬉  
公之萱堂同堂五代壽將百歲國家祥瑞白頭哭母年逾古稀遽騎箕尾猶曳麻衣家督冠軍有聲庠序  
先公早卒孫曾舉舉有子龍文出嗣仲江少年騰達國士無雙瓊樹雙枝以似以續祖硯能傳父書可讀  
公之隆德垂裕後昆洵宜食報駟馬高門昨我登堂來問公疾床前執手別無多日忽聞公訃將信將疑  
旣知確耗淚如綆縈旣閱五虞戚族同奠白馬素車奔馳若電謹陳絮酒綴以誅章公靈來歸鑒此一觴  
哀哉尙饗

祭李吉甫先生文代作

嗚呼我公竟長逝些蒿里風酸驚鶴唳些宦海歸來雲程滯些寶劍埋光泉臺閉些錦水珠崖波湧淚些  
行路摧肝同沾袂些矧托薦蘿我心悸些我公之生比璠璣些頭角崢嶸屏樂娛些生甫九齡童烏譽些  
獨秀江東玉溫如些翹首天閭思對策些志在強臺酬未得些弱水舟回風無力些匏繫冷官良足惜些  
我公之仕惟廣文些遠紹鄒嶧接泗濱些韶石絃歌風風人些南天之南蠻犵駼些帝實嘉之賁音綸些  
將試百里蘇瘼氓些胡天不吊災良循些人如可贖百其身些嗚呼我公惟孝友些讀廢蓼莪講觴豆些

馬援誡書銘座右些風月佳兒才八斗些仲簾伯壚恥虛後些或冠其曹文章首些或據高足笈遠負些  
猗猗桐枝羌競秀些愛日方長胡撒手些嗚呼我公有猷爲些事戒首鼠無狐疑些狂瀾滔滔隻手持些  
水燭怪狀然溫犀些魍魎歛跡豺狼悲些時而春和色怡怡些時而秋蕭象巍巍些仲路片言莫敢欺些  
何期終朝哲人萎些嗚呼哀哉天地黯兮浮黑陰些海水生寒兮悲牙琴些丹旆飄兮霜滿林些腹慟西  
州兮我傷心些鵲愁咽兮蟲悲吟些燭淚成堆兮哀難任些生芻束兮絮酒斟些公靈來兮庶其歆些嗚  
呼哀哉尙享

祭李朗山先生文代合族作

嗚呼公其永訣隔九泉兮悠悠天道今難論兮山川黯慘無朝昏兮颺母鼓浪滄溟翻兮木拔禾偃靈車  
奔分事有朕兆天何言兮玉棺遽下風揚旛兮淒淒楚楚歌招魂兮寥空唳鶴林啼猿兮行道涕泗吞聲  
繁兮矧予葛藟同本根兮公生名門世澤綿兮詩書簪組相蟬聯兮明經祖硯家所傳兮諸父昆弟多青  
氈兮澄海先德集三鱣兮鯉庭學禮卅年前兮清風兩袖徐聞旋兮伯氏夷鐸人稱賢兮曲江山下陵水  
邊兮仲叔競爽媚豆籩兮壤兒援姪佳翩翩兮一門之盛誰比肩兮公幼岐嶷生質美兮廣穎豐頤慎容

止兮卓識深沉推此子兮才不矜張氣勿使兮有時諧語藏妙理兮弱不好弄嗜書史兮鎮日下帷鑽故  
紙兮一戰風簷競寸晷兮賦就長楊馬可倚兮子矜青青馨泮水兮廼知名下無虛士兮萬里風雲自茲  
始兮再擊不中途知止兮爲親捧檄毛義喜兮旣廢蓼莪終不仕兮寥寥高風今有幾兮公之內行世所  
師兮依依燕寢遂烏私兮鵲鵲之痛二人悲兮何以解之色笑怡兮班衣戲舞如嬰兒兮無何風木哀落  
悲兮鼠思泣血雞骨支兮幾不欲生泉下隨兮親朋勸鬯始進糜兮久絕梁肉屏酒卮兮秋霜春露厪孝  
思兮惟祖蒸嘗缺牲犧兮千鈞一髮危乎危兮力圖恢復崇專祠兮奕奕孔碩薦明姿兮敬事邱嫂愛比  
兒兮脂膏不潤囊無私兮諸姪饒裕已獨虧兮以貽子孫一經遺兮公之令聞民所望兮季布一諾千金  
償兮邑有善舉咸解囊兮築堤作廟成橋梁兮嘗周仁粟普義漿兮吳川寒士游膠庠兮白手無貲空傍  
徨兮峨峨書院江之陽兮一朝集貲千萬鎰兮代權子母餽修羊兮誰董厥事正以方兮薦紳僉曰惟公  
臧兮公任其勞食不遑兮高增長繼澤孔長兮士林思之皆不忘兮嗚呼吾族發祥溯文翁兮村居稠聚  
川西東兮公能化之雍睦風兮衣冠揖讓無忤容兮條驚朝露凋秋松兮公無所憾後昆隆兮族人矜式  
將安從兮咨嗟白髮號黃童兮心香熱瓣燭淚紅兮靈其歸來鑒一鍾兮嗚呼哀哉尙享

祭何文峯先生文

嗚呼滄桑一變地棘天荆魑魅晝見鵩鵩夜驚玄黛歲更花朝節近喪我良朋心憂涕隕早欲伸紙爲文  
誅公悲來攔筆咄咄書空轉瞬駒光倏將百日勉強成篇淚痕紙溢公幼穎異生有夙根廬江後起水部  
前身初學操觚髫齡上塾往往出言驚其耆宿公未弱冠與我定交風簷角藝刻燭推敲頃刻笑談遂成  
莫逆臭味芝蘭盟堅金石公娶吾族兄子賢媛重以親串啞啞笑言公住西門我家極浦彼此過從三百  
餘步登臺玩月携手聽濤聯吟擊鉢倚醉揮毫自愧不才兩年差長感公虛心敝廬是享回憶秋試泛櫂  
珠江人爭期許中必翕雙我幸登科公偏落解公喜來賀胸無芥蒂南風不競遂改北轅陸機入洛樂毅  
游燕輩穀知名公卿下士薦而不售寧非怪事公無悻悻眼界愈寬宮闕之壯天下大觀一代偉人合肥  
傅相公識其面大喜過望賦詩特紀如覩慶雲樞密穎濱於今亦云昔太史公三長兼具文有奇氣山川  
之助公經滄海覽勝之采長風萬里壯哉此遊束笥新詩歸來示我進一重境排昇貼安公才鴻博七薦鄉  
闈明經猶斬文與命違公泯怨尤潛心著述集號鐵鳴如椽大筆戊子志局我與纂修賴公共事博採兼  
搜新政之行學堂初設我慚董勸公喜演說

吳川初設學校余爲勸學所長鄭親翁  
雪苑廣文任校長公任國文教員

幾番聚首香火前緣一燈話

舊風雨床連公事雙親君陳惟孝木公金母眉齊耄耄公逾花甲具慶膝前兄弟無故孫曾綿綿長君孝廉直州司馬八閩將亂陳情乞假仲海季江聲雋一爨有孫畢業家運隆隆去年古稀中秋哭弟鵠原之痛哀勿能止今年次君夫婦同穴盈盛之門竟羅陷缺曾未旬日公遽騎箕門人三百相嚮而悲昔者端陽公觀競渡必過意園年年無悞五十餘載習以爲常公今何往老淚沾裳天不憖遺老成凋謝笛聲未終燭淚如瀉蕉文猶綠荔酒剛紅公靈歸來鑒此一鍾嗚呼哀哉尙享

陳善堂部郎七秩晉一冥壽序

祝壽不必生前也古之君子文章道德矜式後人異代名流於其生日也馨芹潔藻衣冠致祝鞠膳稱觴若韓昌黎白香山歐廬陵蘇東坡諸公嶽降生辰詞人稱祝近時騷壇唱和壽韓壽白壽歐壽蘇詩集海內流傳勝會良辰千百年如一日是之謂不朽其壽豈有窮耶善堂郎中陳公化州之華胄也先德禹門觀察以以校官起家官至粵西思恩太守陞用道公爲冢嗣束髮趨庭聞詩聞禮逾冠聲雋一爨顧不自滿假抱顏淵若虛之懷師孔園下問之學撫謙冲挹無執袴風庚午鄉荐與秦同出於長沙謝馨伯師門甲戌再下第以賞爲郎供職兵部長安人海車馬喧闐公疏簡應酬韜隱有若寒素輦轂之下無知其爲



貴介公子者無何挈眷南返年逾五十歸道山忽忽二十年矣今歲某月某日公七旬加一誕辰同人將以是日製錦奉觴拜公生日屬泰文張諸屏忝叨世誼知公又甚深雖不文曷敢辭乃濡筆爲文以祝之其詞曰繫惟石龍古南訛馮寶故郡羅辯仙鄉屈指人材潁川巨族仕宦科名蟬聯相屬昔禹門公出守粵西循良著績帝擢監司遺愛在人甘棠膏雨公寔家督克承厥緒公幼嗜學刻勵三餘冠軍泮壁儼廩天廚秋試棘闈讀公行卷自愧弗如曰清顯典公之外舅我族老兄謂公與我爲同年生榜發果然相視而笑公齒差長我亦非少兩人相約北上同行雪輪萬里霜驛三更翹望觚稜僕夫色喜會館卸裝同餐並几公再下第助邊爲郎我走別公祖饒道旁餽贈殷勤增輝行李春樹暮雲相思曷已犬牙之錯喜聞公歸言將訪公俗紕遲遲荏苒光陰遂成千古念公生平銘諸肺腑憶昔都門太平無事豪貴冶游朋儻妙妓家家燈火夜夜管絃解衣怒馬奔走少年有酒如澠揮金如土公戒徵逐趨繩步矩杜門謝客徑長蓬蒿晏嬰敝裘仲路緼袍愛惜物力撙節靡費美哉儉德可以風世古經有言顯親爲孝欲報劬勞勉圖封誥况兼一品三代並崇波及小臣曠典罕逢公始服官適當其會天天子曰俞推恩錫類公拜稽首恩降紫泥一門之盛九泉有輝僉曰孝哉萬口如一一字之褒公無愧色今之士夫作威作福公飽私



囊強食弱肉黃緣當道雄據要津睚眦必報禁錮終身公在故鄉城市罕至徑絕澹臺榻懸徐穉有犯不校有唾自乾知足能忍皆人所難公之陰德爲耳自鳴非與要譽原不好名介弟長才旬宣象郡繡豸翩翮隆隆家運公有令子早赴玉樓文孫跨灶爲箕爲裘同年九人晨星賸我重荐湘蘩僅存碩果公來歆格盡此一觴踵事先賢祀公於鄉年年生日歲歲椒漿於萬斯年山高水長



李小巖先生詩集

吳川李漢魂伯豪輯

洗夫人廟

高涼片石屹嵯峨繡幟奇功字不磨一代桓文屬巾幗千年魂魄護山河請纓後有秦良玉立柱前無馬  
伏波此是昔時開府地至今誰復唱夷歌

怨婦行

有女在朱門嗚咽飛蓬首自云貧家娃嫁爲富人婦荆釵布裙作嫁奩舅姑終日生憎嫌閒春寂寞鎖深  
院從此爺孃不得見終風夫婿反爲讐陰雨伊誰待訴愁男兒自有簪纓志那管閨中裙帶事君不見東  
鄰嫂有金釧歸一朝貧去紅顏非綺羅珠翠今何在空房夜夜泣牛衣

石城縣

東坡曾到地駐馬不勝情古廟樓行客青山補缺城女兒纏足少胥吏衣裘輕欲覓當鑪醉沿街問酒名  
。清明前二日自石城還家

一別恨綿綿還鄉亦偶然人歸三月暮家在數帆邊春水綠平岸遠山青到船子規緣底事啼出雨如烟  
石城道中聞鷓鴣

自從折翼哭東坡子幼家貧可奈何山鳥似知憐阿弟聲聲行不得哥哥

九月二十二日生一女

自笑真無味相看且勿悲與爺同面目仗汝作門楣只合名多弟誰教是女兒三朝啼向我已似解吟詩  
消夏卽事

綠陰深處竹風清閉戶兼旬少送迎最好晚涼新浴後葛衫葵扇臥桃笙

食苦瓜

瓜時便進酒千杯願向人間處處栽不是生平偏好苦只因曾在苦中來

烈婦行

辛酉二月陳金缸陷信宜烈婦林氏方娠偕壻劉歸甯賊至戀父母不去賊溫語餌之大罵賊遇  
害腹剖胎見焉聞而悲之作此以俟採風者

寶江二月桃花水照見銀刀血光紫紫血有光名更香烈烈林家奇女子林家奇女名品姑冰心玉骨雪  
肌膚去年新作劉家婦思親淚染紅羅襦震來蘇蘇將一索依然淚爲思親落弄玉歸吹月下簫劉晨約  
采天台藥忽報紅旗捲地來家家走出携嬰孩死生分散不相顧哭聲動地飛塵埃品姑孝烈世罕伍獨  
遣郎歸淚如雨情重羅敷自有夫事急曹娥思殉父一縷驚魂逐去鞭弓鞋無力行難前干戈叢裏逢烏  
合鼙鼓聲中怯翠鈿紅裙驚逐黃巾後素志堅同白璧守偷生那肯玷蛾眉求死拚教投虎口一聲罵賊  
一軍譁吹角無聲鼓不撾此際風雲愁變色此時貔貙慘磨牙當前憤灑千秋血斷送初胎二月花肝塗  
腹剖甘如蜜愧殺男兒齊屈膝城中多少僞衣冠不及如花一巾幘盼到將軍虎穴探死當結草學啣環  
從今風雨鏐鏐夜知有貞魂擊賊還

聞信宜近報

三年隣境尙干戈塗炭生靈可奈何我欲攻心師馬謖誰能刎頸謝廉頗傳聞諸將同袍少坐視全軍棄  
甲多如此養癰堪太息寶刀終夜幾摩挲

梅茶酒樓

一天星月可憐秋亂後相逢舊酒樓多少英雄兒女淚琵琶聲裏看吳鉤

五藍題壁

燈影搖紅酒半酣長途席帽伴青衫閨中不識離人路知否今宵宿五藍  
一枕醒餘月影斜出門三日已天涯秋風似解憐孤客昨夜吹儂夢到家

壬戌九日

多時閒却探驪手乘興題糕亦快哉翻得東籬陶令局青衣山下送茶來

新興迴龍寺

隨鐘尋野寺下馬讀殘碑佛古自無語僧貧多斷炊爲言離亂後懸望太平時坐擁貔貅者從容老我師

聞道

聞道馮唐老能成孟獲擒少年曾習膽大將善攻心貌想魁梧異營屯細柳深風塵君莫棄寶劍不終沈

題畫

雙鉤垂處玉纖纖不見春蔥露指尖剛是烏啼春睡美桃花如雨不開簾



香港

此豈非 王土居然入鬼門五丁山斧鑿萬舸火輪奔白械夷倡雜紅毛獄吏尊誰容臥榻下羶臭不堪論

出門

自把青衫搵淚痕曉風殘月黯銷魂長亭已過重回首如見慈親倚倚門

羅定題壁

飢來驅我走風塵閱歷依然夢裏舟客舍冶春花繫馬女牆深夜月窺人吹簫市散難謀醉賣賦途窮漫笑貧舊是陸生游覽地我來無那一沾巾

自羅定返珠江有感

嘉桂山頭錦作灰霸圖流水不重回趙佗陸賈今何在惟見珠孃打槳來

郡城中秋與內子對酌月下口占一律

去歲中秋月淒清荻海邊月從今夜好人在異鄉圓妻拙藏糕酒兒嬌索餅錢倚閭遙有母知道不曾眠

丙寅重陽登觀心閣

觀心閣是望鄉臺客裏登高又一回兄弟關情通雁信江山屈指數雄才我懷夢得題糕字誰與淵明送

酒杯待煞東籬人不至自家翻著白衣來

同人皆青衫  
余獨衣白

去年此日重陽節纔向羊城返故鄉今歲飄零仍浪迹老親悵望幾迴腸天因愛菊無風雨人到催租少

稻梁

索逋者  
適至

多謝窮途知己在新詩投滿紫萸囊

黎鼎和陸晴霞揚芷裳吳輔臣林海初楊玉笙吳薦雲文鳳山何樸卿吳榮樓汪煥珊羅芝園吳萊峯黃吉齋家觀卿濟卿雅林南笙庚仙諸詩人

約聯  
詩社

贈家雪屏守戎

少壯從軍萬里行翩翩裘馬好書生歸來客夜芭蕉雨猶作沙場戰鼓聲

三月十六日將之羊城示弟季才

雞鳴星正繁遊子戒行李有母猶未眠自云先我起縫我身上衣疊我客中被防我酒家眠戒我瓜田履  
諄諄復諄諄面命提其耳千金抵一刻一瞬別千里但願常平安不計羅與綺但得早歸來不必甘與旨  
感此摧心肝忍淚不敢泚

有婦方爲炊炊罷前致詞君今遠行役爲君烹伏雌君非百里奚妾豈蘇秦妻富貴無相忘貧賤常相依  
前年君爲客荒歉家難持嗷嗷二十口食粥常苦飢今年頗豐熟幸免飢兒啼空箱典欲盡卒歲寒無衣  
門前有隙地桑樹將成圍賤妾惟自織待君重下機。

阿弟送阿兄乃至城南門阿兄語阿弟此別殊銷魂兄弟昔四人惟君與我存邱嫂歿無姪無姪祇有孫  
生小寵失教無異犬與豚二嫂痛新亡女字男未婚飢寒更不免使我心憂煩憶我在家時萬事同君論  
今兄出門去弟苦當誰言勗哉庭前荆勉事堂北萱

幕中即事柬張晉齋茂才

滿身花影倩人扶一幅春風士女圖最好夕陽沈醉後歸來同話小西湖

五月十四夜

風起城頭月四更吹來山寺打鐘聲寒衾驚起還家夢坐待天明尙未明

秋夜與晉齋話家庭瑣事感賦一章

鳳泊鸞飄未慣經飢驅浪迹感鴈零相逢知己心同素每到看僂眼獨青五夜鷄鳴驚僕起十年燕婉說

君聽天涯兩箇離人婦知否宵深客尙醒

贈鍾硯雲

君家傳硯本鍾繇書翻記翻重上游妬煞珠娘爭乞字墨痕釵影太風流

輦下年來也得名索書強半是公卿怪他眼界空如許滄海曾經萬里行

君書酷似蔡浦卿乙丑師館選邀君北上

去年三月訪君家展齒行過石徑斜認得故人門巷近春風吹落緬茄花

緬茄樹天下惟高涼兩岸一本君家近焉

酒常和胡鳳亭

出郭提壺問野烟忽看圖畫總欣然分明指點尋酤處搖曳心旌未醉前十里杏花寒食路一竿風影夕陽天司勳佳句今猶在不借狂歌李白傳

僕黃五相隨半載頗誠樸可喜余羊城賦閒胡鳳亭以書索之臨遣賦此卽東鳳亭

不忍投新主含情別故樓行嗟穎士僕去似買臣妻送汝心猶戀看儂首屢低臨歧借傳語知己好提攜

硯秋刺史招寓公廡泰偶獻菊二盆蒙由香山賜詩褒賞捧讀之下感愧交并謹步原韻兩章

年來冷淡比秋花種向公門却自誇對月不嫌孤影瘦傲霜猶有一枝斜寄人籬下曾憐我知己樽前便

當家惆悵淵明歸未得夜寒空夢海西涯

刺史時  
在香港

一家梅鶴總無猜新茁芝蘭不剪萊客邸九秋容易老主人三徑肯輕開黃金借伴窮愁病

秦方失  
館病瘥

白髮

相期歸去來況有對門陳伯玉餐英送酒共追陪

對門陳心海別駕未  
曾謀面常以詩見寄

### 病中謝張晉齋

適館燈同剪連牀月再圓商量脩史筆羞澀買書錢刺任禰衡滅鞭爭祖逖先昨宵驚病信衾冷遂從前  
感君同骨肉識我在風塵躬爲調湯藥無煩計米薪猪肝頻累尹鶴髮屢思親何日吳川道相邀駐畫輪

### 有感

父老吞聲說心酸不忍聞禍樞胎土客欲壑飽官軍浩劫山川泣炎威玉石焚可憐皆赤子愁值武安君  
聞道頒新詔投誠釋舊嫌天恩原廣大將令自森嚴名字沿村索衣冠聚族殲有誰殷入告請命

### 爲閭閻

安插已云倖奔波敢自傷紅顏驚失路黃口哭離鄉去日頻回首行人亦斷腸團圓今夜月淒絕照流亡  
蹙蹙雷陽道飄颻瓊海隅生機隨日盡殘魂幾時蘇瑣尾黎臣怨關心鄭俠圖田園故無恙誰令日荒蕪

馬鞍嶺茶亭口占

鞍馬何時息勞勞又此亭星低螢火亂月黑虎風腥行李身如夢呼茶僮未醒忽驚燈欲濕雲氣隔疏櫺

寄鄭雪莼廣文

十丈長裘未可知萬間廣廈更相期典衣每好周人急倒屣仍嫌見客遲落魄豈無天下士快心惟有手中卮書生自笑身猶賤空讀昌黎薦士詩

深院

深院不聞更可憐魂易驚回甘橄欖味別苦鷓鴣聲繡枕渾無迹銀鐙倍有情曉來思昨夜終是欠分明

題鍾某翁菊蝶圖鍾時方納姬舊識校書某也

雕欄一別夢全非猶憶春風舊舞衣今日霜枝同晚節不教容易過牆飛

珠江夜泊

夜暝天如墨香圍艇似匏不知何處笛吹月上花梢

晉齋夫人以親製徽州餅見餽成一律謝之



絕好徽州製嘗新得未曾殷勤勞素手髣髴啖紅綾味與鹹酸別香教齒頰增似知夫壻意惓惓爲詩朋  
紅花店題壁

八年前過紅花驛曾見花枝映面紅今日重來獨惆悵不堪萍梗各西東

那珠尾口占

燈寒荒店夢難成預擬還家喜笑聲剛是四更催早食倚裝無語待天明

○ 自述

我生慕天性所志非溫飽飢寒忽驅人年年在遠道前年滯羊城下第形枯槁珠江秋月明照我心如擣  
去年客岡城入幕親傭保圭峯秋雨寒滴我愁如草如擣心欲碎如草愁難掃歲暮空歸來歸來貧亦好  
負米得母憐爲炊賴婦巧皆言天倫樂此樂良非小在家日宜多辭家日宜少如何今年時又印泥鴻爪  
鑑水春徂秋石城昏度曉去家雖較近咫尺關河香藉非飢與寒胡復歸不早骨肉重離別夢魂數顛倒  
安得升斗餘歸養遂烏鳥

庚午七月既望過訪柳堂呈家子虎光祿

當代持風雅先生信老成詩傳徐市國名動趙佗城定卜龍頭屬羣推牛耳盟相逢便青眼感激不勝情

千載蘭亭後披圖尙暮春前塵數張杜

柳堂修禊圖多張南山杜洛川諸公題詠

遺蹟問黎陳

堂爲獨漉故宅坐懸黎忠愍像

天未風流歌人惟忠

孝真依依烟滸柳生羨買芳鄰

指日秋風客紛紛理嫁裳人爭傳李白獨嬾踏槐黃不借科名重非關著作忙東塗共西抹讓與少

年場

先生不赴秋闈

昔望襟溟月曾題朝漢烟今登第一閣重憶廿三年

余九歲登朝臺賦詩卽知柳堂

滿目滄桑感關心文字緣吟秋捧新集

一讀一纏綿

八月十四夜闌中口占

鎖院疑天曉開簾對月明十年曾四度一枕已三更待上治安策休論離別情閨中今夜夢應繞五羊城

古意

昨夜剔銀燈燈光豔如雪如何照相逢又復照離別

子虎先生以重陽前風雨憶舊放歌寄示并約招文樹臣觀察周雲圃太守樊昆吾封君九日五層

樓登高步韻奉酬兼呈樹臣觀察

吾家數詩人古今李白好先生此筆亦仙才平揖公卿令傾倒文樹臣劉樹君周雲圃蔣叔起今夔臯紗籠

姓字詩中豪愛才人爭驥尾附吐氣獨讓龍門高昔推南山張今愛子虎李誰識山人盡友天下士小

隱栽花無宦情長篇嘯劍真詩史

和樹臣觀  
察嘯劍歌

我本學步邯鄲兒相逢醉我葡萄卮雞林競購白傅集濠閣癖

嗜生詩

投詩甚  
蒙擊賞

秋花倡無衰色宋盤摩挲三太息釣鰲南海越潮青射虎北平胡月黑前歲作重九曾躋

翠微巔滿城諸士女指說青蓮仙人間一別千餘年再來狂歌朝臺前招爾安期坡老共携手嬉笑睥睨九

點齊州煙風伯旆返雨師避蒼茫秋色來無邊長嘯問天一把酒灑向珠海澆花田今年天末空翹首詩

虎酒龍猶作否同人屈指醉翁亭惟有盧陵舊歐九

謂樹臣  
觀察

更邀賤子從羣公登高快當吹帽風襟溼

近賦柳堂柳唱霞遙答松廬松古松燾點周秦銅熊熊劍光凝血紅腸渴得酒秋飲虹颺然醉臥蓬萊峯

下方萬谷酣笙鐘搏琴拊瑟夔咨龍放歌一洗箏琶空

訂登高後集鄭氏  
夢香園聽琴瑟

九月八日柳堂試題糕

未到重陽興已豪滿城風雨歇瀟瀟探驪豈待他題試走馬先煩僕從招酒局安排纔隔日騷壇滋味又

明朝棗糕舊是吾家事消息還應問柳條

庚午十月將歸吳陽留別羊城諸知己

秋風鎖院戰方酣連日詩人酩酊談菊酒數巡催話別梅花冊里約來探

羅洞四十里皆梅花與子虎光祿約遊未果

但從文字論

交淡難得公卿說士甘

謂文樹臣觀察劉樹君方伯開雲圖太守

臨去依依槃敦地夢香園北柳堂南

十年有母望成名定卜燈花計遠程白髮倚閭勞久待青山到處喜相迎客裝燦爛千篇富

歸諸知己詩數十家我輩

尋常一第輕記取故人家海上天風吹送讀書聲

庚午冬歸自羊城舟人劉姓六月載余下場者也水淺舟膠口占二絕

雙星節近憑君渡十月梅開送我還記得如鉤帆畔月一年兩度過禪山

來日輕帆趁順流歸來得意轉膠舟江神似惜詩人別珍重舟中十日留

十一月廿四日送壽鏡兄之官澄邁

吳川城頭山月明吳川城下江潮生我將北行兄南去臨歧握手亭西亭亭西一鑑方塘水照兩人情深似此從來離別黯銷魂况是吾家好兄弟兄云此去瓊海南相期賜宴瓊林酣秋風得意已云幸敢誇弱

水無回帆勸兄盡一杯別兄萬餘里酒醒相思蘇軾州花開相望荆軻市翹首天南瘴雨開蠻花犵鳥樂  
追陪定知詩興添如許遲我西堂入夢來

辛未北上舟經肇肇吟四絕句

牂牁東去水遲遲綠盡春江送櫓枝難得舟人能解事一屏風索一章詩

怪石谿谿千萬尋壑壑終古宅崖陰此行我要經滄海不數鈴羊峽口深

西南烟水畫濛濛廿六江樓雨氣中畢竟蛟龍避詩客高吟催放夕陽紅

寄語沿途關吏儔要乘風利放中流滿船書畫原無稅莫認尋常估客舟

居庸關

不遠八千里來看萬疊山夜涼駝出塞月黑虎當關瘠地邊人苦清時戍卒閒相逢白鬚叟新自賀蘭還

五月十日天津題壁

驅馬出天津聞鵠駐海濱

君恩全下士相業重南人

借用邵語

發篋書重讀談兵酒數巡浣衣吾未忍留取

帝京塵

勇烈將軍行

古人正氣常山舌今人正命黃巖血吁嗟將軍勇且烈

解一

將軍吳川人陳姓紹其名二十好健兒三十奇

總兵黃巖出鎮赫有聲山搏猛虎海斬鯨海賊聞將軍膽落魂猶驚

解二

海風號矣海潮高矣吹角鳴鳴賊

遁逃矣將軍大呼髮盡指不入其穴焉得子登時麾舟疾如矢

解三

乘彼海潮搗賊之巢忽然潮落全舟膠

欲進不得進困獸翻咆哮誰歟後勁乃袖手將軍成功擊其肘

解四

矢盡猶張弓援絕當全忠將軍力竭心

則雄北面稽首曰臣紹臣生不能爲

國滅賊早死爲厲鬼擊賊腦

解五

天子贈將軍宮保銜煌煌千秋

祀將軍專祠薦馨香海疆餘孽方披猖雲走電掣風雷碾疑是將軍往來天上旗飛揚么麼流汗走且僵

相戒無犯將軍鄉

解六

○ 蒼梧曲代家亦樵茂才作

蒼梧之水深千尺中有二妃環珮迹綠珠墜後玉環生此地至今多麗質麗質天生好女兒桃花顏色柳  
風姿問姓自言宗范蠡捧心人競學西施九齡上學春猶小遽墮奸人機騙巧從此深閨掌上珠化爲異  
域籠中鳥流離嫁作征人婦相倚阿姑如阿母藁砧望斷不歸來塵甑炊難復何有可憐白頭飢欲死淒



涼依婦如依子辱身事小不孝大強博纏頭覓甘旨酒闌客散燭花濃手進羹湯帶笑容歸來漏永悄不寐泔泔淚滴衾爲紅無端珠市動干戈驚散平康子夜歌北海無人能叩馬南山有鳥避張羅天台山接桃源路避秦雞犬都如故依稀憶得石城西是我相逢莫愁處相逢一夕卽三生玉軟香溫早定情訪我遠來梅福市爲誰還駐洗家營美人咫尺無消息平地風波生頃刻驚聞赤水失元珠帳望銀河明鐵索無牙飢鼠忍穿墉速獄無家不汝從潛地乞援周茂叔向人誇識李崆峒一封書寄南昌尉赤繩未許髡髯繫由來彩鳳豈隨鴉况是羅敷原有壻情魔解脫亦奇緣花再嬌紅月再姘絮語相憐多難後蘭因定種未生前前因後果愁無那慧劍情絲意相左作記今爲補過人多情不似當年我指日饒歌唱柳州還鄉戰士盡封侯樂昌破鏡重圓日無限颺零訴得不

壬申三月余買姬梅萊林氏何樸卿茂才以詩扇辱貺爾時匆匆未報明年夏酷暑納涼觀潮亭白蓮送香青山窺坐姬揮扇侍吟聲嚶嚶卽君詩也棖觸舊事依和四章

記抱衾裯參昴星靈犀一點照瓏玲花因怯雨翻成顛柳似顰烟未肯醒半臂夜偎寒玉軟雙眉朝學遠山青竭來認得桃根里十里橫塘權偶停

豈是楊枝嫁樂天  
韋臬新結玉簫緣  
難忘却扇初三夜  
未到分瓜二八年  
捧硯每教猜草字  
背燈已解卜金錢  
似聞蘭氣清如許  
風送紅窻夢正圓

漁屋東西兩度春  
梳妝樣子愛時新  
相憐幸免河東吼  
太瘦居然掌上身  
不借倉庚能已妬  
添來燕子共依貧  
山妻爲熟螽斯句  
常把周南誦向人

携手微吟菡萏香  
觀潮亭畔日初長  
隔年催我酬詩債  
傍晚從渠索醉鄉  
出水鴛鴦羞對浴  
穿花蝴蝶愛交翔  
天孫莫笑牽牛嬾  
已寫銀河作報章

次韻贈黃今山茂才

當年有美隔西方  
我欲從之道阻長  
一自朝臺欣握手  
幾回見月共思鄉  
性情雅好翁山集  
詩句流傳學海堂  
今日奇才尙淪落  
教人搔首問穹蒼

張幼堂參軍有約過我阻雨不來旅館無聊撫今追昔奉寄二章

朝臺携手後相見  
在吳川賦罷新城柳  
秋柳詩盛傳言尋舊幕蓮  
丁松亭太守師焉天涯鴻爪近海外  
鯉書傳悟得霜鐘

響神交理或然

徐聞道中讀十三日惠書詢遊瓊定期

州余將入都

前詩意有未盡再成二十八字

四年三度曾相見兩度都無隔夕談今日平原須痛飲與君同醉海天南

瓊州四城門外僧寺蓮花齊開並蒂五日丁松亭太守師招同張竹隣封君陸植生郡博石蓀明經楊梅邨茂才家春卿同年暨諸公子集白衣菴卽席見示七律二首謹步原韻

芙蓉四面倚城栽都與菩提護鏡臺今日萬家生佛在同時並蒂爲公開人符韓相揚州瑞天使坡仙海外來掄指珊瑚搜欲盡蠻荒誰復嘆遺才

白衣載酒白衣菴不是重陽飲更酣當代文章在燕許一堂賓主盡東南及門李愧新陰借夾竹桃疑宿雨含夾竹桃盛開感得纏綿公子意雙燃蓮燭共宵談杏邨諸公子談詩至夜深

阿金曲

平康女兒年十六小名阿金面如玉生憐豈惹解多情慣抱琵琶教新曲延陵公子意纏綿送舅軍門正

少年密約願教金作屋癡心擬種玉成田綠陰堂畔鼕鼕鼓咫尺蓬山連幕府不惜牆頭冒雨來何辭羅襪奔波苦半載蓮花愛並頭前頭鸚鵡不知愁誰把天錢窵織女無端風浪苦牽牛堂堂作鎮一將軍令霜嚴迴絕倫豈爲同懷私骨肉豈因望氣識金銀坐上驚聞虎威枕邊驚散鴛鴦飛可憐公子遭囚繫無情棒下癢痕濕一聲棒喝一聲號帳下貔貅皆掩泣女兒腸斷太匆匆裙袴釵釵典一空攜金贖郎替郎語勿答郎背應答儂將軍虎威亦爲癢檄郎歸去難停轡當年贈佩秦康公今日誅屨徒人費三更銀獨淚花明檢點琴書爲送行願共斷魂三尺帛願同灑血五更霜再世綢繆俱不得鳴鳴獨向長亭別賸有絲絲恨萬千酒酣爲我淒涼說我欲黃金鑄阿金詩成仍付小紅吟他年節鉞重來日可有韋臬載酒尋

答友人問近況

斷酒多時別醉鄉賣文終日角名場元龍意氣都如舊只減從前一味狂

寄張晉齋一百韻

癸酉冬作於鳳城舟次

天下論交滿悠悠未可知與君真莫逆使我最相思憶說楊烏歲方騎竹馬嬉大才生不偶佳木兆偏奇

君九歲從積薪中拾七十許木生成陽文進士二字捧呈大父心偕公甚喜因繪童孫獻瑞圖徧徵名流題詠事載方子嚴觀察隨筆

進士成文巧童孫獻瑞宜崢嶸露頭角歡喜動鬚眉

遍索名流詠親舍大父飴家駒正延譽戎馬忽驚馳楊太輪飛浪蚩尤霧捲旗磨牙紛禦獠滿目橫狐

狸鶴唳風聲急鴻泥雪爪移相攸有承彥腹坦得義之

洪逆之亂君避居徽州費資中翰家

鞀鼓房中樂干戈月老絲催

妝京兆畫歸省孟光隨瘴海來溫清他山借切劘芙蓉依水泛楊柳作絲垂既啖東坡荔行揮

中宿葵姍姍驚傲骨濯濯想丰姿衆口誇張緒中心愛李烹交歡慚未敢禮數荷先施蘭槳舷

同叩桃笙扇並欵憑誰託肝膽與我互箴規書法從無草

君生平不作草書

人情決若著面藍識盧杞心

赤辨鍾馗文學稱鄒魯清和景惠衷關心碧玉聘泥首白沙祠風月今垂釣河山昔奕棋好奇禽與向覽

勝海之湄宋壘尋遺堊匡門讀舊碑忠魂長吼夜古淚少乾時

在岡州幕多弔古之作

丁令旋乘鶴同人各聽驪

居停姜子

輝太令作古

吾先返羊石君爲唱龜茲屬以登堂謁因之入室窺阿翁喜投轄

尊甫硯秋先生

仲氏愛吹簾

謂仲升令兄

待子

裝初卸開尊酒共醺整衣重拜母愛我迴如兒少飲猶防醉纔餐已慮飢居然適子館無復寄人籬旃月

更萸萸嚴霜上菊枝三秋疴忽作二豎疾親治公子晨調藥佳人晚浙糜膏肓瘳暝眩臭味敢差池知己

雖膠漆思親奈涕洟言歸吳水權愁餞楚庭卮臘月初三日前途暫兩歧明年曾有約一別屢愆期惓惓

程鄉侍栖栖王慕羈

君隨侍嘉應州署余就王厚山大令館

依人猶故我握手更同誰獨對塵衫集

君集

常叨尺素貽得書切裁

答仲紙拙言辭下水雙魚速回雲獨雁遲况經棘闌捷不唱渭城詩酒肉場空逐衣冠俗不醫一鞭趨日

下萬里到天涯挾策貂隨敵看花馬尙羸歸來頻彊知愛亦乖疑自笑遭磨蠍翻令羨伏雌

庚午癸酉鄉試君皆

不下

冲天飛有待縮地想成癡千里駕遙命六年車載脂燕巢重問訊萍水未參差叢桂全家住

寓丹桂里場

苗永夕維

雲垂陶母髮雪點白公髭一見誇騰達依然事解推感深情欸欸拜起被祁祁

伯母太夫人盛服出見

將

伯欣謀面

令兄伯展大令

諸郎習令儀傳來紅琥珀勸盡碧琉璃對月燒銀燭呼茶淪綠瓷牀連人似舊漏永話

忘疲柏約爲兄弟連番恨別離平安同慰藉抑塞各嗟咨宦遠雙親健家貧有母慈諸昆皆綽綽予季亦

怡怡一樣調琴瑟儂常賦瘵屢幾經微弄瓦輸汝叶占熊兒女誠堪笑功名更足嗤生平比稷契憔悴到

姜姬負郭全無畝爲郎竟以貲人爭笑鴻鵠誰記夢蟬蟬大府毛生刺空囊穎露雖張羅自飛鳥曳尾不

如龜覽鏡神俱赧擔簦面半鰲金憐季子盡蕭肯伍胥吹妄想知無益回頭悔或迫窮途增閱歷古語總

謾欺廣廈言誰踐長裘意本私斗升慳活鮒縫緘合委蛇吾子安時命無求信我師論文同甫白開卷見

皋夔望望呼牛馬行行食蛤蜊夜郎方自大寒士爾何爲所貴能貧賤無妨歷險巇風雲潛養翻雷雨會



揚髻歲晚舟仍滯更闌卷尙披荊州當日借金錯美人遺

前借大集未還  
君另錄副本

文漫題千字音殊託五噫吟餘望

河漢天末起涼颼

放榜後一日小飲宴賓齋贈曾次豐孝廉

今古悲歌地飢寒兩腐儒千杯宜痛飲一局竟全輸難得馴龍性相招到狗屠黃金臺下路驅馬共踟躕

李春卿明經將之太原應督學謝麀伯夫子之召賦此送之

春明門外柳千絲纔得相逢又別離風雨河山思晉塞帝王宮闕見京師何年變化延津劍少日功名博

浪樵

春卿中庚  
午副榜

珍重臨歧投贈意翩翩才調集唐詩

蒙贈集  
唐四首

四年身隔師門遠萬里心隨別夢長生羨此行親負笈翻令相送欲沾裳南歸荔子炎天熟西去滹沱落照黃長者若詢狂簡輩爲言歲歲望宮牆

○ 同陸晴霞主曹夜話

廿載相聞陸浚儀翻從失意結深知一燈分照思親淚萬口爭傳寄內詩故國春風怨楊柳近關山色學  
臙脂白頭垂老紅顏少莫戀燕姬白玉卮

出都經滬雜詩三首

日歸囊已空良朋恐相累我欲慰知己故爲炫行李森森筆成束羅羅帖滿几上莞下維簞左圖右則史  
句驪藥籠參東阿古井水所致雖不多足博老母喜誰謂窮途窮歸裝乃有此

吳淞今日鎮龍斷惟征商 朝廷事驅策乃用犬與羊非類心必異此辱誰經嘗翻我鸛鷀裘亂我玳瑁  
裝鉤罈復格磔跋扈空跳梁生平此最憤欲奮千干將忽然斂手悟轉念皆清涼譬彼趨親庭噪狗方如  
狼叱之反不敬忍之庸何傷一笑謝烏鬼還我書盈箱

古者適千里聚糧必三月今行萬里路經旬已返轍曰維火輪船迅若大鵬翼楊公始濫觴流及泰西國  
又聞有火車飛行更絕迹十里常相隨千里恰一息吾謂火輪車亘路須鑄鐵所費既不貲有事恐資敵  
輪船乘海便中國收其益長房等縮地術龍異鞭石請無載鬼車時有議自天津脩鐵路至京師者故及之而增脩海舶明朝駕雙  
輪波羅看初日

郡中書懷

丙子四月作時銜  
哀輟吟已年餘矣

蜃氣蠅聲變幻同命中磨蠍竟臨宮無端忽聽攻求鼓豈有親彎射羿弓拔劍悲歌時斫地揮毫怪事日

書空平生師友論風義都付滄波流向東

古柏祠堂舊有村年來生齒日偏繁空中樓閣丹梯盡劫後滄桑鐵券存祇學鄴侯書作架那知安石字  
爭整調停激變須臾事費盡書生涕淚痕

鐵礮戈船瘴海濱黃巾蹤跡涸儒巾未應靈運真爲賊誰信曾參不殺人魑魅天陰藏白日蟾蜍月暗滓  
纖塵使君賴有秦時鏡照膽重教泣鬼神

蠻爭觸鬪岬偏多雨覆雲翻事若何醉尉定慚呵李廣相如底苦避廉頗士寧可殺身難辱人果無猜氣  
自利安得武城重莞爾坐教矛戟化絃歌

五日江上

香草無言荔子垂美人異代足相思天如悔禍王終悟我亦傷心世豈知千古離騷怨魚腹至今謠詠嫉  
娥眉賈生別有憂時淚不見靈均灑向誰

鎮署懷古

當年藩邸偕稱雄粵海遺蹤緬海同蜀破可憐姜伯約漢興甯屑竇安豐臣心石闕悲難白霸氣木棉驚

尙紅更有龍池鳴咽水至今猶似泣孤忠

李晉王定國改署  
爲王府後有龍池

林峻雲先生惠寄長篇依韻奉答

綠楊三月歌旗亭朝來客舍何青青人生易散苦難聚有如大海風吹萍前年見公梅江曲握手樽前女  
如玉更深燭屢剪殘紅年少人誰衣慘綠白頭名士對傾城吟聲一半學歌聲玉簫宛轉依韋老羽扇風  
流想顧榮與我啣杯同話舊滄桑一十五年情公歸信義我京華屈指重驚歲月遐金臺落魄歸來日擬  
訪孤山處士家遠曳麻衣慟萱草難陪藁杖看梅花幾度相思不相見各天遙望空雲霞觀山書聲朝日  
麗阮氏多賢竹林繼令姪少文姪孫錦泉  
兩茂才讀書觀山寺爲傳公命遠投箋喜讀公詩如得第想見掀髯脫稿時吟成尙作  
推敲勢憐我被謗泥塗中笑人變態炎涼世丈夫忠信涉風波安用吉凶問龜策讀公詩罷拓愁眉鑑江  
萬頃空無際何當躡履從飛仙人間逐逐誠非計

重至金蓮菴有懷先芾南師兼柬林純士廣文

吾師仙人南斗南瓊林宴領羣仙酣自從親撤金蓮燭歸來小築金蓮菴金蓮菴續桃源記徧種名花雜  
仙卉人傳桃李滿公門天與瑯嬛真福地幾回劫火換紅羊鶴唳鯨呿古越裳惟有狀元家海上不知人

世有滄桑滄桑未變詩人老蓬萊仙返蓬萊島當年生佛護慈雲今日門人悲宿草子雲亭圯陸莊荒紅  
雨飄空綠雪涼飢鼠嚙花爭墜露嬾僧捫歸向斜陽可憐珠玉敦槃地化作荆榛瓦礫塲瓊臺廣文西河  
裔純士晉官瑯州公族振振風雅繼元都觀裏後栽桃曲水山陰重脩楔一朝點綴舊亭臺樹桃花爛漫開花開

可惜劉郎去子滿偏遲杜牧來有約淵明同賞菊由來和靖慣妻梅梅清菊淡歲寒友竭來知己相携手  
呈佛琳琅四壁詩索君琥珀千鍾酒更喜師門有替人少侶明經禪房香火話前因此中只有仙源路莫誤漁

### 郎日間津

#### ○ 自郡城至大路坡書所見

又是簪英節肩輿出郭遙人家黃檝欖官路綠芭蕉店近僕夫喜客多傭保驕曾經舊蘭若悔未訪雲翹  
將至長塘道經田家感賦

幾間茅屋結山巔雞犬雲中欲上天半世何知有離別一家無日不團圓沿溪女以水爲鏡疊巘人耕嶺  
作田應笑往來車馬客輪蹄辛苦自年年

### 和日本鈴木魯寄子虎廣文原韻

聖朝聲教日升東一統車書萬里通快覩文明南越雉關心消息北來鴻  
時傳烟台夷警誰知島外魚龍窟猶有  
海濱鄒魯風千古賞音晁監句談酣擊碎唾壺紅

石門

舊宿高賢地名同蹟豈存自慚非季路不復遇晨門行止關天意摩訶認石痕爭墩真陋習往事莫教論

石門近陽春八甲非古石門也粵地名石門者尙多

五言摘句

波光搖樹動山勢壓帆低那射嶺

樹密蛇爭路池荒蛤吠人

星低螢火亂月黑虎風腥馬鞍嶺

舊遊尋白馬新刦問紅羊河頭道中

五更眠未穩一夢見應難

真歡成幻境短夢接長更



月明燈影淡夜靜海聲喧

江流響愈急山氣濕相連江行遇雨

弟兄今夕話名利幾人愁郡中陪魯南兄夜話

命自遭磨蠍人多怪橐駝

擁被臥明月挂帆乘早潮同鄒雪菴遊花塢

倚月薰金鴨沿江聽木魚

將離偏忍淚不敢更言愁

垂楊萬條綠舞袖六雙紅

深愁憑酒掃別淚背花彈

回甘橄欖味別苦鷓鴣聲

船唇花並坐盾鼻墨纔磨

逢人多白眼知已有紅裙

避債臺難上催租門屢敲

青山飛箭鏃紅紛曳花翎高州感事

芙蓉愁濺淚鵓毒磨牙

含情拈荳蔻忍笑學琵琶

水淺舟磨石峯高纜繫雲黃泥灣

我亦牢騷者同憐磊落才贈陳觀衡

客情隨日淡鄉思及秋濃重陽後一日江門留別

山川經令節風雨黯離魂同上

紅燭雙鬟影黃花幾淚痕同上

不知從此別重到是何年

石頭凝戰血海角聚忠魂礪州

亂山圍客夢一水界鄉愁

鶴瘦原仙骨龍鍾尙俠腸贈邵墨莊

萬里天風黑三更海日紅航海

七言摘句

我輩一生無俗骨君鄉卅里總梅花贈鍾星樵

千古英雄蠻觸國六朝天子蟪蛄年

亂世君臣多舜禹窮途賓客有荆高燕中懷古

神仙眷屬林和靖鐵石心腸宋廣平梅花

慚無實用教人煖笑負虛名與我同木棉花

何堪壯士居人後強作歡顏怕母愁下第

知君雅有千金諾愧我曾蒙一飯恩

萬里壯遊經楚越百年遺事記乾嘉步楊冷漁師自壽韻

戊壘年年添白骨軍門夜夜按紅牙

歌聲夜月觴公瑾戰血秋風嘯孟勞贈陳將軍

六年兄弟師生共半世艱難骨肉知呈魯南兄

對月遙憐兒女小挑燈惟與僕僮親

生耽山水渾忘病典贍琴書未算貧

愛菊東籬天與癖采蓮西子地留名

小西湖和何掖垣

事從過後都如夢情到深時便是愁

久爲寄食田文客新得憐才穎士奴

地闢林泉宜雅集天教風月屬吾曹

東籬誰送王宏酒左手思持畢卓螯

但愁今後詩懷減不管年來酒債多

三閭憔悴重懷楚一石詼諧舊賸齊

寒生翠袖花無語濕透青衫酒不辭

燈花幾點入殘夜爆竹一聲驚隔年除夕

燈昏不睡夜微冷月黑忽驚天有霜

慧草也防多得謗蟋蟀同笑不知年連珠菌

笙簧強爲知音奏尺寸權教入手來長柄匏

生無媚骨何妨傲人到窮途易受恩

山深月出如窺客樹老枝撐欲攬人

客窓燈火宵臨帖旅夜簫聲月過牆贈黃燠南

蝴蝶有情同入夢玉闌干外夜迢迢花睡

豈有千金馱陸賈愧無一序動閻公

如此高才休傲物幾回有夢不思鄉鷓鴣

昨夜大江風雪裏孤舟一葉夢還家

萬古獨醒惟正則百年能醉幾端陽

典衣每好周人急倒屣猶嫌見客遲

白眼橫斜重對酒紅牙清脆舊彈詞和家庚仙同年

當空白日無兵氣回首青山尙哭聲亂後登觀山

花底有時防露釧風前無力不勝衣撲蝶

香寒粉煖情無限翠顫紅驚夢已非同上

來時山色銷魂別去後江聲掩淚聽

東廠有花氛障日西臺無竹淚臨風趙忠毅公鐵如意

常鑪紅粉聽琴夜近郭青山賣酒樓

菱歌遠隔盈盈水柳色深藏小小家

愁拈蓮子心全苦怕聽揚枝鼻欲酸

春浴暗窺金屈戌晚妝潛卸玉橫陳

泥人眉語傳青眼繡佛心經懺白衣



深情似水思前度小字非烟認後身

勸卿莫惜楊枝露徧滴人間沒字碑

相思每苦書難答久別誰知夢亦慳以上見海山詩屋吟草

○登高懷古

君不見蠻夷大長朝漢臺楚庭斷碣生蒿萊又不見執梃降王歌舞岡呼鑾故道經滄桑粵人登高作重  
九憑弔前朝酌杯酒人山人海年復年却閱紅羊幻蒼狗梅萼嶺西小鎮耳四圍無山只平地平坡歲歲  
亦登高信是文人多好事我聞高涼古未歸版圖權輿置郡吳赤烏石龍南訛亦附會禹功不到秦碑無  
梁陳以來始通道綱目三書費搜討山靈得姓託梅銷蠻酋立功記馮寶碭州屹起馬鞍山天水蒙塵駐  
此間一朝白雁終成讖千古黃龍去不還七百年來真一瞥元明興蹶何倉卒邇來鄰境屢干戈此地太  
平無戰血人民雖犬總平安避劫無煩費長房少年選勝都成例佳節爲名又舉觴未見黃花開滿眼先  
教紅粉列千行接天燈火人如織沸地笙歌夜未央有客東溟曾浣筆朝上泰山觀日出詩骨中含海氣

倉墨花四洒天容黑一簣爲山志易酌從來培壘卽山邱乾亨殿廢佗城遠回首天南第一樓

明陳子明讀書處

從容下車日剗切勸民辭絕跡牧猪戲關心嗷雁詩訟庭辭漸簡估舶粟頻移赤日行天酷炎炎拜雨師

忽沛滂沱雨雷公掣電鞭紅占再熟稻

是日課雙江書院詩題出太冲吳都賦再熟稻之句果獲甘霖

綠長半池蓮生意平疇外歡顏廣厦前

苗興人病起一樣總欣然

庚戌四月十日梅江旅次喜晤美生太守握手言歡談詩對酒賦二律

憶昔長安近日邊師門曾侍玉堂仙當君官舍趨庭日是我公車落第年歸權偶過黃歌浦聞絃同醉白公船而今屈指猶堪數三百三回望月圓

黃梅江上雨廉纖有約題襟韵共拈漸老友朋如骨肉當年少長各鬚髯酒逢大戶心猶壯詩學名家律愈嚴試檢楊郎落花句弓衣纖手繡紋添

步和楊美生太守無題詩二首

百鍊鋼爲繞指柔尹邢中有女巢由蛾眉衆詠憎多口鴛翼雙棲妬並頭有鳥獨銜壤海石無人共挽上灘舟何如不字工藏拙莫上鄰家乞巧樓

古妝全不合時宜懶門纖腰學柳枝麗質深閨拚自棄幽香空谷畏人知肯陪漠北昭君嫁未許牆東宋

玉窺自是性情耽冷落不關摧折爲風姨

送吳漁川觀察調官瓊崖四律

嶺南古郡重監司酌水爭傳吳隱之憂樂總關天下計忠誠深受聖恩知六飛士卒同甘苦兩戒生靈拯  
溺飢差喜樓臺光最近一輪卿月照無私

叵測岩疆伏奔多飛驚樓觀起嗟哦徒薪曲突謀先定簪水叢祠事豈訛但學狄公憑一炬無煩壯士挽  
長河從今願伐觀山石功勒燕然字不磨

千間廣廈費經營高會賓僚慶落成群道文翁能化蜀常招海客共談瀛別裁繩墨傳新學捷足飛黃盼  
後生自愧龍鍾與嘉燕感公恩禮不勝情

忽聞移節海南船惜別猶爲匝月筵遮道自然憐赤子望洋應得見青天此邦山水都無福他日封圻定  
有緣我亦蒼生待霖雨吟成一字一愴然

石孫先生濶別經年今夏到羊城匆匆返里未及拜訪深以爲憾別後成五律二章寄以代柬

老友晨星在雲間陸士龍窮愁詩萬卷放浪酒千鍾時事何堪問人生不易逢前番花舫月猶記話吳淞

咫尺不相見思君芳草深石華何處採銅漏隔城沈明日又千里故人同一心珠璣頻寄我莫惜黑如金  
周翰樵羅梅臣兩廣文招遊化州驪珠臺三首

濂溪理學足千秋昭諫才名第一流並世共推金馬客一官同作石龍游珠光未露驪方睡塵劫頻經佛  
亦愁愧我枯腸詩思澀山僧來餉雪盈甌

嶺西形勝古岩疆十載重來鬢有霜寒夜故人同醉酒清晨初地暗聞香寺環修竹疑仙境世閱滄桑感  
戰場今日中原時局異閒邀橘叟細商量

一見匆匆促唱驪空留鴻爪壁間題僧樓茶話分龍井客路花開過虎溪玉塵談詩供佛笑金鷺惜別向  
人啼從今雲樹相思遠何日河梁手又携

秋日登石門砲臺望平石鄉有感適鄭震東君以帳眉屬題率成二律

石門臺廢曠斜陽咫尺桃源水一方民氣尙能殲白狄天心未許劫紅羊畫圖不改青山舊書帶常留碧  
草長莫向廣州灣外望鯨喙鼉擲海波揚

數千修竹傍闌干權替文簫伴彩鸞自撫朱絃消晝永莫教翠袖倚天寒曲中流水廣岡綢帳底銷金記

合歡知是仙宗是塵世一般眷屬總團圓

答池大令幕友項君植藩見贈原韻卽此送別

通泗橋邊朝雨涼送行節近荔枝香君依王儉芙蓉麗我似陶潛松菊荒重到何年尋舊館早歸此日慰

高堂逢人說項眈佳句心折元方又季方

君昆仲來  
吳俱上詩

舟中無事奉寄寔甫觀察

曾陪方外訪初平

公前日招游觀山寺  
住持僧卽公鄉人也

獨向平原肝膽傾卅載神交知己淚何人乞食少年行酒邊舊恨兼新

恨畫裡三生又四生

公與張船山張春水並稱張靈後  
身所出藏三張畫卷真跡見示

鼎足樊陳兩方伯中原牛耳主詩盟

江藩樊山樊公粵藩少  
石陳公與公唱和甚密

○九月既望走送寔甫觀察得見琴夫人喜賦一律

久聞神女若朝霞快靚驚鴻更足誇自賞孤芳身是玉幸虧衰老眼無花定知慧舌調鸚鵡未聽新聲奏  
琵琶夫壻上頭剛綠鬢珠簾爭捲看烏紗

步易寔甫觀察原韵二律

新詩惠我如珠玉開府清新足比論  
芄黍幸霑郇伯雨衡茅猶隔謝公墉  
沅湘接跡胡曾左金石留心唐

兩地萍飄逐水流  
天風吹聚復回遊  
當牖紅粉鳴琴夜  
繞郭青山賣酒樓  
我自再來開口笑  
君須一醉解  
眉愁  
雪泥鴻爪模糊在  
賸有雲中月一鉤

觀心閣

此閣曾經閱戰爭  
六年人始見昇平  
當頭白日無兵氣  
回首青山尙哭聲  
幾輩漁歌樓下界  
三層樓閣俯  
高城  
石船丹竈空零落  
不見仙人潘茂名

陷信宜

青衫紅袖總無家  
回首孤城泣暮笳  
夜月歸心懸杜宇  
春風戰血濺桃花  
海寇有待填精衛  
天恨終難補  
女媧縱使休兵自歸去  
不堪骨肉與黃沙

重陽日官軍收復信宜喜爲賦此

三載孤城戰鼓擣  
傷心蒼赤半蟲沙  
忽聞將已收黃佐  
喜說軍難撼岳家  
落日降旗催奏凱  
秋風征馬歇  
吹笳空餘士女爛  
斑血化作千叢紅菊花

鄭紹堂大令以讞獄來吳川惠顧意園話舊殷殷兼及時事感賦四律



翹首師門遠滇南萬里天猶思立深雪一慟隔重泉公子喜相見門生黯自憐卅年知己淚握手倍淒然

尊公時齋夫子  
庚午房師也

憶昔趨官署公車幾日停題詩神電衛問字子雲亭琴思海天碧劍光牛斗青依依書帶草

總角羨趨庭

庚辰北上謁師電白  
官署君甫十二歲

望海樓依舊莊山寺比鄰當年生長處今日宰官身父老譚遺澤飛騰步後塵翩翩正少年循吏更詩人  
不敢論時事潢池尙弄兵君能清狴獄我獨狎鷗盟風雨愁漁屋烽烟夢帝京籌邊諸將帥何術致昇平  
前詩意有未盡再疊前韻呈紹堂大令

斗大吳川縣孤懸海角天何年容兔窟中夜吼龍泉白種原非類蒼生正可憐水深多怪族日望渚犀然  
火烈民知畏蒲鞭且暫停觀風兼問俗喜雨恰名亭繡壤雲俱綠園扉草漸青秀稂皆向化屈軼已生庭  
鄭李同時彥堂開德有隣

李堃山少尉  
同來謝獄

殺民以生道羅漢本前身月滿高懸鏡天空不受塵從來清白吏多

是讀書人

我欲摩詩壘相邀角酒兵雁行排大戶牛耳壤同盟桃葉王中令蓬山宋子京羨君添半臂如秤兩心平

兩如君留君欽  
江頃接來寓

○ 月夜過訪紹堂大令茶話甚懽歸途成詩三疊前韻

落日疏燈晚西風畫角天入城隨夜月對榻品山泉短鬢自傷老奇才不受憐乾坤正多事望子勒燕然  
萬里津沽水梯航互市停無人修棧道當日失街亭鯨浪接天黑狼烟浮漢青六飛宵旰切早晚望犁庭  
君曾歸六詔西過夜郎隣陟帖詩人怨終天游子身

居聞太夫人訃自粵兼程經緬甸回籍

塞星獅背路

緬人以獅代騎

邊月馬頭塵尙

有思親淚沾襟向故人

詩律傳家學吾慚帳下兵低徊年少事珍重歲寒盟大隱東方朔先憂滕子京何須問窮達婉語謝君平  
感事再疊紹堂原韵兼喜兩如君自欽來寓

乾坤何處寄吟身太息中原萬劫塵翹首乘輿西望遠關心消息北來真裏尸馬革孤臣痛乞食鶉衣大  
賈貧遙憶天津橋畔月舊時歌舞更無人

一辟膺華出高秋輦下公然掉臂游豈有黃巾扶漢室漫勞赤手奠歐洲諸公曲突方憂國上相籌邊獨

倚樓

剛和國獨信義和團可用

今日紛紛成瓦解可能旗鼓降曠眸

換羽移宮海上琴聖朝寬大賁綸音

上命李相赴津門議和

幹旋好借回天力慷慨應存蹈海心何事六師張九伐須

知一諾重千金漢興唐盛都如此長策和戎匪自今

醉後王郎歌莫哀挑根桃葉渡江來勸添半臂甘同夢解賦三心未易才楊柳依人得詩意梧桐棲鳳是琴材連宵要話團圓樂多事鄰雞隔枕催

鄭紹堂大令以九言古見贈依韻步和

男兒不能功名竹帛垂亦當文章黼黻昇平時胡爲雕蟲小技壯夫笑終日苦吟月露風雲詞方今海國他族實偪處乘輿西狩宵旰憂邊陲少陵野老身隔萬里外祇有夜來飛夢長相隨與君相對歔歔感時事西方美人徒繫榛苓思飲君千鍾琥珀之美酒和君九言珠玉之新詩此邦望君之來若望歲坐使彈丸俗變頽風移君家先人循良有治譜豈同無源醴泉無根芝翩翩而來輕車就熟路赤子疾苦痛癢咸周知吞舟之魚天網幾曾漏覆盆白日獨照奇冤奇不疑平反囹圄赭衣脫舊時身上無有完膚肌欣欣喜色百姓走相告誰復疾首蹙額攢愁眉有時得情哀矜淚俱下聞聲感歎堂下千人窺無何一朝羽檄急星火群瞻馬首問君何所之留靴臥轍塞道不得進有如呱呱失乳懷中兒君云此去高涼百餘里朝夕于役苟無渴與飢且留此間平原十日飲無事皇皇接浙催晨炊兒童篝燈往來夜如織道旁高蠹墮

淚羊公碑我思中原板蕩正多故今之文武吉甫君兼資爲人作嫁衣裳小試耳斯民直道頌禱非諛辭  
相見未幾握手不忍別勸君臨岐更盡黃金卮生平相期松柏歲寒友詎受風饕雪虐嚴霜欺他日功成  
圖形紫光閣莫忘白雲飛鳥從安期

送別左桐軒邑侯詩八首

製錦長才古尹何去思碑製石新磨欲知百姓遮留意馬首咨嗟試問他  
栽花五月去河陽遺愛甘棠不忍忘未得春風放桃李東籬猶賸晚花黃  
飢鴻星散室漂搖澤國三冬潦未消滿目流亡憐鄭俠圖成誰爲奏皇朝  
擬築金堤衛我民解囊都念長官貧千秋管子防河患第一良規是積薪  
新添學舍廣儲才準擬荒陬風氣開堂廡落成公去矣衣冠泣送總低徊  
藩籬撤後壁無堅佩犢椎埋盡力田化盜喜逢龔渤海白頭復見太平年  
早衙紅日未昇東耿耿臣心塞塞躬試比漢書循吏傳清廉端不愧王崇  
織塵那得掩隋和萬里雲開月鏡磨便祝布帆安穩渡碧天如水海無波

○ 和程野吾通守詩四首

宿公凱唱中興年四海爭誇識面緣  
匹馬飄然到西極大星倏爾隕南天  
皇恩議卹頻宣詔將種能詩疊  
寄箋今日海隅資保障使君腰下有龍泉

公餘騶從叩扉遲小雨剛晴月上時  
渡水雲歸隔江樹迎人花簇出牆枝  
盤中紫蟹聊供客門下黃童喜  
得師相對論詩清不寐銀缸重剔照龍茲

一幅新詩荷葉香明珠顆繞碧沙涼  
論才頓覺乾坤窄適意全教寵辱忘  
坡老文章雄嶺外安仁宦蹟重  
河陽從來循吏需名士莫爲鱸魚遽憶鄉

髻齡公子逸群才束髮躬陪榮戟來  
雛鳳試鳴初日上稚篁新長嫩晴開  
稜稜瘦骨臨風立緩緩清歌步  
月回愛我園林頻有約何時再訪剡川隈

感事三首

震旦維新說自強伊川披髮禮先亡  
幾人誤國王安石徧地坑儒秦始皇  
忠愛何知有君父文明偏欲毀  
冠裳書生老眼無多淚只爲憂時灑數行

國恥傷心廿四年扶桑東望小如拳帝秦不少新垣衍蹈海今無魯仲連受命儼然師大國喪心翻欲罪前賢中興諸將俱千古撼樹蚍蜉亦可憐

南海原稱富庶區而今新桂米如珠繁華易罄陶朱產荒歉頻翻鄭俠圖況復徵兵憂寇患那堪供稅間屠酷安危日望封疆吏民氣凋殘總未蘇

步唐象五大令夜飲觀潮亭賞月詩原韻五律四首

小結海山屋遙連水月臺

一統志載極浦亭在城南河畔水月臺在吳川西北

滄桑名蹟在風雅使君來玉宇高懸影冰壺不著埃嫦娥

解人意照客盡千杯

寒士不知寒歡談到夜闌萬間思廣廈幾度倚危欄仰首月中桂同心砌畔蘭兩家好兄弟佳節互盤桓三五秋光皎平分是此宵青涵天似水碧湧海初潮擊節銅琶唱臨風白袷飄當頭叩宮闕咫尺廣寒遙公才非百里百里試才長罰酒無苛政裁詩有別腸樽前問民隱野外邨農忙從此閒花本逢春總向陽

筆授軒

在青雌朝佛教昌楞嚴一卷授平章寫經貝葉中書老落筆詞林正諫忙異代有人興土木至今遺硯重



琳瑯如何佛力終難護車戰陳濤誤乃郎

卜築高軒傍佛場榜題筆授費參詳僧傳梵本藏光孝地闢虞園仰仲翔繙譯楞嚴朝說法寫經室淨夜  
生光謫選房相簪毫處韻事追思引興長

沈香浦

縱飲清泉不易心歸舟南浦北亭陰祇防盛德纖塵累豈惜名香大海沈洲畔包拯傳擲硯臺邊楊震記  
揮金梅江亦有投錢水廉吏清風說到今

廉能處密衆皆欽前浦遺蹤尙可尋擲卻異香先飲水勵將清操豈懷金風流一瓣猶堪思日守三箴不  
易心歸次已無長物在令人景仰幾沉吟

還珠亭

珠池珠去總無形忽報珠還水亦靈入夜光芒重照乘使君高潔自名亭明蟾對影曾相識老蚌含胎已  
漸醒有客探驪誇手熟高吟風雨晝冥冥

明珠隱耀久潛形太守循良物効靈池產夜光還合浦人懷風化建新亭翼然美矣高臨水魄滿胎成燦

散星昔日孟嘗能再造善將爲寶德維馨

擲硯洲

笑比河清第一流相傳擲硯向芳洲苞苴不到閻羅殿風浪無驚廉吏舟一任蛟龍吞膽墨試拋鸚鵡付浮漚鬱林應被江神笑當日歸裝石尙留

包老廉明孰與偉端溪貢產儘堪酬歸裝簡嗇無餘硯治績神奇聚一洲不俟河清持比笑非因瓦解擲相投淵深千載留遺澤那許汾泥逐水流

筆授軒以下至此應試觀風代人擬作

作州箴

州箴有作仿虞箴都是相如諷諭心堪怪群儒多刻論茫茫千載少知音

奉錢三

同儕祇是奉錢三贏二千秋播美談容易風塵識天子蕭何畢竟勝曹參

周人犧

自古周人性最犧史遷貨殖傳何嫌公卿漢室門如市爭及於陵仲子廉

畧舉凡

熊館長楊草未芟鼓鐘韶磬奏雲咸萬言獻賦多揚厲猶道先生畧舉凡

歌青蠅

荆江伍息論誰憑樊棘重歌貝錦憎堪笑虞翻少知己寥寥身後望青蠅

羹頤侯

兄子祇封羹頤侯沛公轅釜念前仇當時分我杯羹語不識而翁尙記不

臚句傳

五色祥雲朶殿前上臚下句互宣傳姬公制作分明在想見諸侯朝洛年

豐草蓼

四月青青已秀蓼女蘿爭施草惟條萬年誰奏房中樂應有薰風叶舜韶

金石交

推解深恩勝膝膠笑他辯士枉譏嘲丈夫一飯千金報何況君臣金石交

反離騷

岷山江接汨羅濤不作離騷作反騷  
結似賈生弔湘水傷心蘭茝溷蓬蒿

瓠子歌

萬里防秋未渡河閭閻終日望恩多  
泰山纔見車旂返又聽三秋瓠子歌

東陵瓜

青蔓交棚不斷花無人知是故侯家  
東門黃犬傷心日應羨東陵學種瓜

赤白囊

尺短從知寸亦長相公大度善包荒  
車茵吐汙尋常事偏是關心赤白囊

棄繻生

鼓角喧迎關吏驚棄繻遮莫笑書生  
即今南越猶多事可有終童願請纓

緯六經

史筆如椽本六經光垂日月緯群星  
豈知二百餘年後猶有經神向乞靈

秧鉞

朝來新雨浥平疇遠望新秧綠似油一樣鴛鴦風暗度雙飛鷺  
潮水交流香闥欲把荷錢買繡陌爭同柳線抽無數登樓人乞巧誤將初夏認初秋

秧馬

誰傳巧製到田家一抹鞭痕嫩綠斜細雨低昂泥滑滑斜陽叱撥路叉叉莫將皮相窺神駿自有拳毛詫

遇調人世是非何足辨小窻初夏讀南華

作州箴以下至此亦觀風代人擬作

步林韻宣西江學堂留別元韻八首

一髮千鈞繫此身玉堂仙吏駐風塵莫忘兩世冰霜操好作他年柱石臣駿馬已曾招郭隗桃花今又送

汪倫臨岐恰憶唐賢句衛瓘諸孫衛玠珍

用元徽之句

當時而祖在盧前鳴鹿同歌庚午年榜後豈知成永訣天心誰信總無偏愁聞向秀山陽笛愴輟鍾期月下絃今日竹林才蔚起與君香火證因緣

名山盤礴廟堂懷驚起南州昨夜雷仲冕不關登上第季鷹自是出群才天顏咫尺趨楓陛風骨峻嶒重

柏臺從此長安知日近幾人翹首望三台

西江話別柳絲垂遠送諸生馬足疲西學從來本中學經師端不愧人師公門歡底千間厦祖道稽延十日期多少離筵詩子弟醉中分手夢中隨

去年訪我叩松扉小飲甘談酒力微歷數詩才宗杜甫偶論名法異韓非三更枕石陪雲宿萬里摩天羨鳥飛屈指別來經一載每思情話尙依依

嶺西巖邑亂吹笳士女倉皇田父嗟白日攪人徧引虎紅燈當路陣成蛇經年野外無青草避世源中有落花畢竟黃巾知重道隔江遙拜鄭公家

十年圃叟息機心抱甕閒行繞漢陰種樹頗殷霖雨望搔頭那管雪霜侵一犁霑足耕青畝萬木葱龍接

翠岑寄語當今韓吏部有人簑笠問朝簪

京華舊雨尙存尊師于晦若侍郎一人願爲候及

金鰲橋畔曉車驅當代賢王重鉅儒年少居然掌樞密生平從未識臬盧曾隨元老依朝右應爲蒼生念海隅指日中興議新政臬鵬禹拜共都吁

謝別易觀察實甫步原韻



挂帆朝霽縠紋平猶記前宵酒共傾如此江山人小別是何濡滯我遲行感公親愛如昆弟垂老艱難仗友生一紙新詩勞遠寄梅花重訂竹松盟

和文觀察樹臣游觀山寺原韻二首

如此探驪豈讓劉情深懷古復尋幽永嘉兵革歸陳迹粵徼風烟壯宦游昔日有人悲淚鶴先生遺世等閒鷗謂潘仙即今東望浮邱遠彷彿城中十二樓

旌旗高擁酒千卮猶憶乾坤嘯劍時

觀察著嘯劍山房集

萬古仙經遭劫火一篇柳雅繼韓碑想忘樵客觀棋久最喜

門生問字奇丹竈石船零落盡祇應報德有專祠

癸未南歸舟經福州頭寄姪椿園

憐爾依人閩海頭新年遙望不勝愁那知咫尺難相見白浪如山過福州

辛亥易觀察定甫惠寄大著數種謹賦七律四章誌謝

抗直聲名震九垓繡衣持節鑑江隈揚眉喜近階前地焦尾慙非爨下材卿月海隅獨私照朶雲天上忽

飛來浣薇相對臨叩令感激臨風讀幾回

大著由池滋鑑大令轉交公致大令書於文泰獎譽過情逾常猶挹可愧亦可感也

束笥珍如拱璧貽一斑欣已豹全窺歐公家世瀧岡表白傳風流樂府詩鈴峽循聲鄰境播雞林重價遠  
人知雷門布鼓何堪問如此虛心是我師

當代人才第一流卅年曾未識荊州感公說士猶甘肉惜我懸車已白頭春雨如膏流赤地夕陽倒影上

紅樓公家治譜分明在好爲蒼生借箸籌

公才大心細議論抗直而一歸和平蓋本方伯公仁書之教也

斗大城懸海上孤年年薪桂米如珠傷心野祭伊川禮太息流亡鄭俠圖况復春田憂旱魃恐教夜火聚  
鳴狐使君自有匡時畧無使書生老淚枯

○ 陳橋驛

陳橋驛叛兵起都檢點作天子黃袍業已加身矣製酒欠伸猶未已衆拜萬歲呼不止掖之上馬如童稚  
入汴又報韓通死六軍迫我竟到此慚負天地空流涕崇元殿行禪代禮華山道士墜驢喜天下之定自  
此始嗚呼敬瑭朱溫亦等耳可惜千秋冷人齒

病起

春風欣長舊愁根問疾剛宜燕到門行過小庭花落盡半簾斜月破黃昏

夢

昨夢一何杳想來秋水間曉光留不住魂氣擁西山

舟中有見

孤舟搖落對江干雲隔巫山入夢難贏得倚樓人一笑恰如春影畫看

閨謔

晚來私緩秘羅裳消受嫣然一剪香忽地背人含笑語不教明月得窺房  
亭亭秋影下迴廊小立多時重整妝卻怪海棠經雨後故將啼眼殢檀郎

戊寅春日懷雪廬家比部六十韻

君昔官朝右吾方臥海隅聞名同渴慕爲客忽飢驅橐筆遊雙闕歸裝卸二禺

戊辰冬雪廬歸自京師晤於羊城雙門書肆

天教成邂

逅事記未移糊惓惓初携手鬢髮始有鬢燕姬雲鬢髮趙女雪肌膚山色胭脂奪土音鸚鵡呼杯啣紅琥

珀燭映碧氍毹豁達劉公幹英雄孫伯符高談常竊聽淺醉不須扶偶述瀛洲勝相期翰苑趨生花分彩

筆調墨和金壺知己拳拳切當年事事迂風塵自勞碌筆硯久荒蕪蠹飽書高束鴉翻字漫塗爲人忙壓

線愧我濫吹竽秋戰文雖捷春明局屢輸世情嘗冷煖歧路忍挪揄奉母思求鯉還鄉詎爲鱸布帆南海  
便護草北堂娛永感蓼莪廢深情桑梓俱抄詩教稚女讀禮授生徒與子居尤近忘形迹靡拘重乘舟訪  
戴慣擲雉成盧往者命磨蝎何人威假狐余羌逢醉尉公亦叱豪奴鈎黨同膺秦株連逮顧廚驚心人下  
石射影鬼張弧黑白棋終判艱難道不汙笑談消大獄忠信涉危途雲散天無滓花圍月不孤探梅選舞  
伎畫壁狎歌雛人羨真名士儂還愛拙吾

比部亦  
號拙吾

風流古人並高義近時無李愿歸盤谷知章戀鏡湖春

烟李園序夜月輞川圖攷古周秦漢工書顏米蘇辭官忘寵辱養志喜恬愉千仞高翔鵠三春反哺鳥跡  
稀入城市交訝湘屠沽口不談人短心偏厭客諛券焚比馮煖因指贈周瑜壯我風雲志都無薪水虞去  
冬蝗害稼今歲米如珠佃餉紅蓮稻農輸白粳租

蒙命佃輸  
粟余家

喧傳動鄰里歡喜到妻孥負米思猶觸嘗新涕

轉濡一家銘肺腑每飯拜醪醕予季才原拙先生禮獨殊學醫慚扁鵲延譽噴家駒交誼論三代時艱念  
八區中原徧飢饉薄宦總崎嶇不作京華夢空教歲月徂鵬鷃良友典茉莉美人沽遠信懷鴻雁將行阻  
鷓鴣乘桴偕仲路泛宅擬陶朱人日吟花粲天風鼓浪轟立春頻悵望隔水獨踟躕酒醒添離緒詩成償

宿逋招招曾涉否旭日賦叩須

約渡江見  
訪未果

贈黃雲臺大令七古

吳川孤城大如斗，風伯揚威毒龍走。頻經殘劫換紅羊，又見浮雲變蒼狗。前年水潦連刀兵，今年旱地無人耕。豹狼吮血已足畏，況有滄溟跋浪之長鯨。養軍千日，豈能戰延議連鄉。起團練，中原火急羽書馳。無間要荒與侯甸，紛紛捧檄多能員。就中無過黃公賢，隆冬雨雪朔風勁。輕裘緩帶來翩翩，節署昔曾聽公鼓。燕公衛公最相許，說士真如食肉甘。書生親見籌邊苦，下車問俗心惻然。井廬殘破民顛連，赤日燒空地龜坼。往往萬竈無炊烟，此邦亦有愛民吏。滿目瘡痍同涕淚，災黎感激奮臂呼。修我戈矛敵王愾，旌旗變色耀日明。不辭枵腹從戎行，方今九重尙宵旰。但願四海皆昇平，聞名相思三十載。杯酒相逢華髮改，話到前塵似夢中。老輩風流幾人在，公歸攬轡獨踟躕。太息民生未易蘇，會須濡染黃筌筆。重繪流亡鄭俠圖。

步黃雲臺大令原韻五古

同治多詩人，梅蔣文劉方。景星聚羊石，萬丈光芒長。旗鼓張雄軍，賓從皆鄒陽。吾宗南海子，結社深柳堂。公時年最少，滿腹羅青細。書名比香光，詩法宗漁洋。傳觀互擊節，四座聲琅琅。擱筆畏後生，諸老紛頽唐。

予力困公車磨易曉不遑參商久涸絳京落空游揚世軌始識莽忽忽鬚眉蒼王事獨賢勞時局增憂遑  
吞舟漏鯨鯢臥榻肝犬羊恃公定指揮小醜庸何傷衆志能成城危地如康莊藩籬慎勿撤蚤夜嚴提防  
旌旗動蔽野千櫓多于櫓臨行示長句三復玉局章一語轉贈公霖雨蒼生望中原待澄清雲路看翱翔  
會奮北溟翮遙祝南豐香

○ 仿王漁洋秋柳原韻

未到凋零已斷魂那堪葉落掩重門老來西子增愁態送盡東皇只淚痕去馬一鞭秋水渡歸鴉數點夕  
陽村香山善病楊枝遣人事蕭條忍共論

不堪蕭颯五更霜斷梗颺萍滿野塘怨笛誰翻新樂府舞衣都疊舊巾箱蛾眉慘淡憐邢尹燕語淒涼說  
謝王畫舫春旗零落盡幾時重過碧雞坊

玉門一去淚沾衣枉覓封侯悔昨非散盡黃金春易老欲邀青眼世應稀傷心庭院誰人在滿目關山獨  
雁飛苦憶柴桑陶令宅天涯留滯素心違

瘦損腰圍劇可憐漢宮曾憶散輕烟曉風殘月人惆悵落葉哀蟬思渺綿少婦含顰傷昨日英雄流涕感



華年當時走馬知何處腸斷朱樓大道邊

西風殘照愴吟魂幾樹蕭疏近白門憔悴幾時還著色飄零無處不啼痕三生泥絮埋荒驛一抹烟絲畫遠村爲報宮腰消削甚顰眉相對不堪論

大尉將軍鬢有霜亞夫營近戚南塘曾經東向絲千縷又綰西成黍萬箱送客尙堪留去馬封侯今已見擒王穿楊箭定天山後重醉斜楊賣酒坊

無復青春惜縷衣舊遊風景認全非塢亭陶侃關心久煨宅嵇康結伴稀臺上千年游鹿散城頭一曲唱烏飛慘穆且作風前舞宛轉由來與願違

紫紅綰綠故相憐曾惹靈和殿上烟畫鷁再來空繫纜黃鸝一去不飛綿長亭寂寞成千里短夢惺忪又一年料得春歸猶旖旎旌旗待拂鳳池邊

步蕭雲汀廣文原韻

嶺表論耆宿

溫伊初

黃

香

錢

舊擅名經師推後起函丈拜先生愛日義堂慶憂天杞國情叢叢書帶草留伴鄭

康成

居與聖人近榻因孺子懸無端絃誦輟偏地鼓聲填未列鴛鴦陣空歌獵狁篇天心應悔禍劫運莫教纏  
土地容輕割華夷竟不分衣冠淪異族籌策仗神君雞犬靜無擾豺狼嗥豈聞是誰寄專閫閒煞水犀軍  
我豈非窮士公猶屈冷官寡營甘淡泊無計濟艱難成敗惟觀奕嫌疑不整冠隔年曾有約東海共垂竿

贈馬介堂軍門五律四章

小隊元戎駐登臨野趣長山光延爽氣塔影臥斜陽寫下千家爨帆邊萬國航九重宵旰意鎖鑰重南防  
黑子彈丸地鯨呿鼉擲時雙峯閱今古一水界華夷朔雪孤臣節東風大帥旗請看羊叔子留重峴山碑  
書法顏光祿威名馬伏波銀鈎兼勁健銅柱尙嵯峨舊勒燕然石新收曳落河籌邊喜無事樓上譜饒歌  
白髮顏唐老書生罷讀纓軍門容揖客禪堂坐談兵帝德原無外人心底不平浮言資重鎮未厭鼓鼙聲  
和邑侯賈子釗壽詩二首步原韻

海邦民氣樂無窮難得深情上下通三月閏餘歡酌咒萬家災後拯嗷鴻梯航早定綏夷策宵旰無煩厯

聖衷堪笑蜃樓空變幻一輪紅日正當中

是年與法人定  
廣州灣租界

春霖已慰老農憂從此豐年喜有秋父母幾人歌召杜宰衡他日望伊周剛逢桃熟筵初啓勿剪棠甘愛

共留我亦蒼生同介壽絃歌聲裏數觥籌

和江旭初先生重游泮水二律

松柏凌冬菊耐秋鸞旂芹藻憶前游天教梁灝登科晚人爲劉蕡下第羞

先生秋試累薦未售

頻壁回頭皆後輩晨屈

指幾同儔祝公會奮圖南翮未許鯤鵬伍鸞鳩

當年鵠峙與鸞停曾記名園足屢經

庚申館政嶺過從甚歡

勝會流觴過上已深談聽漏轉東丁蟠桃一別喜初熟修

竹再來如舊青八十神仙五色筆世間好夢合遲醒

五月二十二日易寔甫觀察招同楊芙生太守周相宸監督家玉山觀察家鏡臺彭仲芬兩校員蘸

集仙易亭疊韻賦詩志謝

萬古一剎那轉瞬已陳迹仲尼纂易經茂名隸仙籍至今千餘歲望古輒於邑使君篤好古修廢蒐故實  
斯亭獨巋然斜倚鑑水側公餘事游憩有酒清且冽醉中一揮毫詩成壓元白緬昔晉永嘉中原矢蜎集  
塵網衆方擾亂機誰早悉遐哉鴻冥冥人世面罕覩神仙偶託耳保身善占易後人名其亭書佚字不佚  
扁大壁窠書瘦硬頗超逸主人愛真蹟徧指示賓客重翻屈更注殷勤爲余述聽講來兒童窺戶髮覆額

捲幔兩初晴跳丸日未入隔江露烟霽峯巒數歷歷入座重傾譚時過申酉戌楊侯工賦詩足下躡飛寫

周郎正年少弟子多人室老吏推吾宗雄辯驚對席李彭皆詩人得句互擊節非公首提倡山川亦閑寂

我雖恨來遲勝會復躬值愛公古惠人鄭僑晉羊肸授餐賦縑衣判牘振彩筆仁書恪遵循

尊方伯公著仁書上下編弊

政務搜剔方今論時事相對涕每出嗟哉群兒愚流血未爲碧中國如沸羹強鄰伺間隙閱牆侮不禦開

門盜先揖舍生仁人仁爲諒匹夫匹所仗出群才綢繆牖戶葺易象繫苞桑自強天不息治亂一轉移各

自適其適我成種樹書橋中有仙奕欲知樹蕃植先辨土性質寡過愧未能生財或可必持以贈窮民便

當點金術

實甫觀察枉答仙易亭齋集詩再疊原韻

高涼屬揚州通道神禹迹夏殷尙狃榛漢晉歸版籍潘仙生長地洗氏湯沐邑昔余纂郡志事事徵諸寔  
嶺西動干戈誰歟安反側王室旣凌夷苞稂下泉冽女中有桓文晉重齊小白號召群夷曾尅期大軍集  
隻戰中輟才韜鈴幼嫺悉都督非常人一面豈虛觀成功身未退受命姓幾易三齊本綱目志乘焉容佚  
洗氏真英雄潘仙亦隱逸使君乘輅來公餘日見客關心求民瘼喜聽父老述扶杖多貽背登堂有黔額

如何近仙鄉群盜屢出入巡行覽形勢四境遍周歷畧地西徂東讞囚辰至戌棲棲方叔車几几元公寫  
先施禮爲羅賤子一至室憐我齒加長公醺推首席謂我來何遲已過啖荔節衙齋容下榻慮我客中寂  
連城抵砮砮千金敝帚值定知琴志樓天女笑脣脣我欲畫西施恨無生花筆眼福飽琳琅銀燈夜深剔  
樊山大宗師花樣常百出樊山方伯佳什甚夥珠玉唾隨風珊瑚樹交碧詩家兩長城偏師曷攻隙傾頰首至地安敢  
論平揖廬陵與東坡並世罕其匹我將挂歸帆草堂待補葺望公得行志民安盜以息興漢亮復生舍魯  
吾何適笑彼爛柯人千年尙酣奕神仙不可見鬼神自可質試拜夫人祠呵護堪預必人壽屢豐年細注  
齊民術

### 感事三首

建牙吹角控番禺坐擁臣佗舊霸圖叔世蒼生望殷浩女閭紅粉拜夷吾嘗聞霖雨敷山左又見魚鹽富  
海隅弊俗未除終憾事黃金虛擲牧猪奴

連營弟子學衝鋒費盡天儲百萬供遺患豈知同養虎立功爭欲效從龍倒戈靈輒寧甘餓入海孫恩那  
可逢誰喚少年癡夢醒海幢清夜一聲鐘

不重鬢宮重學堂泮池零落草全荒幾人誤國王安石遍地坑儒秦始皇尙有廕豚酬宿學如聞岡鳳嘯  
朝陽白頭捧詔心先喜敬熱南豐一瓣香

題姜子誠蘆蟹畫扇

未屑春風桃李爭斯人不出俟河清橫行偷借文章力會聽傳臚第一聲

題鷗蚌相持圖

開口不如緘口好入頭容易出頭難早知終落漁人手雲水翱翔各自安

西施臂

曾准吳王入夢來輕牽錦檻上蘇臺一彎莫笑嬌無力越國山河藉挽回

硃州

一代興亡問石頭硃州誰誤古岡州詩人只訝遷厓速曾未乘槎海上游

懷吳文泉先生

風雪橫塘暮相思不可逢尋君一夜夢涼繞萬株松  
時文泉居橫塘之萬松山館聽講來孤鶴吟詩驚老龍曉鐘忽催覺



衾畔覓無踪

送黃儼球之肇慶麟館

星月楚庭秋鄉情逐水流皖公思縮地少婦憶登樓千里蒹蘆思頻年書劍游前程正無限未許更言愁

贈女校書從良失所七絕

青衫紅袖各風塵兩樣飄零一樣身我誤讀書卿誤嫁大家都是可憐人

訪妓桃花從良七絕

桃花流水杳無因前渡劉郎莫問津重過溪山曾訪戴西施遠作五湖人

朱覺斯過訪有贈

鏡中天影一江清鶴迓與臺聽友聲身帶嶺雲猶繚繞覺斯新自省歸談如川水任縱橫共看春燕巢林木時吳川城爲大

風所蕩幾無一棹得舊觀忽訝長虹飲浦亭正是微風鮮市好醉吟海月共潮生時瑞端士亭君邀余同席

遙尋海角訪吾廬蘭芷相馨興不孤欸署可書甥壻壻端士於余爲從甥覺斯又爲端士外孫壻談知于禮友夫夫覺斯與周君相宸交好君來

發嘯成天籟我笑吟詩見道腴進取文章建安骨莫從拈韻習妃呼

疊韻和容小堦上舍麟將之新會

鞋健衫輕帽半斜隔年兩度到君家須知崔護重來意不爲桃花爲棣花

兄弟到台處蒙着小簪揮扇余有贈我桃花扇底風之句余猶感之不置

欲破愁城借酒兵難追樂府頌清平匆匆只和西堂句權當陽關第四聲

綠楊三月別君時萍合蓬飄早自知記取梅開便相見不教猿鶴怨歸遲

疊前韻張晉齋茂材錫康七絕五首

柳影毵毵月影迷牽衣江上送行時風流張緒當年態惟有妝樓少婦知

笑指西樵曉霧籠嵐光滴翠日初紅畫眉人愛看山色眉黛依稀似鏡中

絮語萍踪握手纔相憐同病強懷開

余病疥君亦病咳

癡心願倩珠兒女繡出平原公子來

連日同舟慰旅情芙蓉幕下各歡迎此邦大有奇山水要與諸君載酒行

苦吟一字費商量多謝相投七寶裝自笑近來詩思澀輸君得句等探囊

步張晉齋喜得家書原韻

不接家書已數旬羨君庭訓遠傳薪同爲幕府青衫客

與君同困一吟

各憶門閭白髮親若使贈袍張祿貴寧教

負米仲由貧如何針線難拋却作嫁年年總爲人

幕中有感疊韻兼呈家紫珊張晉齋

無端病作忽經旬雞骨支床比臥薪對月遙憐兒女小挑燈惟與僕僮親生耽山水渾忘病

署後枕圭峯諸山又有方塘半畝

典剩琴書未算貧從此蹢躅強行步籠詩來訪謫仙人

記從九食嘆三旬珠米何堪又桂薪離別蕪山愁作客經營菽水爲娛親仲宣已耐依人苦鮑叔由來知我貧若說工詩窮更甚玉堂簪筆是何人

送鍾硯雲之西南爲居停索逋糧

連宵宮燭照團圓忽報牙琴別調彈最好泛舟同范蠡何妨焚券學馮驩

索逋例有紫洞艇道遙河上

生愁蓮子離心苦

聽唱楊枝客淚酸惜否圭峯山色好回頭祇向夢中看

瀟瀟梅雨落花餘不見如眉月一梳南浦送君傷別賦東門有女憶同車籠燈報喜重占鵲彈鋏思歸豈爲魚何日鑑江雙買棹石船西畔採芙蓉

送黃簡臣之西南糧局

從古西南例得朋蓬飄萍合有前因卽今換羽移宮者猶是同舟共濟人

君此席與鍾硯雲互調

此去好尋花解語

君斷弦未續

臨行相送柳含顰重逢記取中秋夜休負天涯月一輪

訂以八月旋署

### 疊張晉齋家紫珊韻再送簡臣

十里長亭又短亭渭城三唱雨朝零來時山色銷魂別去後江聲掩淚聽從此相思寄紅豆與誰共起舞  
青萍柳枝也解離情苦怪底顰眉不肯醒

### 夏夜張君拱宸以詩見贈步韻答之

橫塘四月已如秋欲採蘋花不自由眉筆乍描張水部手書先寄李台州吟來髣髴聽笙鶴病起蹢躅笑

杖鳩

時疥疾新愈

最好看詩涼夜坐綠簟深處一螢流

三年聞說鮑參軍玉尺曾量鎖院人名士從來皆鸞鷟吾家敢信有機雲

君在隸三年曾商閱試卷季才舍弟深蒙器賞

同聲幕府嚶

求友孤影關山雁憶群剛是鄉愁眠不得高吟一度一尋君

我本清貧儋石無白雲親舍隔平蕪久爲寄食田文客新得憐才穎士奴

僕資姓新來一月

人笑彼花將玉女誰教

寒素執金吾與君且覓西湖醉同訪扁舟范大夫

城外有小西湖

從此聯雲視共磨齊名當代卽陰何但愁今後詩懷減不管年來酒債多豈有地仙留阮肇更無天女件  
維摩旁人羨得烟波侶識否浮家舊志和

步家紫珊原韻五章

五色當年賦日華奇才端合屬吾家而今老橐依人筆猶是青蓮夢裡花  
未必天心總忌才暫教吾輩辱蒿萊請看車馬題橋客都自窮途賣賦來

潦倒名場可奈何青衫重檢淚痕多生憐千載蛾眉老嬾逐春風嫁綺羅

先生不應鄉  
闈十數載

年年黃鶴去西樓孤負梅花事遠遊靜福山深何處是空教清夢到羅浮

靜福山人  
先生自號

剗剗功成著作身開編人恍到仙塵誰知恨不同時者卽是今朝入夢賓

余于半園尺牘中識先  
生者垂廿年今始把晤

岡州紀勝疊韻

遠勝圭峯頂披窻畫幾回黑雲陰雨合紅日瘴烟開殉宋悲臣節推袁憶史才

圭峯寺壁袁子才先生  
望雁門詩真蹟尙存

群山隨

腕下爭擁入城來

馬山象山  
俱在城內

重有西湖約知能踐否耶只愁門似海未許客浮家

幕中不  
便出入

小小春藏柳盈盈水隔花何時大江去高唱

撥銅琶

倚馬山房客奇才不受憐

謂卓市茂才

自慚王儉幕先讓祖生鞭得意箋頻擘多情錦偶纏吟成須驗取舌本

定生蓮

醉題姜石卿別駕荻江釣魚圖

懸崖怪樹石槎訝盡日孤蓬宿荻花莫笑一竿無事業釣璜從古屬君家

端午日感賦

客中逢節都忘卻夢斷驚聞艾酒香萬古獨醒惟正則百年能醉幾端陽紅燈蒲宴陪東道白髮萱幃憶北堂怪底嬾看人競渡奈他江濶恨偏長

七月望後家鎬川孝廉何赤珊上舍陳魯池少尹招同張晉齋茂才沈滋生少府夜集小西湖歌航

舫醉賦

吾家太白酒中仙招我西遊夜採蓮白舸對花携手坐幾人指說孝廉船

兩桁紅燈照坐時環肥沈瘦最相宜

日好較書頗有玉環態度沈滋生弱不勝衣適與連坐

妬他今夜陳搏睡占得秋風桂一枝

小妓秋桂係魯池舊識



琵琶聲急可憐宵猶是天河阻鵲橋湖外梵音湖裏曲一般傾聽總魂銷

孟蘭道場未畢

扇拍洪崖送酒卮

阿佳校書醉拍余肩

秋波斜轉惹相思張郎筆染何郎粉留取明朝各畫眉

京兆風流唱懊儂佳人翻遣別匆匆臨行無限纏綿意贈與桃花扇底風

阿佳與扇贈晉三

雞聲催月下城西索筆權留去後題他日再來應識我尋將詩句當鴻泥

### 張晉齋梅花帳眉屬題二絕

暗香疏影月初三驛使傳來畫意酣空贈一枝好春信教人能不憶江南

君江南人

巡檐難索笑蘇蘇紙帳鐙寒影太孤爲問連宵清夢裏師雄曾見美人無

七月念一日鍾卓甫文學招同陳續參唐荔卿鍾硯雲關梅皋譚百峯何掖垣家舟之諸君夜宴小

### 西湖上率成六章奉謝兼索和章

本是蓬萊吏宜居第一峯登場君倚馬在泮墀成龍

卓翁居倚馬山房時方食醵第一令墀陳君七

亦遊泮喜自門楣溢情兼山水濃遍

邀名士會青眼到吳儂

約泛西湖棹因開北海樽小名花遂意低唱曲消魂

謂遂意今好兩校書

粉膩添詩料衣香漬酒痕主人情重甚留醉

苧蘿村

難得當秋夜花前半白頭

坐中百巖先生年七十九掖垣先生七十五續參先生七十二舟之先生六十五荔卿梅泉先生皆五十餘

老人聚星朗少女愛風柔上壽何

中令多情陳太邱孤山遲訪鶴還作小勾留

舟之先生明日有鶴山之

少年華山集都疑是古人

百峰先生博學著書數十萬言余六七齡卽於族父雲門先生處拜讀大集

蟲魚勞注疏龍馬健精神一見新如故多文富

不貧天留此老者管領六橋春

先生家六橋側

更有鍾期裔知音相對彈

謂硯雲先生

青衫遮莫濕綠酒會須乾舊雨芙蓉幕春風苜蓿盤

荔卿先生客閩幕一載同梅泉先生亦司鐸於此

來與嘉宴竟夕盡君歡

待折離亭柳驪歌各黯然

居停將解任余亦瀕行

不知從此別重到是何年雪爪留新迹霓裳訂後緣紅顏與黃髮同

繫意纏綿

步何掖垣先生見贈原韻

余方擬錄呈小西湖夜宴拙作適蒙先生以大集見賜並賜二律

小西湖水照華筵魯殿靈光見有緣老見花枝猶絮絮孫生瓜瓞已綿綿幸逢何遜稱前輩敢說吳蒙是

謫仙藉讀香山長慶集瓣香從此寸心懸

同聽雙鬢子夜聲知公多壽本多情紅燈對影三更醉白髮高談四座傾愛菊東籬天與癖采蓮西子地  
留名六橋會約餐霞叟牛耳詩壇共主盟

謂百峯先生

陳魯池以詩餞別步韻奉答

鄰月江山借護持何堪催和送行詩寒生翠袖花無語濕透青衫酒不辭南浦秋心懸別恨西湖春老繫  
相思不忘知己丁寧夜投贈箴言是我師

重陽後一日言返吳陽留別同人疊夜宴小西湖韻六首

昔年從鑑水今去別圭峰丁令已乘鶴

居停子輝大令作古

子高誰好龍客情隨日淡鄉思及秋濃難遣琵琶急聲聲

最惱儂感甚諸知己臨歧爲倒樽山川經令節風雨黯離魂紅燭雙鬟影黃花幾淚痕殷勤勞遠送帆指

白沙村

諸君子冒雨送至江門

小西湖畔柳教我早回頭

百峯先生送行詩有最是小西湖畔柳那堪攀折意纏綿之句

倦眼看逾媚纖腰舞更柔有人愁板屋何日會葵邱

湖上

板屋四面多爲藏嬌所種葵樹

翻妬張京兆歸裝尙滯留

晉齋約同行不果

滿載新詩返商量付梓人家紫珊張晉齋家編川譚百峰何掖垣陸雲張拱宸鍾硯雲何亦珊陳魯池皆有詩贈撰與拙作彙刊名岡州笙磬集錢鏗同述古干寶並搜神余在岡幕著泛

綠軒隨筆八卷梨棗編難富芙蓉幕亦貧從今論著作擬傍政園春

蘇季金垂盡馮驩鉞早彈依然親菽水不更渡桑乾烏鳥知還樹驢魚待奉盤嘗羹有少婦共博北堂歡

歸去雖云樂言歸亦惘然知心相別處聚首未經年千里夢魂隔三生文字緣海天鴻鯉便好奇語綿綿

張硯秋刺史招飲席間謹步送華樵雲觀察原韻四律致謝卽送刺史之香山

龍門高絕似瀛洲公子翩翩結駟游四公子晉齋同客岡幕與我蓮花偕入幕依人萍水幸同舟銅琶聽唱大江浪得讀

寄雲醉香吟館諸詞集金鑑爭傳八月秋今日階前容下拜喜瞻風度一登樓

願待東籬賞菊花驪歌催別使人嗟曾馳露布收河朔公在星衢中丞幕中數載甚著勞績又駕風帆到海涯清與隱之同酌

水閒教道濟不量沙在沙田局主文案此行好撰香山集長慶編成卽大家

瀕行把盞饒重陽賤子叨陪醉晚香屈指共談千古事關心誰是百夫防席間閱彭雪琴少司馬乞病疏稿棋經換後仍當

局公由禺山局改香山酒到酣時獨望鄉惆悵輸他珠海月隨公猶得照詩航

故山千里隔愁猿未得言旋桃李園適館三章良過望窮途一望已深恩主人况是爭投轄潤仲升晉齋又伯次仲諸公子

慈母無如憶倚門計日匆匆買歸棹不能面別更銷魂

長春仙館

越王臺上湧狼烟鐵礮聲喧思子船半壁中原都瓦解尙留餘地安神仙  
文山膝下學忠臣和議知誰又姓秦一自西風乾燭後更從何處覓長春  
八月將望銀燭初燒晉齋以牡丹帳眉囑題沈粹生筆也率成四絕

難得披圖翠幙遮紅衫百子劇繁華肯依紙帳稱吟伴忘是春風富貴花  
沉香亭北舊時顏曾倚闌干伴玉環自進吾家供奉曲此花猶覺重人間  
茂卿家世本風流醒酒相輝花萼樓好託連枝按椿樹年年萱草總忘憂  
紅燭高燒照艷妝畫眉新許染天香如何絕好江郎筆設色偏教倩阮郎

詠史二章

太息荆蠻問罪旗不誅僭號盡諸姬包茅縮酒尋常事辛苦中原百萬師  
赤雞圖霸至今傳黃鳥聞歌自古憐欲識坑儒誰作俑三良同恨蓋棺年

蘇屬國節旄

單于吹角正秋高  
禿盡氈毛又鬢毛  
射雁影淒胡月落  
牧羝聲急朔風號  
丁年愛伴孤臣劍  
甲帳羞同降將袍  
不怨歸來無大纛  
止將微賤獎賢勞

趙忠毅公鐵如意

憶昔灰心鑄錯同  
百年手澤尙如虹  
利藏朱劍冤難白  
碎擊玉壺唾亦紅  
東廠有花氛障日  
西台無竹淚臨風  
愁當起舞忠魂在  
始到楊公與左公

步辛酉題珠江花舫

重聽雙鬢唱春葱  
勸舉觴縱教今夜醉  
不似舊時狂笑我  
同孤燕依人向五羊  
瓜痕記無恙聊復索枯腸

附錄辛酉作

十載珠江別相逢  
盡此觴醉尋天姥夢  
醒學次公狂落日邀屠狗  
臨風問劫羊丙丁近來事曾斷幾人腸

曾樊堂軍門招飲作此贈之

曾作江南將歸來  
瘴海東萬帆纔卸月匹馬又驕風  
夜戰山雲黑秋懸戍火紅  
毛錐笑無用輪與挽雕弓



李紫珊能詩善書法著有半園尺牘忽晉齋來書云其已歿作此哭之

我生始束髮得窺半園編尺牘雖小道萬手爭抄傳聞道阮元瑜書記才翩翩名高竟不遇志大徒嗒然  
紅毛弄兵船粵海騰烽烟上書制軍府氣足吞腥羶書載尺牘書生策弗用歸臥滄江邊飢驅竭復來八口書  
爲田與我始相見五月圭峯巔我年纔三十先生已華顛

新會古岡州海濱號鄒魯同舟偶觀風兩人頗相許張生更年少吟詩不辭苦一字費推敲三家鬪旗鼓  
老輩服青蓮交推作盟主老子老猶龍諸君健如虎夜吟馬山鐘晨嘯屋門雨此景猶目前一瞬遂千古  
前年我見君乃在蓮塘東今年人不見蓮葉生淒風憶我初來時猶堪見君面謂君猶健在從容可相見  
誰知遲十日遂無相見期張生走告我將信還將疑明明非夢中淚下空如糜因循負良友慚悔今應遲  
我思范巨卿千里驅車來古人不可作今人徒傷悲

吾宗兩名士紫黼與紫珊年來並凋謝使我無歡顏柳堂卽西州垂碧猶珍穆半園無寸土旅櫬歸途艱  
郎君方食貧蕭索啼痕斑愧無堯夫麥慷慨皆空談心香熬一瓣輓詩題一函人情紙半張未破慳囊慳

李奎垣參戎精青鳥術隨季父壽庭軍門官粵東乞爲先人擇窀穸賦此志謝

江右傳宗派遙聯蛺蝶圖將軍推小李公子愛魁梧新執金吾戟頻投玉女壺梅江烟月地攜手聽吳歎  
一卷青鳥子君家有秘傳精心究龍脈慧眼識牛眠地理卽天理詩山兼酒仙將軍眞禮士幕府喜牀連  
李愿高風在彭鏗古誼敦空還迎馬鬣况復累猪肝知己腸偏熱先人骨不寒金精山下路並轡日盤桓  
歡會無多日何堪又送行鷓鴣空惜別楊柳不勝情羊石春將老灞江月自明  
余將雪省奎垣先有陽江之行迢迢碧天末  
望斷暮雲橫

夏日偕家紫珊明經訪倚馬山房邀同鍾卓甫茂才游小西湖晤主人陳續參司馬談次雨甚命肩輿歸作此奉寄

恍入瑯環地尋幽第一回山房招客住石室借天開我有登龍願君原倚馬才臨行更留戀四壁讀詩來  
聞說西湖好風光似若耶行邀子期伴來訪太邱家座拜虛心竹窓窺解語花悔教紅雪去未聽譜琵琶

翠娥校書  
適來卽去

脈脈情如許多別可憐烟波停畫槳風雨促吟鞭柳絮萍纔合荷根藕欲纏緣何歸太早不待並頭蓮

池中蓮  
都未開

題夢禪圖

去秋一夢證奇緣  
展卷重看尙儼然  
參破英雄兒女恨  
劍光如雪鏡團圓  
年來新號夢禪生  
紅袖黃衫各有情  
因果夢中原了了  
不嫌寫出太分明



李小巖先生楹聯集

吳川李漢魂伯豪輯

高州協中書院

樓正面山間誰筆大如椽把天外三峯權作先人鄴架  
居原近聖許我門高容駟讓階前尺地得瞻夫子宮牆

其二

系出理官念先代謨陳堯舜禮守商周歷秦漢魏晉唐宋以來椒衍瓜繇胥一本  
譜由隴右裕後昆基開粵海宅定高涼聚茂電化吳信石之衆支分派別總同源

其三

李木植根株攀桂杏樹楷模葉楸枝榮橋梓森森標樑棟

源泉洵浩蕩淵清漣沿汜注淵深流濶波瀾淼淼滙江河

高州旅瓊會館

奇句我來游與諸君觴捧南天且喜千里月明共談桑梓

熙朝神效順觀此日鏡清寰海更願一帆風便直到蓬萊

極浦亭祠

按極浦亭爲宋解元李凌雲隱處  
今其子孫卽地建祠以崇祀事

金鑰事和我聊當年南宋區安滄海橫流此地尙爲乾淨土

緇帷親講學效前哲西河設教高山仰止後人爭重釣游踪

其二

不事王侯至今儒立頓廉須知清澤流風及人者遠

重修祖廟從此憶聞懷見每感秋霜春露薦物惟殷

其三

五千言道德楷模柱下清芬紫氣自連函谷遠

一萬卷圖書紀述嶺南古蹟白沙並峙釣臺高

其四

按宋丞相陳宜中題極浦亭詩有顛風急雨過吳  
川之句



每當美景良辰定有詞人同載酒

無復顛風急雨尙留丞相舊題詩

乾塘陳氏大宗

九萬里奉使探驪海外乘槎青史銘勲標族望

廿餘年總戎勒馬山東駐節黃塵蕩寇樹邊功

霞街林氏鄉賢祠代陳荔秋作

萬丈赤城標霞蔚雲蒸海國衣冠名族盛

千秋白沙緒芹馨藻潔江門風月釣台高

陳麗秋醮壇

供來紫宸班溯當年聯玉筍步花磚與佛有緣七十餘杖履優游好証前身參善果

歸奉墨洲客記兩度越金山涉滄海惟神克相九萬里舟車安穩幾回頻首答宏恩

上郭特峯公祠

鸞旗頻壁近芳祠子孝孫賢想當年坐擁臬比臺上靜觀參水月  
麟筆延陵留舊蹟地靈人傑喜異代封崇馬鬣峯頭佳氣湧蓮花

黃都府峯上公祠

武翼承風文麟跋浪

丹楹照水銅柱摩雲

上郭都會頭名齋廠

平地起樓臺敢誇造極登峯廿四年重按霓裳絃管恍聞天上曲  
暮春偕童冠樂得逢場作戲六十叟自搔雪鬢江山已老眼中人

金輪齋廠

曉日耀金輪照蓬萊宮闕波光觀海自知難爲水  
東方來紫氣喜花木樓臺地近向陽真覺易逢春

三月拜齋齋廠

天下事尙可爲高會群英與諸君牛耳聯盟同袍願得無雙士  
眼中人吾老矣重過上已憶往日龍頭虛譽修禊而今十七年

三月拜齋燈廠

高會及芳辰人影衣香恰值楊柳風前杏花雨後

良朋來此地燈紅酒綠又見西山月上東海潮生

送別王觀察良弼

卿月九霄懸雖非近水樓臺尙蒙私照

慈雲千里別忍見攀轅父老遠送公行

贈趙統帶

將軍六詔早知名若早望雲霓權留駐節從容行陣指揮鵝鷺肅

子龍一身都是胆救民於水火無使爭城糜爛解圍談笑虎狼馴

深柳堂

深花小隱桃源境

柳葉低垂栗里居

賀江璘如鄉薦

三代數登科繩武題橋早識孫謀詒有穀

十齡知跨灶論文對酒重揩老眼喜無花

賀李壽岩作翁

七月初四日

風詩曾詠二南喜誦首章迎淑女

令節剛逢七夕先期三日會天孫

賀陳石卿新婚

三代深交憶乃兄有穀貽孫一品芝泥誇絢爛

中秋節近喜嘉客催妝得句連宵桂月慶團圓

賀陳禹廷作翁

三月四日

繡豸舞萊衣  
議院歸來初  
開醺子華筵  
燕賓珠綴三千履  
關雎歌荇菜  
宜家好合喜  
迨標梅吉日  
鳳侶簫吹廿四橋

賀林少侶娶孫婦十月

拔萃老明經  
喜令子作翁  
安排名士樽  
疊十月襲中  
春酒熟  
超羣冠新學  
賀文孫得相  
艷羨狀元家  
世百花頭上  
早梅開

賀鄒日新娶孫婦

驚序著司農  
杖履承歡喜  
見蘭孫偕伉儷  
鯉庭申醺禮  
萊衣舞彩笑  
看桂子學痴髻

賀李雪廬出嗣子新婚

象服娛親喜  
同時稱伯稱  
翁舞衣戲博  
萱花笑  
鴈原憶弟慶  
此日佳兒佳  
婦飲酒難忘  
棣萼情

賀林禹勤新婚

燕寢舞萊衣  
頤頑寶氏義  
方跨灶人誇  
遊泮早  
鳳池操左券  
黠竇隨園佳  
句洞房春在  
玉堂光

賀吳文泉令子新婚

二月賦天桃  
記南山藥室  
北海稱觴去  
歲今年重燕  
喜  
三星歌東楚  
是狀元外孫  
將軍佳婿  
文昌武曲共  
騰輝

賀何升菴作翁

花甲福同孫  
老乙未重逢  
新乙未

瓊林兄昂弟  
大登科還讓  
小登科

賀壽鏡世兄新婚

壽享大年公  
其嬰鍊

鏡如明月子  
慶團圓

賀新婚



花夢喜相輝詩詠渭陽往送愧無瓊玉贈

琴瑟塵靜好型觀嬌泖于歸端叶室家宜

祝陳健臣令堂壽

九有八日壽辰

仙樂奏雲璈王母稱觴桃熟今年幾千歲

天恩錫霞帔兒孫舞綵菊開明日又重陽

祝李萼軒令堂八十壽

九月初三日

八十壽星經膝繞孫兒皆具慶

初三眉月見天無風雨近重陽

其二

八旬壽菊初黃子則孝孫則賢簪笏滿門齊舞綵

一本藟綿桃正熟宗之光族之望衣冠盈座共稱觴

輓林芾南師

海內同悲況廿年曾侍門牆感深知已

公心無憾只一事未傳衣鉢念切替人

輓陳荔秋師

立雪憶門前三十年几席追陪絳帳共論天下事

使星周域外四萬里梯航感戴墨洲遙拜海東祠

輓彭子衡

名將少白頭况是時邊事方繁大星遽隕南天空教山吊彭亡銅柱未酬新息志

平生最青眼乍聞耗京華一慟十日飛航滄海依舊舟同李載素車猶待巨卿來

其二代作

三軍統帥一品崇封十六年忝訂蘭交厚誼銘肌兼鏤骨

七日暫違半朝水訣八九歲貌孤桂嗣遺言在耳敢忘心

輓江誠和

君去太倉皇吊才人司馬惠人國僑幾回繩武橋邊掩淚愁看題柱字  
我來更於邑哭今年江淹去年羅隱一樣修文地下愴懷痛念指園情

輓江孔德

嶺海失斯人鴻博無光猶聞宰相上書薦賢自謂一夔足

溪橋留故宅皐比依舊且看兒曹跨灶馳譽齊跨五鳳毛

輓陳仁端

好客比孟嘗感公推解深情無數孤寒齊下淚

知我如鮑叔際此艱難時局那堪桑梓失同袍

輓林少侶

按番禺縣撰以嘉慶己酉科拔貢今孫少侶亦以同治己酉選拔甲子七週祖孫同譜

祖武紹明經六十年衣鉢相傳爭誇議院名高也抵唱牘金殿上

國文巡勸學數百輩絃歌遽輟况屬通家誼重那堪洒淚酒爐旁

輓李增榮

十人望榜九日銜杯屈指數同年海角晨星今剩我  
一代詩名千秋宦跡傷心成隔世屋梁落月倍思君

輓鍾楚士

廿八年久別鍾期門館依然回憶知音談對榻

十七日遲來范式山河渺矣空教和淚寫銘旌

輓吳永觀察之夫人

翟第迂西巡聞粉署以駐鑾輿相傳炙酒行觴故事侈談趙中令

鸞驂歸上界倚潘山而望鄂渚定有雲車風馬英靈來會洗夫人

輓周相臣令堂

卅年步月訪濂溪記而翁譽新婦賢能預知晚福堪娛五色養膺鸞鳳詒

千里觀風巡粵海喜令子爲諸生矜式遽痛春暉難駐同聲廢讀蓼莪篇

輓梅萊黃分府啓鏗

分府正擬爲母祝壽  
適先五日病歿

廉德信可風臨蓋棺不名一錢空餘黃口零丁百姓爲公齊下淚  
孝思猶未艾迄戲綵尙虧五日翻令白頭哭子九泉念母更傷心

輓羅邑侯仙源

百里軫凋殘內而撫外而安藉手成功漸使蒼生登衽席  
一邑資保障清而明勤而慎鞠躬盡瘁忍聽白叟哭銘旌

輓陳石卿

當筵妙語辨楊梅痛一朝地下修文我惜通家小德祠  
焚券高風惠桑梓記九里河千分潤人思弱冠孟嘗君

輓文耀奎之尊甫令堂

嘉耦言高恰一朝白首同歸地下唱隨應至樂  
苦人羅厄間今日蒼天何酷樽前痛飲有餘哀

輓江柱中母馮太夫人

在畫廊濕慈方期潘岳板輿奉母祝釐佳話豈知成畫餅  
五更泣鵲血翻恨江淹彩筆忠親染淚傷心不忍蘸吟毫

輓江母林太宜人

畫挾字猶存烏養難留永訣終成兒恨事

孟蘭經未歇鸞輦遽返同行相約女親家

輓黃雲鵠令堂

一尺布一卷書五夜寒燈慈母線

蜀山青蜀道峻十年冰蘖遠臣心

輓陳雲田令堂

古井酌清泉勝地爲鄰血食並垂龍母廟

豐碑屹貞石好心教子恩榮長比洗夫人

輓外姑

代李順南作  
時值五月



甥館甫週年愛壻如兒膝下歡承萱草綠

我來遲半日登堂哭母心傷淚洒荔枝紅

輓內弟

代林伯厚作

同氣十三人幾經翼折雁行可憐慈母堂前今又哭兒揮老淚  
得病一二日遽爾星沉鸚渚倘遇女兒地下何妨爲我訴離情

JUL 03 2001

EAST ASIAN STUDIES

卷之二 日 聖 賢 呈 送 經 書 禮 記 文 又 賦 不 同 故 益 年 福 壽 計

同 衆 十 二 人 戲 弄 真 海 潮 音 臣 謝 益 世 堂 南 今 又 吳 良 壽 本 縣

廣州市龍藏街西雅承印

卷之三 日 聖 賢 呈 送 經 書 禮 記 文 又 賦 不 同 故 益 年 福 壽 計

德 治 世 賦 聖 賢 呈 送 經 書 禮 記 文 又 賦 不 同 故 益 年 福 壽 計



